

**SIXTH LEGISLATIVE ASSEMBLY OF MIZORAM  
( TENTH SESSION )**

**LIST OF BUSINESS**

**FOR SECOND SITTING ON WEDNESDAY, THE 21<sup>st</sup> MARCH, 2012  
(Time 10:30 AM to 1:00 PM and 2:00 PM to 4:00 PM)**

1. **OBITUARY**

*Pu LAL THANHAWLA*, Chief Minister to make reference on the demise of Pu V. Lalnunzira, former Member of Legislative Assembly of Mizoram.

2. **QUESTIONS**

*Questions* entered in separate list to be asked and oral answers given.

3. **ANNOUNCEMENT**

**THE SPEAKER** to announce Panel of Chairmen.

4. **PRESENTATION OF REPORT**

**THE SPEAKER** to report to the House the Time Table as chalked out by the Business Advisory Committee for the current Session.

5. **DISCUSSION ON MOTION OF THANKS**

Discussion on Motion of Thanks on the Address of the Governor (to be concluded).

NGURTHANZUALA  
Secretary

**S P E A K E R** : Thihna chu a lem hlen ta, Lalpa Pathian chuan mi zawng zawng hmai ata chu mittuite a hru fai ang. Isaia - 25:8

Tunah Obituary hun kan lo hman anga, Chief Minister zahawmtak Pu Lal Thanhawla ilo sawm ang.

**Pu LAL THANHAWLA, CHIEF MINISTER** : Pu Speaker, vawiinah he House zahawm taka kan member pui thin Pu V.Lalnunziran min boral san tak avangin amah sunna leh kan ui thu sawi alo ngai ta hi paw ka ti a. Pu V.Lalnunzira hi December ni 26 tlai dar 6 khan zunthlum natnain New Life Hospital-ah a boral a. Kum 65 a upa a ni.

Pu V.Lalnunzira hi Pu Dokhuma (L) leh Pi Saii te fa pali zinga upa ber a ni a. Ni 15 January, 1946 khan Serhmun, Mamit District-ah a piang a. Rupaicherra leh Zamuang-ah te a naupan lai hun hman a seilian a ni. Ni 19 November, 1982 khan Pi C.Ronguri nen an innei a, fapa pathum leh fanu pahnih an nei a ni.

A hun laiin zirna hi a harsa hle a, nasa taka bei tang tangin harsatna tam tak kaltlangin Salem Boarding, Sihthiang khua, Mamit District-ah zirna bul a tan a, Kawrthah High School ah a kal leh a, hemi hnu hian Aizawl-ah BPP IGNOU ah a zir zo leh a ni.

Kum 1971-1972 chungin Synod Ramthar Mission Board hnuaiyah Evangelist Teacher hna Bairabi leh Zamuang-ah a thawk a, Evangelist Teacher a chawhhsan hnu hian contract hna hi chi hrang hrang thawk kual ve in ei a zawng thin a ni.

Pu V.Lalnunzira hian People's Conference Party (P.C) a lo din khan politics a zuang lutin active member-ah a inziak lut a. Kum 1979 khan Mizoram Legislative Assembly-ah a Member ni turin People's Conference Party atangin nominated seat a dah a ni. Kum 1979-1984 chungin khan a theihtawpin mipui rawngbawl hna a thawk a, Committee hrang hrangah nihna pawimawh a chelh ve a. All India Radio Programme Committee-ah pawh hun engemawchen a awm baw a ni.

Pu Zira hi pa ngawichawi, zaidam leh inthlahrung thei tak, mi pawisawi hlau tak a ni. Mi taima tak, mi invawng fai leh zing thawhlim atanga fel taka inchei thin a ni. Ram inrelbawl hna hi a vei em em a, diklo leh fel lo nia a hriatte hi siamthat dan nasa takin a ngaihtuah a, a sawi fo thin. Kohhranah nihna pawimawh tak chelh lo mahse, a theih ang tawka Kohhran bel tlat mi a ni a. Sunday School leh thilpek rawngbawl, Pathian Ram thawhlawmte a ngaipawimawh em em a. Kum engemaw zat chungin Sunday School hi a kai kim a, taksa chaklo leh hrisello chung pawhin 2011 pawh khan a kai kim nghe nghe a ni.

Kum 1995 atangin zunthlum natnain a tlak buak tan a, he natna avang hian Damdawi in hrang hrangah pawh vawi engemaw zat luhpui a ni a. Nasa takin in enkawl mahse a natna hian zual lam a pan hret hret zel a. Ni 16 December, 2011 atangin khan a chau zual a, Ni 21 December, 2011 khan New Life Hospital-ah dah luh a ni a. Doctor leh Nurse ten duat takin theihpatawp chhuahin an enkawl a. Ni 26 December, 2011 zing dar 8:00 vel atangin Oxygen pek ngaiin a awm a, thawhahin a tibuai a, tlai dar 6:00 khan chatuan ram min pansan ta a ni.

Pu V. Lalnunzira hi he House-ah hian kan awmpui tawh thin a, mi inthlahrung tak, mi ngawichawi tak, ka sawi tawh ang khan mi pawisawi hlau tak a

ni a. Tin, party-ah a ngelnghet em em a, a rinawm em em a, tin, bial bik neilo mahsela, a lo chawrchhuahna lampang bial khu a ngaihsak em em thin a ni tih pawh a hrechiantu ka ni a. Tin, a hun tawp lamah hrisel lohnain a tlakbuak avangin chhungkaw khawsak an harsa ve viau thinin keini tehlul bulah te pawh a lokal ve fo thin a, kan lo indawm kual thin a. Vawiinah Pu Zira, member thahnemngai tak lo ni tawh thin, kan chan ta leh uina thu han sawi ngai ta leh, hriatrengna hun hman a ngai ta hi hrehawm ka ti takzet a. He House tan chauh ni lovin kan ram pumpui tan leh a bik takin a rawn chawrchhuahna bialte tan channa rapthlak tak a ni a, a nupui fanau a kalsan takte Pathianin awmpuiin thlamuan se tih hi kan tawngtaina a ni e. Pu Speaker, ka lawm e.

**Pu H. LIANSILOVA, MINISTER** : Pu Speaker ka lawm e. House Leader-in Pu V. Lalnunzira chanchin tawi kim takin a rawn sawi tawh na a, han sawi ve thain ka hria a.

Pu Zira hi Aizawl North-II huamchhungah in leh lo nei a khawsa a ni a. Tin, a mimal takin kan inhria a, an chhungkua a nupui Pi Ronguri te pawh kan hmelhriat leh inthenawm khawveng hnaia awmho kan ni a, Pu Zira hi kan ngaihlak tak ang khan mi solid tak mai a ni a. Party-ah a ni emaw, pawlhoah a ni emaw kohhranah pawh rilru thlak mai mai lo ngheet tak mai a ni a. Tin, nihna leh chanvo lamah a duham lova, chubakah mi rinawm mawhphurhna anihna leh a dinhmun atana pek anih tawh phawt chuan a tawp thlenga sutlang thin a ni a. Kan ngaihlak tak ang khan kohhranah pawh rawngbawlana langsar takah dah leh ruat nilo mahsela kohhran member nihnaah thil tam takah inkhawmte leh member-in a tihtur zawng zawng entawn tlak khawpa rinawm, mahni mawhphurhna chhungkuaah pawh kengtlang a ni a. Tin, inthenawm khawvengnaah pawh thenawm khawvengte tan hnawk nih tum miah lo, tin, chhiatni/thatniah pawh langsar taka intarchhuah tum lo, amaherawhchu, mi chhiatniah te rinawm taka telve mai nilo, a tawp thleng thin, keng tlang thin a ni a. Chuvang chuan ama dinhmunah Ex-MLA zahawm takte nimahsela rualkawm leh thianho zinga awmah anihna tarlang leh mi chaldelh a ni ngai lova, mi inngaitlawm, thuhnuairawlh, mite tana hnawksak tum lo, mite tana tangkaina a neih phawt chuan a tangkai theihna apianga tangkai tum a, chutianga nupa/chhungkua inthurual taka awmho thin an ni a.

Kan ngaihlak ang khan a hun hnunung lamah hian hrisel lohnain a tlakbuak a. Chuvang chuan thenawm khawvengah pawh a vak chhuak tam lo viau a. Vanduaithlak takin kum tam lutuk pawh ni lovin chatuan ram min lo pansan ta a. A uiawm hle a, vengchhung leh a bial mipui pawhin kan ui hle a. Hetiang mi duhawm tak kan han chan hi vawiinah hian a chhunge, a nupuile leh a fanaute kan tawrhpuina thu sawi pahin vengchhung leh bial pawhin mi duhawm tak, kan ngainat tak kan chan a ni tih kan sawilang ve a ni e, ka lawm e.

**Pu LALDUHOMA** : Pu Speaker, Pu V. Lalnunzira hi ..... a niin ka hria a. Tawng huathlala nilo sela, Mizorama cheng minority kan han tih lam atanga lo chawrchhuak a ni a. Chuta tanga helai rorelna In sang bera member tha tak mai rawn ni thei anihna hi a chipui, chi leh kuangte tan phei chuan a chhuanawmin a thlamuan thlak hle ang tih ka ring a. Ram puma roreltu nihna dinhmun, anmahni khawsakna lam atanga rawn thleng ve thei hi a hlut zualna a ni a. Chutiang mi kan lo chan ta chu Zoram pum tan mai ni lovin, anmahni chi leh kuang tan

bik pawh channa ropui tak a ni ang tih ka ring a. Helai rorelnaah thuzui zel lo mahsela, hruaitu pawimawh tak nihna dinhmun neiin mi chhuanawm tak a ni reng a. Chutiang ang kan lo chan ta chu a bik takin a uiawm zualin ka hria a. A kalsan tak a chhungte Pathianin thlamuanin hruai zel sela tih kan duhsakna kan han hlan ve a ni e, ka lawm e.

\*Speech not corrected.

**Pu C. RAMHLUNA** : Pu Speaker, tukina Pu V.Lalnunzira kan uina thu sawi a ngai ta hi keini pawhin pawl kan ti takzet a. Tukin zingah kan hotu ber a awm lova, ani chuanin a chanchin sawi tur pawh a hre deuh mai thei a. Kei, a hre tlem ber hian han sawi ka duh tlat a. A chhan chu khatia MLA a nih lai khan sorkar hna kan la thawk a, mi rawn dawr ve zeuh zeuh a.

Sawi tak ang khan pa inngaitlawm tak, inthlahrung tak a ni a. Officer te han dawrah pawh khan a chungchuanna in show duh ngai lo chi kha a ni a, a bula awm kha nuam kan ti a. Tin, thil ti tura min han ngen pawh khan a mizia avang khan han tih kha a chakawm viau thin khan ka hria a, kha kha ka hriat dan a ni a, an han sawi danah pawh khan khatiang mi kha a ni a. Sawi tak ang khan kan tawng lo ngaithiam sela minority lam atanga lokal a ni a, kan bialah hian hetiang mi hi an awm nual a. Chuvang chuan anni tan phei chuan hetiang mi chhuanawm chan a ni ta hi uiawm leh zualin ka hria a. Anmahni hnam pawh kan tuarpui takzet a ni tih kha ka'n sawi duh a. Tin, chubakah chuan a nupui hi Pi C.Ronguri a ni a, a nu leh pa hi Biate chhuak an ni a, a pa kha Vanngura (L) leh a nu kha Rothangi (L) an ni a. A nupui leh fate leh an chhungkaw tan channa ropui tak a ni a, ram tan pawh channa ropui tak a ni a. Chubakah chuan a chanchin kan han sawi tawh ang khan mi rinawm leh pa nget tak, a ngaihdana ding nget tlat mi a ni tih te kha kan hria a. Khatiang mi kha a uiawm hlein ka hria a. Amah atang khan zir tur tam tak kan nei pawhin ka hria a. Tukinah hian keini pawhin a chhungte leh a fate leh thenrualte, he thihnain a tuam zawng zawng chhungkuate tan kan sunpuina kan han hlan ve duh baw a ni e. Ka lawm e.

**S P E A K E R** : Sawi duh neite kan la awm thei a. Ka han hawi vel a, vawiina House-a thuah hian Pu Zira, he House-a a thut laia amah pawh hetiang dinhmuna dahtu ngei Brig. T. Sailo a awm a. Mahse ani hian han sawi a tum lem lo niin ka hria a. Tin, kan House Leader a ni baw a. Tin, Minister J.H.Rothuama hi Pu Zira thut laia thu a ni a. Khatih laia mi pathum lai House-ah thu kan la nei a ni tih kha House ka'n hrilh duh baw a ni.

Pu V. Lalnunzira, kan MLA hi House-in sunna kan lo nei ang a. Ngawi rengin minute 1 i lo ding ang u.

Tunah chuan vawiina kan tih tur kan ti chho ang a, Starred Question No. 1 zawt turin member zahawmtak Pu C. Ramhluna i lo sawm ang.

**Pu C. RAMHLUNA** : Pu Speaker, School Education Department changtu Minister zahawm tak chhan atan ka Starred Question No. 1 chu hei hi a ni -

- (a) Non-Government School leh Government school thenkhata zirtirtute hlawh la thei lo, Krismas 2011 hma ngei a hlawh pek tumte kha an vaiin hlawh pek an ni ta em ?
- (b) Pek vek an nih loh chuan engzatnge la pek loh ni a, engvangnge ?

- (c) Engvangin nge an hlawh tur daih khawp Plan Allocation hi pek an nih loh ?  
 (d) Kum 2009 – 2010; 2010 – 2011 leh 2011 – 2012 chhunga hlawh atana Plan sum mamawh zat leh Original Budget Estimate a sum dahte hi min hrih thei em ?

**S P E A K E R** : A chhang turin a enkawltu Minister zahawmtak Pu Lalsawta i lo sawm ang.

**Pu LALSAWTA, MINISTER** : Pu Speaker, member zahawm tak Pu C. Ramhluna zawhna chhanna chu hetiang hi a ni e – (a) Non-Government leh Government School thenkhata zirtirtute hlawh la thei lo, Krismas 2011 hma ngeia hlawh pek tumte kha an vaiin hlawh pek an ni ta em? tih chhanna chu - Plan hnuiaia hlawh la Non-government School leh Government School zawng zawngte hlawh hi Krismas hmian pek an ni.

(b) Pek vek an nih loh chuan engzatnge la pek loh ni a, engvangnge tih a ni a, mahse, pek vek annih vang khanin an zawh leh tho tur nia ka hriat avangin kumin January, 2012 atanga Plan hnuiaia hlawh kan la pek theih loh chungchang hi kan rawn chhang nghal a. Chu chu 2012 – 2013 Financial year a pek turin hei hi buatsaih mek a ni tih kha ka chhan na a ni a.

Tin, (c) – na, engvangin nge an hlawh tur daih khawp hi plan allocation pek an nih loh ? tih chhanna chu hetiang hi a ni. Plan Fund min pek hian an hlawh tur a daih lo a ni, tih a ni.

(d) – na Kum 2009 -2010; 2010 – 2011 leh 2011 -2012 financial year chhunga hlawh atana Plan sum mamawh zat leh Original Budget Estimate a sum dahte hi min hrih thei em? tih chu hetiang hi a ni.

2009 – 2010 financial year chhunga kan mamawh zat ` 10,397.00 lakh (cheng nuai singkhat leh zathum sawmkua pasarih) a ni a, mahse kan budget estimate chu ` 8,490.00 lakh (nuai sang riat leh zali leh sawmkua) a ni. Tin, kum 2010 – 2011 a kan mamawh zat chu ` 10,804.00 lakh (cheng nuai singkhat leh zariat leh pali), mahse kan Budget Estimate chu ` 9,054.50.00 lakh (nuai sangkua leh sawmnga leh pali leh sing nga) a ni. Tin, tun kum kal mek kum 2011 – 2012 financial year chhunga kan mamawh zat hi Rs.17,357.99 lakh (cheng nuai singkhat sangsarih zathum sawmnga pasarih leh point sawmkua pakua) leh kan Budget Estimate chu ` 11,319.50 lakh a ni.

**S P E A K E R** : Zawhbelhna Pu C.Ramhluna.

**Pu C.RAMHLUNA** : Pu Speaker, Christmas hma atanga hlawh la lo hote pek theih an nih kha lawmawm ka ti a, zirtirtute pawh ka lawmpui hle a, tuna ka han zawhbelh duh chu khatiang ang taka an requirement chiang taka hre si khan engatinge plan allocation-ah hian zirtirtute hlawh hi a tir atang khan a daih tawh kha an pek theih mai loh? tih hi, a sawrkar hrim hrim pawh hian hetiang hi enchiang sela a tha lawm ni? Chiang tak khanin fund allocation kha hriat a ni bawh si a, an mamawh kha a hriat bawh si a, an daih loh tur sum pek a ni fo mai hi, zirtirtute hi Ram enkawltute, naupang enkawltute, ram hruaitu turte enkawltute an ni a, an pawimawh hle mai si a, kan sawrkar hian an mamawh ang tal hi chu kumtin hian a pe thei lawm ni? tih kha ka'n zawt duh a,

Tin, a pahnihnaah chuan ka sawi tak ang khan January leh February hlawh chu 2012- 2013 ah khan pek an tum leh dawn ta tihna a ni ta a, khami anih chuan 2012 -2013 a budget a kha an ei tel dawn tlat, kumina an service, an hlawh tur kha. Chuti a nih chuan 2012 -2013 ah pawh khan hlawh kha a indaih leh lo dawn tihna a ni tih a chiang reng mai a. Khatiang thil chiang reng kha chu sawrkar hian a solution kha heng budget estimate stage-ah hian a siamfel sak theih lawm ni tih kha ka han zawt duh a.

Tin, chubakah chuan Pu Speaker, ka'n zawhbelh leh duh chu, M.E School ah te, Primary School ah te hian, zirtirtu leh naupang awm zat hi min hrilh theih em? All India Norms-ah hian student leh teacher ratio hi Mizoram hian kan khum nge kan pha lo, All India Norm-te pawh hi enge ni a, Teachers leh student ratio hi Mizoram hian kan pha nge pha lo, nge kan lo khum viau, tih kha information hrim hrim atan pawh hian a thain ka hria, chu chu ka zawt belh duh baw a ni e. Ka lawm e.

**S P E A K E R** : Zawhbelhna Pu Lalduhoma, khati chin kha kan la ang.

**Pu LALDUHOMA** : Pu Speaker, College a thawk te pawh hi hlawh an la thei loin a lang a, hei hi eng nge ni a chhan, engtikah nge an lak theih ang? tih kha kan zawt duh a.

Tin, Non – Plan hnuai hian, tuna kan han ngaihthlak kha Plan hnuai bik a ni a, Non – Plan hnuai an hlawh dinhmun a hi, an la thei nge, la thei bik lo? kha kha ka'n zawt duh baw a. Tin, kumtir atanga mamawh zat neilo department a ni renga, a kum leh budget a inpuk chho zel a nih hi chuan, problem hi kan solve lova, kan postpone mai mai a ni tih a chiang reng a. Finance Department pawh hian hemi khawp tur na na na hi chu engatinge an pek mai loh le? enge a chhan? a reasonable tawk em? Khalai kha minrawn hrilhfiah se ka duh a ni.

\*Speech not corrected.

**S P E A K E R** : Le, chhang turin Finance Minister i lo sawm ang.

**Pu LALSAWTA, MINISTER** : Pu Speaker, kan sum indaihloh dan chungchang hi thawntua ziak tham khawp a tling ve tawh a, History nei nuai mai a ni a. Tun Sorkar Congress sorkar mek atang hian a ni vek lova, hlawh indaihlohna hi a rei em em tawh a, kum sawm chuang hi hlawh indaih lovin School Education Department leh Higher & Technical Education hi kan awm a ni. Kan Association Leader te hian an hna ber pakhat chu Planning leh Finance Department-a an hlawh tur um te pawh hi a ni ve hrim hrim mai a. Chuvangin he sorkar han malkawh bik kha chu a diklo tih kha ka sawi duh a.

Kum 2005-2006 khanin mak takin hlawh hi kan indaih tlat mai a, chu chu School Education Department-ah hian hahipin kan sawi ve a ni. “Hlawh kan indaih tlat mai” tiin kan sawi a, Ka indaihna chhan pawh kha tihsual vang mai mai a ni a. Chuvang chuan School Education Department-ah hian hlawh indaihloh hi chu hri ang hian vei a ni tawh a, sorkar hmasa emaw sorkar hnunngah pawh hian he thil hi kan tuar reng a, Sorkar hmasa hian an tihdam hleihtheih loh hi tunah hian kan Chief Minister zahawmtak ho hian tihdam tumin hma kan han la a ni a. Tin, Pu Speaker, kum 2008 inthlan dawn kum, April thla leh September thla khan School 337 hi dinhmun sangah a han hlangkai ta thut mai a.

Chutichuan khaw tam takin School private a an lo buaipui te, chutiang buaipui ngai ta lo chuan Adoc-ah te, Deficit-ah te, a then te pheih chu Government-ah te an lut a, provincialise an ni a. Chutianga lut an lawm em em tawh lai si khan, kha an School thar, school 337 a rit kha, kha Sorkar khan phur hman lawi si lovin, keini kan sorkar tak khan, kum 2008 December ni 11 a sorkar thar a lo pian atang khan kan phur ta a. Vawiduailo hi kan ngaihtuah a, mahse kan Chief Minister zahawmtak, he House Leader ni bawh hian an khawngaih thlak a ti a. Miin Bawng leh Vawk nen an lo lawm a, khawnawt ten School dinhmun sang hi an lo lawm mup mup tawh mai si a. Chutianga hruailuttu lah chu mawhphurtu an awm tawh mang silova, keini a mawhphurtute khanin kan phur dawn nge kan 'rollback' dawn kan ti a. Rollback mai hi Sorkar kalphungah chuan a awlsam a, kan tih awm tak pawh a ni kan tih laiin uluk takin kan pu hova, kan ngaihtuah hian kan 'Roll back' hian mi dinhmun, mi nupui fanau chawma heng school a thawkte an lo nih tawh bawh si avang te leh school tam tak, an lo lawm ve em em tawh lai hi chuan, "Rollback' lo mai ang, phur tang tang ila, phur chhuah ni a la awm mai thei a ni", kan ti a. Tunah hian phur chhuah theih turin kan inruahman mek a, kan phur chhuak thei mai in kan ring a, kan Sorkar chhung hian har hle mahse.

Hetih lai hian hlawhthar te a lo chhuak bawh a, chu chuan requirement-ah pawisa mamawhte a pung tual tual bawh si a, chuvang chu a ni ber mai e. Pu Speaker, engvangnge tih in zawh in zawh hi a tam a ni. Vawinahte pawh hian information kan hriatdanah chuan, "Hlawh tur tak ngial pawh inpek daihloh reng mai" tiin Demand Rally te pawh pawn lamah an buatsaih niawm tak a ni a, hei hi a changtu Minister ni bawh tan chuan thil hrehawm tak mai a ni a. Mahse kan dinhmun hi nichina ka sawi tawh ang khan tun thil mai a ni lova, a enkawltute, kan Officer te tawp bik vang pawh a ni lova, kan thil tawn hian harsatna min thlen hrim hrim a ni tih kha ka'n sawi chiang duh a.

Tin, a zawhbelhna 2-na, 2012-13 chu – "April Ni 1 atanga intan turah hian tun kum kal mek 2011-12 atangin in lo ei leh tawh a nih si chuan chuti reng reng chuan in kal reng dawn a nih chuan a va buaithlak duh awm ve?" tih kha thudik a ni a. Mahse tuna ka han sawi tak ang khan, kan Finance Minister te, Chief Minister-te leh kan Chief Secretary-te nen pawh he kan problem bik hi uluk takin kan khel kan khel chho a. Zawi zawi hi chuan a harsa zualpui hi kan chingfel chho zel a. Tun kumah erawh hi chuan tihngaihna a awm thlawt lova, January atanga kan hlawh pek theih loh hi pawisa a awm miao si loh avangin kum thar atanga pek turin kan rawn buatsaih chho ta chu a ni.

Tin, "School-ah hian naupangte hi tlemte zirtirtur hian zirtirtute hi an lo tam nge, "Pupil-Teacher Ratio" kan tih 'PTR' kan tih hi India ram nena khaikhin hian enge Mizoram hi kan dinhmun ve reng le?" tih zawhna Member zahawmtak atanga lo kal zawhbelhna-ah khan vawina kan dinhmunah hian PTR-ah chuan India ramah chuan a tlangpuiin kan tha a, mahse North East-ah hian keimahni anpui ve ang hi an lo awm ve teuh tho a. Hemiah hian Pu Speaker, han sawi chian ngai hi han sawifiah nghal law law ila a thain ka hria. Right of Children to Free and Compulsory Education Act hianin Scheduled te siamin PTR tur te pawh hi a rawn buatsaih a. "Hetiang tak hian School in kal ang a, naupangte pawh heti zat hi an awm tur a ni," tia Schedule-a a prescribe dan chuan naupang 30 hian zirtirtu 1 mamawh ang hian an han chhut chho den den a, a tawp khar nan PTR chu 40 a ni ang an han ti leh tlat bawh a, buaithlak angreng khawp mai a. PTR 40 anih kha chuan keini Department-in kan han hriatthiam danah chuan, "Class room pakhatan hian 40 hi chu awm suh u, 40 pel hian chuan awm suh u, effective teaching a awm thei lo ang," an tihna anih ber

dawn hi kan ti a. Khunga Meeting kan neih nikhua te pawhin kan han zawt thin a, a tumah hian min chhang thei chuang lova, kan Secretary te leh kan Minister min chhangtu Pu Kapil Sibal-te thleng pawh hian min chhang thei chuang lova. Chuvang chuan, tuna Right of Children Free and Compulsory Education Act, 2009 lo awm tak bawk si hian naupangte hi Sorkar hian a umin kan um ta a ni.

School kal lo an awm palh em tiin School kal tir hram tumin kan um ta a, khaw tereuhte-ah pawh naupang sawmhnih khat, 20 pawh tlinglo awm selangin School kan buatsaih sak a, School ah kan khung a, kan zirtir alo ngai ta a. Chuvang chuan, 30 zel diak diak anga awm tura, class tina han awm diak diak tur khan a theih loh ve hrim hrim a. Chuvang chuan, Lungleng khaah sawn, “Naupang Primary School-ah 120 awm ula, class tinah 30 in awm tur a ni” tih ringawt kha. Class thenkhatah 5 lek an lo awm a, class thenkhatah 17, chutiangte anih avang chuan PTR hi Sorkar hian ruat mahse keinina kan hriatthiam dan zawkah chuan class khatah hian heng aia tam hi in dah tur a nilo min tihna niin kan hre ta a ni. Chutiang anih loh chuan tun ang taka Fundamental Right lo ni tawh bawk si karah hi chuan naupang a uma kan um a, School a khung hram kan tum bawk si chuan khaw te reuhte te te, hetiang kara kan han buatsaih takah hi chuan tun anga kan dinhmun hi Assam/Nagaland/Meghalaya-ah te pawh an lo awm ve teuh tho a, chu chu tuna kan dinhmun chu a ni a.

Amaherawhchu tuna figure hi (kan Member zahawmtakina a hriat duh ang hi) tunah hian kan sawi zung zung thei mai lova. Kan Session chhung hian kan Member zahawmtak takte Mizorama kan PTR hi rawn pek ka tum ang e.

Tin, kan Member zahawmtak Pu Lalduhoma zawhna chhanna chu hetiang hi a ni. “College lamah pawh hian hlawh hi an indaih lo ve tho a ni lo maw?” tih kha a dik a. Kan hriat theuh angin College lam hi an hlawh hi UGC Norm kan ‘adopt’ tawh avang hian an hlawh hi a sang ta a. Hemi hi hlawh sanga kan inpek hianin State sorkar, keini chauh pawh nilovin, State dang tam tak pawh hian an lo tlin lo ve tho mai a. Chuvang chuan Budget estimate a kan pawisa kan lo buatsaih dan hian a tlin ta thin lova, tin, tlin tur pawn han ti dawn ila Planning lam atangte leh Finance lam atangte hian kumtin a increase-na tur Norm hi min lo neih sak vek a, chutiang angin a hma khanin khung leng thei kan nih loh avang khan College-ah te hian hlawh la hleithei lova an awm te leh arear la hleithei lova an awm te hi tuna kan hun tawng mek a kan awm chhoh dan a ni a.

Tin, Member zahawmtak Pu Lalduhoma’n a rawn sawi kha, hetiang hi a awm reng a, “Kumina hlawh tur nakum sum atanga lo pek lawk dan hi in tih thin dan anih reng si chuan a indaih loh kha englai pawhin a kumtluan tawh mai awm mange aw,” tih kha, a chhanna chu, hlawh hi chu kan pek phawt mai loh chuan nupui fanau chawm nan an hman si avang hian pek phawt dan hi kan Chief Minister te, kan Finance Minister ten min han zawn pui zel a. A chang chuan Department thenkhatte Plan sum kan pawh then te pawh hi a awm thin a ni. Rural Development hnuaia mi, rangva leina tur te kan han pawt then thul a, a department enkawltu tan chuan inthlahrun te pawh a na thei hle a. Mahse a tih loh theih lova, mi kan chhawr duh anih chuanin an hlawh kan pek a ngai a, hlawh hi kan pek ngei ngei tur anih avang hianin hlawh anih tho tho chuan kumina kan pek tura hi nakum atanga kan puk lawk mai pawh hi rem siamtu ten, Finance lam mi te’n min remsiam sak thei anih chuanin keini chuan ti lo thei lo dinhmuna kan din thin avangin chutiang ang chuan hlawh hi kan inpe hram hram a. Hei hi a awm reng loh nan kan Chief Minister leh kan sorkar hian theih tawpin hma an la mek a ni tih kha ka chhan theih tawk ni mai se. Ka lawm e.



**S P E A K E R** : Zawhna dangah kan kal leh anga, Starred Question No.2-na zawt turin Pu R.L Pianmawia, member zahawmtak ilo sawm ang.

**Pu R.L PIANMAWIA** : Pu Speaker, Starred Question No. 2-na Health Minister zahawm tak chhan atan :-

- a) Mizoramah doctor awm lohna PHC/CHC engzatnge awm?
- b) PHC/CHC-ah Doctor awm tur zat awm loh vanga harsatna sutkian tum a ni em? tih a ni e.

**S P E A K E R** : A chhang turin kan Minister zahawmtak Pu Lalrinliana Sailo ilo sawm ang.

**Pu LALRINLIANA SAILO, MINISTER** : Pu Speaker, Member zahawm tak Pu R.L. Pianmawia zawhna chhanna chu- CHC sawmpahnih kan enkawlah hianin Doctor awm lohna an awm rih lova. PHC sawmnga leh pasarih kan enkawl mekah hianin Doctor awm lohna sawm leh pahnih kan nei a. Chungte chu Kanhmunah te, Phuraah te, Barapansuri-ah te, Chawhkhannah te, Bualpuiah te, Sangauah te, Khawlailungah te, South Vanlaiphaiah te, Bungzungah te, Mimbungah te a ni e.

Tin, PHC leh CHC-ah doctor awm tur awm lohna hi kan harsatna anih miau avangin sorkarin doctor awm turin hma a la mek e.

\*Speech not corrected.

**S P E A K E R** : Awle, zawhbelhna Pu R.L. Pianmawia dawtah Pu John Siamkunga ilo sawm ang. A dang chu la belh lo mai ang Pu Lalduhoma chuan a phar naa min lo ngaidam mai teh se.

**Pu R. L. PIANMAWIA** : Pu Speaker, ka lawm e. Ka zawh belhna chu April 2012 chhung hian Darlawnah Doctor pakhat a awm a, C.H.C. Sakawrdaiah pakhat a awm a, hemi avang hian kan harsa em em a, April 2012 chhung hian a dang min pekbelh thei angem? A chhan chu Darlawn leh Sakawrdai PHC-ah hian Doctor pakhat ve ve an awm a, Aizawl lamah training-in an kal tir reng mai si a, kan bial mipuite chuan Doctor training ngai tawh lo khawpa thiam awm reng thei tur min pe rawh tih chu sorkara an dilna a ni a, chuvang chuan April, 2012 chhung hian min pe thei hram ang em? tih a ni a.

Tin, a pahnihna chu, Ratu leh Darlawnah Damdawi In building thar engtikah nge min sak sak ang? tih a ni e.

**Pu JOHN SIAMKUNGA** : Pu Speaker, ka lawm e. Hei ka bial S.Vanlaiphaiah khian Doctor awm lohna hi a rei ta viau a. Chutih rualin a bul lawk Sangauah a lo awm lo bawk nen. S.Vanlaiphai Damdawi In khi khaw ruk laiin an ring a. Natnate a tlem phah chuang si lova. An han pan ve theih mai tur Sangauah a awm lo bawk nen. Chuvangin S.Vanlaiphaiah hian a theih anga rangin min dah sak theih ang em?

Tuipuiralte anih avang khian Damdawi In pan zung zungte a lo har a, a khaw tlanu, damdawi In ringte an tam si a. A theih anga ranga min dah sak turin Minister kha ka han ngen a. Min dah sak thei angem tih kha ka'n zawt a ni.

**S P E A K E R** : Helai hi in bial theuhah pawh in tawk vekin ka ring a. Chuvangin Minister khan 52-ah hian 17 kan dah thei chauh a ti a. C.H.C. ah Doctor awm lohna a awm lo, a ti a, P.H.C-ah hianin 12-ah Doctor an nei lo bawk a, a khua te kha arawn sawi bawk a. Kha kha zau deuh hlekin, member zawng zawngte pawh khan in zawt duh vek ang, in bialah in harsa vek a ni. Chungah pawh chuan hmalakna sawi theih theih han sawi vek teh se. Minister zahawmtak ilo ko ang.

**Pu LALRINLIANA SAILO, MINISTER** : Pu Speaker, a lawmawm hle mai, Doctor te hi kan mamawh theuh a, thingtlang mai nilovin, khawpuiah pawh kan mamawh a. Tuna member zahawm tak Pu Piana, zawhna neitu zawhna kha a dik khawp mai a, hei kan hriat angin, C.H.C. ah hianin Union Public Health Norms-ah hi chuanin, Standard Norms-ah hianin a nilo berah Specialist 5 an awm tur a ni a. Naupang Speicalist te, tin, Medicine te, Gynea an tih hmeichhe lampang te, tin, a zaitute. Mahse, 12 kan enkawlah hian pakhatmah specialist kan dah thei lo a nih hi. Specialist hi a mihring pawh hian kan daih lo hrim hrim a. Tin, tuna kan sawi ang khanin 57 ah hian Doctor P.H.C. 12-ah kan dah thei lova. Tin, chumai nilovin, khawi hmunah mah hianin a Central Norms hi kan pha lo hrim hrim a, a Staff field lamah pawh hian. Hei entirnan, IV Grade-ah pawh bial tinin an rawn sawi a, pakhat hi pathumin an veng tur a ni a. Entirnan Civil Hospital hi 300 bedded a lo ni a, IV Grade hi 600 vel awm tur a ni. Tunah hian 100 vel kan nei a, khatiang khanin engahmah hian kan pha lova. Tin, Doctor bial kan sawi ang khanin kan pha lo hrim hrim mai a. Chuvangin sorkarin kan indaih lohna te hriain hma an han la a. Kan Chief Minister zahawm takin hmannah Doctor 82 a thar post create ni lovin pension leh thi tawh te, tin, mahni duhthu renga bangte pawh an awm bawk a. Chung kan post chu 82 kan duh lova, 82 nilovin tunah hian kan hma lawk March ni 31-ah hian 3 an pension leh dawn a, chunen phei chuan 90 chiah chiah post ruak kan nei dawn a ni. Tichuan 82 hi kan indil a, kan Chief Minister zahawm takin min phalsak a, tunah hian DP&AR in hma an la mek a, tiang chuanin hma kan la mek a ni. A hrehawm kan ti ve khawp mai, he harsatna hi sawi leh sawi hnu a Doctor hrim hrimin min daih lova Mizoramah hian, tin, chutah private clinic/private hospital a lo awm ve bawk nen. Chungah te chuan thawh a lo nuam zawkin pawisa an lo pe tam thei zawk bawk si a, a harsa hle mai a. Mahse National Rural Health Mission atangin tunah pawh hian Doctor 6 vel lak theihna chu kan nei a. Amaherawh chu Doctor kan han la a, kan Member zahawmtakte pawh an khawngaih thlak khawp mai ti mai ang, an hrehawm tihna leh an bial an hmangaihna te, bial mipui an ngaihtuahna te hi an zahawm kan tih rualin Doctor kan han la a, kan hriat lohvin an lo bang leh thin, hetah private-ah an lut leh thin. Chumai nilovin P.G te an zir thin bawk a chung chu a ni.

Tin Pu Speaker, Member zahawm tak Pu Piana'n a sawi kha training ngai tawhlo atih kha awm ang tak mai a ni a. Amawherawhchu, Doctor hian training hi an mamawh em em mai a ni. Thil thar a lo chhuak a, khawl thar alo chhuak a, technique thar alo chhuak a, damdawi thar alo chhuak a, policy thar alo chhuak a, tiang chuanin training hi a tul em em a, amaherawhchu, an training emaw, leave an lakin emaw tah chuan chumite hmunah chuan chu mi aiah hetah a hnai ber ADA ah Champhai District anih chuan District Hospital chhunga mite emaw kha hmui turin kan dah thin a, tiang chuanin fel takin kan ti a.

Amaherawhchu, indaihlohna hi a hrehawm khawp mai, DP&AR te, kan Chief Minister, kan Finance Minister zahawmtakte pawhin min hriatthiampui a hei hi chu kan ti thuaiin kan ring a ni. Tin South Vanlaiphai leh Darlawnah khan tuna kan hmabak mek avang khan April thla emaw May thla emaw kan sawi thei lova, arang thei ang berin rawn dah kan tum ang e. Ka lawm e.

\*Speech not corrected.

**S P E A K E R** : A lawmawm e. Amaherawhchu, kan hotute kha thingtlangah Doctor te chu an han nei ve ngei a, mahse engemaw thulhah hmunpui pan ru an ti zel ni te pawn ka lo hria a , an theitawp han chhuah ve ik lo te pawn ka hria a, khatiang anih kha chuan Doctor-te pawh kha in hrilh ngun deuh a, tlawmngaih chhuah a Mizo tlawmngaihna hrim hrim pawha theih tawp chhuah deuh tura in hrilh chu a tha awm mange, te ka lo ti ve mai mai a. A lawmawm e, hmalak tumna Minister-in a nei ruh hle a, a thlamuan thlak. Tunah starred question No. 3-na zawt turin Member zahawmtak Pu P.P Thawla ilo sawm ang.

**Pu P.P THAWLA** : Pu Speaker ka lawm e. Disaster Management & Rehabilitation Department enkawltu Minister Zahawmtak chhan atan star question No.3-na chu

(a) Kum 2011 leh 2012 chhung hian Silpauline lei nan pawisa engzatnge hman ral a nih ?

(b) Dt 1.2.2012 zana Saiha Bazar kang tanpui nan Silpauline engzatnge pek an nih ? tih a ni e.

**S P E A K E R** : A enkawltu Minister zahawm tak Pu Nihar Kanti chhang turin ilo sawm ang.

**Pu NIHAR KANTI, MINISTER** : Pu Speaker, Member zahawm tak Pu P.P Thawla zawhna chhanna chu hetiang a ni e. (a) Kum 2011 – 2012 chhung hian Silpauline lei nan Rs. 2,93,41,074/- hman ral a ni . Pahnihna chu Silpauline za (100) pek a ni.

**S P E A K E R** : Zawhbelhna Pu P.P Thawla ilo sawm ang.

**Pu P. P THAWLA** : Pu Speaker, hei thlipui/to tleh hun lai te a ni tawh a , Session hun chhungah te hian MLA hote hian Silpauline kan dawng leh thei ang em ? tih ka zawh belh e.

**S P E A K E R** : A chhang turin kan Minister zahawm tak i lo sawm ang.

**Pu NIHAR KANTI, MINISTER** : Pu Speaker, ka lo ngaihtuah dawn nia.

**S P E A K E R** : A lawmawm e. Awle tunah Starred Question No. 4-na zawt turin member zahawmtak Pu Lalduhoma i lo ko ang.

**Pu LALDUHOMA** : Pu Speaker, PHE changtu Minister zahawm tak chhan atana ka zawhna te chu - Tuivamit a handpump-te khu engtia rei nge a chhiat tawh, engtikahnge siamthat anih ang? Central Jail Venga handpump dah tum kha engtikah nge tihpuitlin anih ang? tih te a ni e ka zawhna chu.  
Speech not corrected.

**S P E A K E R** : Chhang turin a changtu Minister zahawm tak Pu S. Hiato lo ko ang.

**Pu S. HIATO, MINISTER:** Member zahawm tak Pu Lalduhoma chhanna chu handpump chhiat thu PHE Deptt. in kan dawng lo. Engtikahnge siamthat anih ang tih kha chu - a chhia anih chuan a rang thei ang berin siamthat a ni ang. Central Jail Vengah chuan tun dinhmunah chuan Handpump dah tumna a awm lo tih ka chhanna a ni a.

Tin, Tuivamit Handpump hi December 2010 ah khan a chhia repair tawh a ni a. Chumi hnuah chuan a chhia report kan la dawng lo a ni tih kan sawibelh duh a ni e.

**S P E A K E R** : Zawhbelhna, Pu Lalduhoma .

**Pu LALDUHOMA** : Pu Speaker, kan Minister zahawm tak kha a department-in information an pe tha tawk lo a nih te ka'n ring a. Tuivamit Handpump chhia hi a Local Council-te leh kei ngei pawhin kan sawi zing tawh lutuk, kan report zing tawh lutuk a ni. Handpump pakhat chhia pawh siam tura innawr innawr hi chu a ni bik lo a ni. A chhiat thu kan hre lo tia min rawn chhang lehngal phei kha chu a hrehawm ka ti khawp mai. Chuvangin hei hi a chhia a, mipui tan a tangkai em em a, a rang thei ang bera min siamthat sak turin kan ngen nawn leh duh a.

Tin, Central Jail Vengah hian Handpump dah tumna hi a awm chianguang khawp mai a, an lokal a, investigation-te, survey-te an ti a, keipawhin lehkha vawi duai lo ka ziak tawh a, an ti mai dawn emaw kan ti a, an ti leh thin silova. Tah hian kan dah dawn lo tiin beisei bovin min siam law law sela kan ngawi mai tur a ni a. An rawn endik a, an ti ve chiam bawk si a, a tak hmuh tur tun thlengin a awm thei bawk silova, hei pawh hi a rang thei ang berin min chhuizui sak turin ka'n ngen duh a.

Tin, Sairang Greater Water Supply Scheme hi hmana thehluk tawh a ni a, hei term a tawp thei mai dawn! Engtikahnge khu khu tihpuitlin anih ang, tunah hian DoNER-ah a awm tawh nia hriatna te kan nei a, eng stage nge anih a, engtikahnge a hnathawh hi kan beisei theih ang tihte ka zawt duh bawk a ni.  
Speech not corrected.

**S P E A K E R** : A chhang turin Minister i lo ko ang.

**Pu S. HIATO, MINISTER** : Pu Speaker, Tuivamit hi report kan dawng sual anih chuan kan lo en nghal anga kan repair nghal ang tih kha ka sawi tawh a. Tin, Central Jail Veng pawh hi ni a, an en tawh thin a, tunah pawh hian tih tumna chu a awm a, tunah mai hian kan la tih theih loh avanga khatianga chhanna pe kha ka ni.

Tin, Sairang kha DoNER-ah min passed sak tawh a, tun thla ni 31 hma hi chuan sanction 2.3 crore kan hmuh ka inbeisei a, chu chu dawng tawh tlukah ka inngai. Chutiang chuan hna kan tan thuai ang tih ka'n hrilh duh a ni e.

\*Speech not corrected.

**S P E A K E R** : Starred Question No. 5-naah kan kal anga, hei hi Dr. R.Lalthangliana zawhna a ni a, mahse pawimawh thilah Buarpuiah a kal a, tichuan, a zawh ai zawt turin Pu B. Lalthlengliana a authorized a, ka pawm sak a. Tunah Dr. R. Lalthangliana zawhna starred question No. 5-na zawt turin Pu B.Lalthlengliana i lo ko ang.

**Pu B. LALTHLENGLIANA** : Pu Speaker, Dr. R. Lalthangliana zawhna starred question no. 5-na, Health & Family Welfare Deptt. Minister zahawmtak chhan atan – Health Department hnuaiiah hian 3-F Regulation hmanga lak Doctors engzatnge awm? Dah ngeh tumna sorkarin a nei em?

**Pu LALRINLIANA SAILO, MINISTER** : Pu Speaker, Starred question 5-na. Health Department hnuaiiah 3-F Regulation hmanga lak Doctors 66 an awm a. 3 F Regulation hmanga doctor lakte dah ngeh tumna sorkarin a nei rih lo. Amaherawhchu, tunah hian doctor post ruak 82 te MHS Rules, 2009 anga lak tura kalpui mek a ni. Speech not corrected.

**S P E A K E R** : Zawhbelhna a awm thei lova, zawhna no.6na zawt turin Pu K. Liantlinga ilo sawm ang.

**Pu K.LIANTLINGA** : Pu Speaker ka lawm e. Pu Lalthansanga zawhna PWD Minister zahawm tak chhan atan a zawhna chu hei hi a ni e.

- a) Biate to Artahkawn kawng siamna tur pawisa hi engzatnge dah a nih ?
- b) A hna hi eng huna thaw zawh turin nge pawisa hi sanction anih ?
- c) Tuna pawisa awm sa hi thawh zawh theih a ni dawn em ?
- d) A pawisa hi khawi atangin nge hmuh anih ?

\*Speech not corrected.

**Pu LAL THANHAWLA, CHIEF MINISTER** : Pu Speaker, Pu Lalthansanga zawhna chhanna :-

- a) Biate to Artahkawn kawng siamna tur pawisa hi Rs.392.62 lakhs dah a ni.
- b) Sanction ang chuan a hna hi kum hnih chhunga zawh hman tur a ni.
- c) Ni lovang.
- d) A pawisa hi Central Road Fund (CRF) Ministry of Road Transport & Highways (MORT & H) Government of India atanga hmuh a ni.

Tin, a zawttu member zahawm tak hi damlohna avangin a lokal thei lova, hei a hriat belh duh takin tiin ka rawn inring a. Biate to Artahkawn siamna tur estimate hi 2008 rate a siam a ni a. A sanction hi sawi tawh angin Ministry of Road Transport & Highways, Govt. of India-in a rawn pe a, 2010-ah State Government-in approval a pe ve leh a ni. 2010-2011 atanga tan a ni chauhva, hemi kum hian engemaw chen thawh hman a ni. Amaherawhchu, fund release mumal loh avangin thawh zawh hman a ni lova, tunah hian thawh chhunzawm mek a ni. Sanction tun dinhmunah chuan a workable tawh lova, hei vang hian estimate sanction ang diak diak chuan thawh zawh theih a ni lovang. A thawhna tur hian March 2011 thleng khan nuai 220 hman ral a ni tawh a. Kumin 2011-2012 hian nuai 127.02 hman tura ruahman a ni, Pu Speaker.

**S P E A K E R** : Kan zawhna hun a lo tawp a, Pu Hmingdailovan a zawt hmanlo chiah a ni. Tichuan, kan dana ziaik lan lem loh tih tur hi a lo awm ve thin a, Member-te hian pawimawh kan ti si thin a, Pu R.L.Pianmawia, Member zahawmtak hnen atangin special mention hman dilna ka dawnga, hei hi dana awmlo a nih avangin List of Business-ah khan a awm lova, amaherawhchu, ka phalsak a, tunah, Pu R.L.Pianmawia special mention hmang turin i lo sawm ang, hei hi engtinmah sawi zui theih a ni lovang, a sawi tawp anga, a dangah kan kal leh ang .

**Pu R.L. PIANMAWIA** : Pu Speaker, special motion sawina hun min pek avangin ka lawm e, a tawi zawk theih nan, a chhiara chhiar min phalsak mai la. Dt.3.3.2012 Inrinni hian Aizawl atanga Vaitin kal Bus MZ-01 G 9038 chu dar 12:40 velah Darlawn atanga Km chanve velah vanduaithlak takin kawng thlangah tlan liamin a chesual palh hlauh mai a, Bus a chuangte hi mi 39 an ni a, mi chuangte hi Bus hian kawng thlangah lehthlak puiin Pu Zonunsanga Darlawn lo luah vawrh chhuakin nasa takin chhiatna hi a lo thleng a. Mi chuangte zingah mi 16 te chuan nunna an chan phah a ni. Midang 23 te chu Darlawn Damdawi Inah dah luh niin a hnuah nazual bik mi 17 te chu Civil Hospital Aizawlah dah luh an ni. A bak mi paruk te chu first aid tih hnuah an khawlamah hawn tir an ni a. Heng zinga mi thenkhatte hi chhungte zui tur an awm mai loh avanga Civil Hospital pan pui loh an ni, chhiat tawhnaah hian Medical Officer, Darlawn, Sakawrdai leh Khawruhliante chuan theihtawp an chhuah nghal vek a, anni bakah hian First Battalian MAP Doctorte leh CMO Office Aizawl atangin Doctor pawh rangtakin an rawn thleng ve nghal bawk a ni. Chhiat tawh thu hriat ve leh Darlawn Mipui leh khaw hrang hranga mi tlawmngaitte, Darlawn Police, Sakawrdai Police leh New Vervek Police ten rangtakin chhanchhuahna hna hi an thawk nghal a ni. Mizoram Sorkara kan Chief Minister zahawmtak Pu Lal Thanhawla hmalaknain kan Minister zahawmtakte, Pu P.C.Zoram Sangliana, Pu H. Rohluna, Pu Lalrobiaka MLA-te leh D.C.Aizawl leh S.P. Aizawl te rang takin Darlawn an rawn thleng chho nghal bawk a. Anni bakah hian Official hrang hrangten he vanduaina hmun hi an rawn

thleng ve nghal a ni. Ka bial chhunga chhiatna thleng hi bial chhung mai bakah Zoram Mipui zawng zawngten min tuarpui em em a, Civil Hospital Aizawl pawh kan Health Minister zahawmtak Pu Lalrinliana Sailo hovin a tul ang zawng zawng lo buatsaihin hma an lo la nghal a, hliam tuarte senso pawh a hlim chhawn ami an lo tumsak vek bawh a ni. Tin, chetsual zan la lain Transport Secretary Pu H.Darzika pawh mipui thlamuan turin Sakawrdai leh Vaitin te thleng nghalin a tul angin hma min laksak nghal vat a, kan chhiat tawhnaah hian Home Department, Health Deptt., leh ZDU atangin Ambulance pawh rang taka tirh nghal an ni bawh a. Vanduaina tawkte hi Central YMA, Darlawn Salvation Army leh Chalfilh group YMA te chuan pawisain an tanpui nghal bawh a ni. Mizoram Sorkar chuan vanduaina tawkte, leh Darlawn Joint YMA te tanpuina a pek bakah tanpuina hmahruai atan mitthi te, cheng singnga leh hliamte cheng singnih sangngain an pui nghal bawh a. He accident hi Mizoram Sorkar chuan a ngaipawimawh hle a, kan Chief Minister zahawmtakin Ministerial enquiry din turin thu a pe nghal a, hei pawh hi tih nghal a ni a, kan lawm hle a.

Hemi chungchanga ka sawi belh duh chu, rilru tina zual em em bik a awm a, Vaitina Pi Lalsawmliani thi ta hi a fapa Lalremruata hian Aizawlah a koh thlak a ni a, Lalremruata hi kum 18 mi a ni a, an chhungkua an harsat avangin T.V. man tur inhlawh turin a chhuak a, hun reitak a thangbo hnuah T.V. man tur hi a tuak ngah a, a nu hi a chah thla a, Aizawlah chuan T.V. an lei ta a. A nu nen hian an phur chho ta a, Khawruhlian an thlenin Vaitina an chhungte hnenah hei T.V. thar kan rawn hawn e, tiin an hrilh a, vanduaina an tawh ta si a, T.V. pawh hi accident-naah a chhe ta a, hei hian rilru a khawih em em tih ka'n sawilang tel duh a. Hliam tuarte hi enkawl zui an mamawh em em a, damdawi in pan pui lo va Vaitina an haw thlakpui takte pawh hi a hmunah ka va tlawh kual vek a, mitthite ral pahin an dinhmun a la chhe em em a ni tih ka'n sawi lang tel duh a. Tin, Ratu ami pawh tha deuha an chhuah kha che hlei thei loin tun thlengin a la awm a ni tih ka'n sawi lang tel duh a. An dinhmun hi hriatzui pui zel turin Assembly leh Mizoram mipuite ka ngen a ni e. Ka Lawm e.

**S P E A K E R** : Thupuan turte han puang ila, Hei Pannel of Chairman kan dan No. 10-nain thuneihna min pek ang khan Pannel of Chairman-ah heng Lt. Col. Z.S. Zuala, Pu Hmingdailova khiangte, Pu P.P. Thawla, Pu Lalthansanga te ruat an ni e.

Tin, kan Resolution hi Sawrkarah hian an rawn tiphei a, anni hian action an lo lak dan hi thlaruk chhung emawin min rawn hriattir leh kan beisei thin a, tichuan Official Resolution ni 13.12.2011-a House in kan pawm 'Transplantation of Human Organs Act, 1994' chungchangah khan Sorkarin action a lak dan rang takin min rawn hriattir a, chu chu House ka'n hriattir che u a. Resolution House-in kan pawm tawh chungchanga hmalakna hi kan dan 137-nain a phut angin House hriattir zel tur a ni a. Sawrkar lam hian hei hi tuna Health Deptt-in an rawn tih ang hian Deptt dangte pawhin an rawn tih zel kan beisei a ni.

Vawiinah hian kan member-te Pu Lalthansanga dam lohna avangin a lokal thei lova. Dr. R Lalthangliana hi Buarpuiah, Lunglei lam YMA Sub-Headquarter ho khawmpuiah nizan lamah thusawina hunte a hman a tul a, chawhnu lamah hian a rawn thu ve hman angemaw, chung chu kan member lokal thei lo te an ni.

Tunah chuan presentation of report-ah kan lo lut ang a, Business Advisory Committee (BAC) ni 28 February-a thutkhawm khan tuna kan session tur chungchangah hetiang hian programme han duan kha a ni a, provisional calendar-a duan kha a ni a. Bulletin Part II no. 183 ni 29.2.2012 khan kan inhriattir tawh a, hei

hi House-ah ka rawn present a, chhiar chhuak lo mai ilangin kan hre theuh tawh thovin a lang a. A copy kha han sem rawh ule.

Kan pawm thei em? Khami calendar kha. Kan pawm thei a a lawmawm e. Amaherawhchu, heti laiah hian ni 28 thleng tur khan kan committee chuan kan han duang a, mahse tuna sorkar Government Business awm tur, lo lut tur hemi kan duan laia Bill emaw lo lut tura beisei kha nimin thleng khan pakhat chiaah a lo la lut a, chuti a nih si chuan member-te hian ni 4 tal kan Dan anga in lo kawl loh chuan House-ah sawiho theih a ni lo a ni. Chuvangchuan, ni 28 kan han duan pawh hi thlen a tul lo mai thei kan business neih angin, tih pawh kha House kha kan han hriattir lawk duh che u a ni. Bill pakhat chauh a lo la lut a ni. Chuvangin, Bill lut turte a awm anih chuan khati lam buaipui khanin vawiinah in rawn tihluh kan beisei.

Tunah chuan kan tih tur dangah kan lo kal leh ang a, Governor thusawi chungchanga lawmthu sawina Motion of thanks kha kan hmu a, niminah House-ah move tawh a ni a, vawiinah chuan kan sawiho dawn a, kan dan 22-nain a phal angin member tinin minute 5 theuh hun han inpe leh ta mai ilang a tha mai em?

**Pu LALDUHOMA** : Pu Speaker, Amendment Bill tlar hnih khat lek angah hi chuan minute 5-ah te pawh hian kan nam liam thei mai a. Hei hi Sorkar Department pumpui hnathawh sawina tur a ni a, hetiang atan hian minute 5 han tih leh ngawt thin hi chu a ni lo deuhin ka va hre em.

**S P E A K E R** : Dar 4-ah kan ban kha a tul bawk si a. Minute 7 kan ti mai dawn em ni?

**Pu LALDUHOMA** : Hei hi chu thil puitling ang kha a ni a, Amendment Bill satliah ang mai mai kha a ni lova.

**S P E A K E R** : Minute 10 maw, anih minute 10 ti ila, dar 4-a kan peih hman theih dan ngei turin minute 10 hmangtu kha kan tlem a tul a nia nge. Tunge sawihona han tan dawn le, hetilalah hian Motion neitu kha kan han sawm phawt ang a, tichuan, lawmthu sawina kha han sawi char char teh se, Pu R. Selthuama i lo sawm ang.

**Pu R. SELTHUAMA** : Pu Speaker, ka lawm e. Kan Governor thusawi hi a ropui a, a tha a, han en chet chet pawh hianin a lawmawm hle mai a, chanchintha panganaah te pawh hian telh ve mai atan a tha lawm maw ni le ka'n ti deuh rum rum nghe nghe a ni. A thusawi hmasaka han lang 'mipuite aiawha thlante leh Sorkar rorel khawlte mipuiin beiseina sang tak an neih lai hunah kan cheng a, chuvang chuan theihtawpa mipuite than nan leh ram than nana tha kan thawh a tul a. Tin, a bik takin mi rethei leh mi harsate tan pawha kan tih hi a tul a ni', a han ti chhuak te hi a ropui a, a Pathian thu thlup mai a, thil dang pawh sawi tawh lovin hei ngawt pawh hi sawi sela lawmna tham a niin ka hria a, chuvang chuan, a lawmawm ka ti khawp a ni.



Tin, kan Sorkar hi Sorkar tha leh Sorkar felfai, langtlang, thianghlim, corruption pawh awm lo, corruption pawh do ngam Sorkar a ni dawn a ni tih an sawi te, chutiang atana Sorkar inpe/inhlan tawp mai a ni tih a han sawi ringawt mai atang pawh hianin mipui mimir tan hian a thlamuan thlak a, a lawmawm em em mai a. Tute tihdan takah emaw 'Lungngaite u lawm ru, in tan ropuina ni chu a hnai ta e' tih hla han sak khum nghal mai te pawh a chakawm rum rumin ka hria a ni. Chuvang chuan, a bul te an tan atang ringawt pawh hian kan Sorkar kalphung hi a tha tawk a, a felfai a, chuvangin, Governor thusawiah hian lawmthu sawi hi kan ba tlang a ni tih kha ka'n sawi hmasa duh a.

Tichuan, a point-ah hian han lut ila. Tunhnaia VC inthlannate leh Local Council inthlannaah mipui 76% te leh LC inthlanna bikah 68% lai maiin vote an thlakte pawh kha democracy kan hlut zia leh a ropui zia tilangtu, kan State timawitu a ni a. Tin, chumai bakah chuan State dang tam takah chuan inthlan laiin buaina an siam a, ballot box hialte pawh an chhuhsak a. Chutiang angte anih laiin kan ramah chuan chutiang ang sawi tur awm lova felfai tak maia kan inthlangte kha a ropui a, a lawmawm tak tak a ni. State dangte tan pawh entawn tlak kan ni tih kha a chiang a ni.

Tichuan, a dawt lelah chuan, Mizoram Sorkar pawhin flagship programme-a a neih NLUP an sawi leh a. Hei hi a pawimawh em em mai a, sawi tham a tling a. Amaherawhchu, helaiah hian tlema han sawisel hret duh ka neih chu a buaisaihtu GAD lamte hian a figure an lo pek hi a fuh tawk lova, keimahni a Department lam, a khawihtute hnen atanga information la lovin, an hriat ang ang kha an lo pe mai a. Chuvang chuan, a figure-te hi a uptodate lo deuhva, chu chu a paw ka ti a, hei hi ka'n sawi chhuak ve hram hram duh a. Hun lo kal leh tur angah te chuan Department pawh hian nisela, GAD ten Department tinah Governor thusawi tur kha min dil a, tichuan annin an lo la khawm a, tichuan an lo siam leh thin a ni a. Tun hnuah chuan a nihna ang tak up-to-date figure dik hi a awm theih nan a Department-ah minrawn dil tawh thin sela a lawmawm ngawtin ka ring. A bik takin Mizoram sorkarin New Land Use Policy a han tichhuak hi mipui an lawm em em mai a.

Tun hnai teah khan Auto-rickshaw pawh 21 zet mai a sem chhuak a, khang te kha a dawngtute kha an lawm em em mai a, an han khalh chhuak a, an khua an thleng a, an service zui lehngal a, tichuan an chhungkaw eizawna tur kha an han hmu nghal thei mai te pawh kha mi harsate tan chuan a lawmawm zia chu. Tunah hian Mizoram pumpuiah mi 69 in Auto-rickshaw an dawng a, chutiang anga dawngtu chuan anmahni chhungkua an enkawl thei tawh a. A hma chuan Auto-rickshaw te chu loan lo chuan lak theih a ni si lova, mahse loan ni lovin Rs.1,10,000 zet sengin sorkarin an lei sak a, chutianga eizawna an han nei ta te chu an awhawm a, an lawm em em mai a ni.

Tin, tun hnaiah Bawng chi tha Haryana atangin Vety Department-in bawng lian an chah thleng a, chungte chu kan sorkarin an sem a, bawng 46 lai. Chutih laiin nimin chanchinbuah phei kha chuan lawm lo deuhawm angte khan an han sawi a; amaherawhchu, han hriatchianin nizan T.V ah te pawh khan in lo en ang a, a dawngtute khan a that zia leh keini chuan, keimahni chuan bawng lian leina tur pawisa pawh kan nei lova, mahse sorkarin loan pawh ni lo, pek leh pawh ngai lova hetiangam min han leisak hi chu kan lawm takzet zet a, kan theih tawpa thain kan

chawm ang a, hetiang hian kan intipuitling chho dawn a ni. Tunah phei chuan a bawng hian chaw an nghei rei tawh a, duh ang tawk pawh kan pe phal zawk lova, nakinah kan chawm tha zel ang a, kan chhawr tangkai dawn a ni an ti a. Heng angte pawh hi sorkar hmasa, congress sorkar hmasa laiah khan NLUP hnuaiiah bawng lian thlang te chuan Sihphir khuaah te pawh an tihlawhtling a, 407 te pawh an lei thei tawh nghe nghe a. Chuvang chuan chhungkua thahnem tawk tak maiin bawng lian vulh an han thlang te pawh hi Mizoram sorkar hian hma a sawn phah dawn a ni. Tin, a bik takin central atanga Planning Commission-a Adviser lokal te pawhin an han thlir hian, Mizoram hmun hrang hrang an han tlawh a, he NLUP policy avang hian Mizoram economy hi a danglam daih dawn a ni tih kha an han sawi nghe nghe a ni. Tin, tunah hian chhungkua 45,139 puih mek an ni a, chung ang zawng zawng chuan hlawhtling taka an rawn tih chhoh chuan Mizoram hmel te pawh hi a dang thei dawn a. Amaherawhchu, kan hriat theuh angin mirethei leh miharsate chawikanna programme a nih avangin ropui taka hausak pui thur thur tur chu a ni lo, mahse din chhuahna tham a ni tih kha han sawi ila a tha awm e. Pu Speaker, hun kha ka nei tam thei deuh em?

**S P E A K E R** : Minute 10 chhung ila hmang lo hrim hrim a lawm.

**Pu R. SELTHUAMA** : Awle, hemi NLUP ringawt pawh hi sawi dawn ila minute 10 khan a daih loh zawk dawn avang khan a nia ka'n zawh hram hram nachhan che chu ni. Amaherawhchu, a vaia sawi deuh a tul dawn chuan ka kal thui lo deuh mai ang a. Engpawh nisela, hei kan NLUP Apex Board pawhin kum thar lehah hi chuan chhungkua 45,000 lai lak leh tur, tanpui leh turin ruahmanna te pawh a siam tawh a. Chuvang chuan hetiang kan kal chhoh chuan Mizoram hmel hi he NLUP hmang hian alo danglam thei dawna, mirethei leh mi harsa leh chhumchhiate chuan khaweng an hmu thei ve dawn a ni. Chuvang chuan helaia Member zawng zawngte pawh hian kan bial theuhah te hian NLUP dawngtute , an dawna Sorkarin a pekna ang rilru ngeia tihlawhtling thei tur hianin kan bial kan fante pawh hian ngen ta ila, chuti chuan kan ramte hi alo nuam anga, a chhunga chengte kan khawsak alo san chuan kan ram pawh hi alo nuam dawn a ni. Chutiang ang tur chuan vawiinah pawh hian ka'n ngen nghal duh a ni. Chulam chu ka sawi thui tawh lo mai ang.

Remna leh muanna kan vawng him tha hi a chhuanawm a ni a ti a. Mipuite hlimna han siam sak hi sorkarin a thil tum ber pakhat a ni a, chutiang chuan tuna kan sorkar hian hma ala ta a. Kum kalta chhung pawh khan buaina lian tham a awm lova, hetiang anga India ram pumpuiaah pawh, entawn tlak remna leh muanna kan han nei thei hi a ropui a; hei hi kan sorkarin hma a lakna anih bakah NGO te leh Kohhran hrang hrangte tanpuina avanga hengte pawh hi nei thei kan ni a, remna leh muanna kan neih theih rengna tur hian mitinin tan kan lak a tul a ni. Chubakah chuan sorkar tha, sorkar chak, efficient si, tin, langtlang sorkar, corruption-ah pawh fihlim, chutiang nih tum sorkar, chutiang anga hma la tlut tlut mai sorkar kan han nei hi a lawmawm a ni.

Tichuan, Agriculture lamah han kal lawk ila. Ram thanna hnukpui atan chuanin lo neih, Agriculture hi a pawimawh a, chuvang chuan Mizoramah phei chuan mipui zaa sawmruk vel hi an inngat nghe nghe a. 2011- 12 ah phei hi chuan Jhum Area lo/ram nei pawh hi a hma ai pawh khan alo zim tawh zawk nghe nghe a. Hei kan Agriculture Minister zahawm takin nikumah khan buh thar tam kum atan huaisen tak maiin an puang tawp mai a, chanchinbu thenkhatah phei chuan hei hi hmalakna felfai tak leh ruahmanna felfai tak a awm lovin in puang mai em ni? tiin an ziak anih kha. Amahehrawhchu, kan

Minister-ten huaisen takin khatiang khan a han puang a. Chumi azarah chuan Mizorama buh thar chhuah pawh kha 2011-12 ah chuan matric ton 51948 alo tling ta a. Tin, henga hmalakna zel avang hian tlangram lo neih pangngai kan tih ang chi, shifting cultivation kan tih angte pawh hi alo tlem ta tial tial mai a. henge pawh hi a ropui a. Kan Minister zahawmtakte hmalakna leh a Department-ten theihtawp chhuaha an tanna zarah heng hi awm thei a ni a, chuvang chuanin lawmthu sawi hi a tul vein ka hria a.

Tin, heng bakah hian infrastructure lamah hma a la nasa a, tui lakah te, kawng te leh thlai kuitiahna nursery-te pawh nasa takin an siam a, tin, Irrigation programme hnuaiiah AIBP atangte pawhin project 49 an siam a, chungah chuan hectare 2399 lai an zo dawn a, Pu Speaker, minute 2 vel te chu khawngaihni, (SPEAKER : Awle, complete rawh nalh deuh khan). Tichuan tawi deuhin kan sawi tawh mai anga. Horticulture hnuaiiah te pawh hian hmalakna a tha a, abik takin Horticulture ah, NLUP ah te hma an la tha a, kuminah ringawt pawh hian Rs.1733 lakh NLUP atangin mite an tanpui a, henga an hmalakna chi hrang hrangte hi a tha a, chubakah chuanin lawmawm em em chu Planting material te pawh hi tunhma aiin an nei tha tawh a. Nursery tha tak tak an siam a, chungte avang chuan tunah pawh NLUP hnuaiiah pawh hian thlai tiak phun turte pawh hi Mizoram pumah hian nuai 2 vel zet an nei thei nghal tawh a ni. Tichuan avaiia han sawi zawh dawn khan hun a tlem angreng tawh si a, han sawi thiam a har khawp mai a.

Soil Department hnuaiiah te, rubber, coffee, broom-ah te pawh hian hma kan sawn a, kumina kan hmunphiah ringawt pawh hi thahnem tham tak, lawmpui awm tak, buaipui tham kan thar a ni tih ka'n sawi duh a.

Tichuan sports-ah hian kal leh zawk ila. Hei tunhnaiah, Mizoramah North East Games wawi 26-na kan thlenga. Tunhma kha chuan Mizoramini hemi North East Games tih ang hi chu thlen ngaihna a awmlo a ni. Field te pawh kan neilo a, facility kan nei lova, engmah infrastructure kan nei lova. Mahse tunah chuan thildang sawi pawh a ngai lo. Sports hian hma a sawn zia kan sawi duh chuan North East Games kan thleng ta tih ringawt hian a tilang chiang a ni.

**S P E A K E R** : Duhtawk dawn tawh lang, nakinah tlai dar 4 lamah khan i han wind-up ve anga, member-te kha an lungdum zawng tak khan leh an thin kheh zawng tak khan pass-pui tur khan i la dil dawn thova, chance i la nei dawn a ni.

**Pu R. SELTHUAMA** : Awle, tichuan anih leh sport lama kan hmasawna hrang hrang chu sawi rih lo mai ila, tuna North East Games kan thleng ringawt pawh hian hmasawna a tilang e, tihah khan duhtawk ila. Tichuan Pu Speaker, vawinahn hun tha tak min pe a, kan Governor Speech-ah lawmthu sawina motion move tura min sawm avangin i chungah ka lawm e.

**S P E A K E R** : Awle, tunge han sawi ve leh dawn le ? Minute 5 lek sawi thiam te pawh kan duh zawk mah a nia. Pu C.Ramhluna i lo sawm ang.

**Pu C. RAMHLUNA** : Awle, sawi ve mai ila, a tha awm e. Pu Speaker, ka lawm e. Kan Governor speech hi ka han chhiar thuk thuk a, zirchian pawh a chakawm viau a, mahse hun kan neilo deuha, engpawh nise hei ka sawi duh chu Department 50 chuang

Mizoram sorkarah hian kan neiin ka hria a. A sawi hi a tlem ka ti a, Department 25 vel emaw a cover chauh mai a, chuvang chuanin hei aia thui deuh hi han sawi se a tha awm mang e aw, ka ti a. Department thenkhat hetianga sawi hmaih awm hi a Department concern-te tan tlemin duhthu a sam lo deuhin ka hria a, chu chu ka'n sawi duh a. Governor hrim hrim hi personal-in ka lawmpui a, a kum a tam tawh hle na a, nimirah thusawi tha tak a rawn nei thei kha lawmawm ka ti a. A fapa thih lai khan PAC member 4 kha kan zu kal thla ve a, Inah te pawh kan zu kan ve a, alo fel viau a, In nuam tak a nei a, min lo dawng sawng tha a, mahse Mizorama kan tih thin dan anga ralna kha chu kan pe thei ta lova, amah lampangah harsatna a awm avangin kan tuarpui thu te, kan pawt tih thu te kan zu sawi ve a. Min lo dawngsawng tha a, kan lawm viau a ni.

Tin, thil ka'n sawi leh duh chu para 2-na, 'My Government is committed to providing good governance and administration which is clean, responsive, accountable and target oriented' a tih lai takah hianin pakhat han telh hlauh sela a thain ka hria a. Hei a concern viauin ka hria a, 'which is impartial, clean responsive'. Tunah hian kan sorkar hi kan hmuh dan leh kan hriat danin partiality hi a maintain deuh hlek, Party wise-in kan kal deuh emaw ni aw tih hi kan hmuh dan leh mipuitena an hmuh dan deuh a ni a. Chuvang chuan need base-a kal te pawh hi a tha lawm ni ? NLUP selection chungchangah te, IAY beneficiary selection chungchang thuah te thleng hian impartiality hi maintain-in, need base-in kal deuh ta sela tih te ka rilruah a awm a, chu chu ka rawn sawi duh bawk a. Tin, para 13-ah hian District council chungchang thu a sawina kha han sawichhuah ka duh a. District council hianin anmahniin rules an nei ve a. CCB Rules an ti mai a. Khamiah khan para 18-naah khan anmahni'n an hlauh te pawh kha an insiam ve thei a ni a. Hei a bu pawh ka nei nghe nghe a, mahse hun a tlem avangin ka chhiar chhuak lo mai anga. Mahse an rules siam erawh hi chu Governor-in a approve sak a ngai a ni a, an hlauh sanna tur hi anmahni pawhin an rawn pass ve tawh a. Chu chu Mizoram sorkarah pawh khanin an rawn submit tawh a. Vawiin thleng hian khami an hlauh sanna tur kha kan sorkar hian approval ala pe thei lo hi a pawt ka ti khawp mai a, an nghakhlel ve hle a. Kan hotute in va kal chang pawh hian theihpatawp hian an lo dawngsawng che u a, an lo enkawl ve thin che u a ni a, an neih ang angin. Chuvang chuan duhsaknate pawh lan tir ve a, an hlauh sanna tur hi a rang thei ang bera kan sorkar hian a tihhlawntlin sak hi ka'n phut ve duh a ni.

Tin, chubakah chuan District Council ho hi an function te pawh kha tihdanglam deuh hlek kha a ni a. Para 62-ah khan Autonomous District Council ho kha power lian zawka pek an ni a. Hei pawh hi 1994 khan pek a ni tawh a. Khatiang tho khan tunah hian pek leh an ni ta a. Mahse Power & Enhancement rual khan a pawisa kha an pe kim chuang si lo thin a. Chuvang chuan District Council-ah harsatna a awm thin a. Chuvang chuan hetianga a power hi kan tilian dawn a nih chuan District Council ho hi pawisa tam zawk hi kan pek a tulin ka hria a. Chu chu tukin zingah hian Pu Speaker, ka'n sawi duh a ni.

Tin, Education chungchang thu kha han sawi leh lawk ka duh a. Nichinah pawh an sawi tawh na a. Thil pahnih ka ngaihpawimawh em em a awm a. Hindi Teacher ho, tuna CSS atanga hlauh la ho hi mi 600 vel emaw an awm a ni a. Tun thleng hian, 2011 October thla atanga tun thlengin hei thla nga vel chu hlauh an la thei tawh lo a ni a. Hei hi kan Education department changtu Minister zahawm tak hianin a rang thei ang bera pek a tum thei dawn em? tih hi ka zawt a ni. Chu chu sawi chhuah tulin ka hria a ni. Hnathawktu kan ruai a, hlauh kan pe thei si lo. Hna thawk tha turin kan duh bawk si, an hmunah pawh awm hlei thei lo te an ni a. Tin, chubakah chuan an ei leh in tur ngaihtuah a ngai ve a. Thil dang leh kawng dang dap te pawh a lo tul ve a. Khamiah khan tualchhunga an hnathawhnate khan an complaint ve leh thin a. Chuvang chuan harsatna tam tak an tawk a ni. Chuvang chuan CSS atanga hlauh la mah nise, Govt. of India khu a rang thei ang bera hlauh pe thei

tura zu nawr dante pawh hi a awm lo'm ni? tih hi vawiinah hian ka han dinchhuahpui bawk a nih chu.

Tin, chubakah chuan Pu Speaker, Stipend leh Book Grant pek theih loh, tih te kha a awm a, February ni 13, 2012 ah khan Chief Secretary-in Order chhuahin 'within one week' ah Stipend leh Book Grant te pawh hi Technical student ho hi a bik takin pe tura a tih te kha an ni a. Hengte pawh hi vawiin thleng hian pek loh a ni ta em? Pek thawm hi kan la hre lova. Chuvang chuan hei hi a rang thei ang bera pek theih a ni dawn lo'm ni? tih te pawh hi ngaihtuahnaah khan a lo awm a. Kan naupang te, kan zirlaite theihpatawp chhuaha an nu leh pate pawhin Sikul hrang hrang leh line hrang hranga zir tura an buatsaih hote hi an rilru kan tihnual ang tih te a hlauhawm em em mai a. Kan ram leh hnam siamtu turte an nih avangin tunah hian Incentive tha tak pea anmahni kan ngaihtuah hi a tul lo'm ni? tih te ka rilruah a awm a. Chu chu ka'n sawi tel duh bawk a nih chu.

Tin, chubakah chuan Pu Speaker, RMSA School building sak chungchang hi sawi tulin ka hria a. Niminah khan Governor Speech-ah khan kan hmu a. Building 12 vel chu la zawh loh kha niin ka hria a. Hei hi kum kalta lam pang atanga sak tan tawh te kha a ni a. Ka bial Bungtlang South-ah hmanni khan ka va kal a. Nuai 32 senga sak kha a ni a, a contractor-te pawh dik tak chuan a guideline-ah khan Contractor te pawh hi awm lo tura tih a ni a. A Board-in a sak tura tih kha a ni a. Mahse, Sorkar kha khami guideline against khan an kal a. Tikhan Contractor kha an han appoint ta a. Bungtlangah hian Pu Laldingliana Khiangte, Bawkkawn khua hi ka'n sawi lawl lawl mai ang a, Contractor atan appoint a ni a. A building sak hi a chhe em em mai a, a rod hman hi sut hnih leh a chanve te a ni a. A chhuat hi cement plaster kha a ni ringawt a, rora pawh a tel lova. Kawngkhar leh window te chu thing a ni a, a chang nasa tawh a. Ceiling a la siam lo lehngal a, a varanda hi cement plaster mai a ni a, a phut dup tawh mai a. Tin, toilet siam te pawh hi tunah chuan a chhe tawh a. A beam hi RCC a sak tur a nih lai khan thingzai phel kha a hmang tawp mai. Nuai 15 lai kha a la tawh bawk si. Chuvang chuan hengte pawh hi Pu Speaker, a rang thei ang bera kan Education Department Minister leh a hote hian a that loh zia hi enchiang a, a rang thei ang bera siam that leh dan te leh rang zawka zawh theih dan te pawh hi a awm lo'm ni aw? tih te ka rilruah a awm a.

Tin, VC Inthlan dawn khan Forest Minister zahawmtak bialah ka va kal a. Saichal khuaah pawh RMSA Building sak kha khatiang tho mai kha a lo ni a. Congress mi leh sa 2 khanin Contract hna kha an thawk a. Pakhatin Contract hna kha a chang a, a hralh lehchhawng a. Chutianga tihte chu a lo ni a. Chuvang chuan hetiang lo en te hi thain ka hria a ni.

Tin, Pu Speaker, ka'n sawi leh duh chu, VC Election chungchangah smooth takin kan thlang thei a, a ti a, a lawmawm hlein ka hria a. State Election Commission ho inpekna leh an efficiency a fakawmin ka hria a, a lawmawm hlein ka hria a.

Thil pakhat ka'n sawi duh chu, model Code of Conduct implementation chungchang thu velah Ruling party-te hian State Election Commission hi eng emaw ti deuha harsatna siam te a awm thei em ? chutiang deuh tumna chu a awm em ? Model Cord of Conduct hi tlemin an nek chep deuh lo maw tih te pawh ka sawi a. A chhan chu election puan tawh hnuah khan NLUP pawisa la sem dur dur mai te kha a ngaih mawhawm viauin ka hria a. A lehlamah chuan NLUP scheme anih tak avanga pawisa sem fo te kha thil dik a ni dawn em ni tih te kha ka thilnungah a awm a ni. Tin, ralmuang tak kan ni e kan tih si laia khaw 15, Kolasib District –a khaw hnih leh Aizawl District-a khaw 13 a inthlan theih lohna kan nei

ringawt mai te hi a state angin a tha lo ka ti a, a lungchhiat thlak ka ti a, hengte pawh hi engvangin nge ni a, engnge harsatna an neih tih te pawh ngaihtuah chiana, a rang thei ang berin thlan te a tha lo maw tih te ka thinlungah a awm a ni.

Tin, chubakah chuan an sawi tel loh pakhat Zampui, Phuldungsei te pawh hi tunah khan VC inthlang tura tih vek kha a ni a, helai hi ramria awm a ni a. Zampui tlang dung saw a khua saw lehlam pang kha Tripura-a awmin lehlam pang kha Mizoram lama awm a ni a, a khawlaiah boundary kha a kal a ni a. Hemi boundary pawh hi kum 1996 January ni 14 khan Surveyor Superintendent, Theihang-in boundary demarcation kha chianguang takin ti rawh u, Mizoram sawrkar leh Tripura sawrkarte inbe tawnin hei hi lo chingfel rawh u, keini chuan boundary chungchang chu sawi theih kan nei love, tiin Mizoram sawrkar leh Tripura sawrkar kha lehkha a rawn thawn a ni a, chu pawh chu la tihfel loh kha a ni ta a. Mahse Mamit DC hian khamiah khan electoral roll te, voter ID te pawh kan siam sak a, V/C inthlana inthlang mai tur khan kan ruahman tawh si lai khan a last minute-ah khan an han cancel sak leh bawk si a, an tana an beihna, theihpatawp chhuaha an beih, an interest te ena V/C inthlan hi kan conduct tir thuai hi a tha lawm ni tih te hi ka rilruah a awm, chu chu Pu Speaker, ka han sawi duh a ni e. Ka lawm e.

**Pu T.T.ZOTHANSANGA :** Pu Speaker, ka lawm e. Hei North East Games kan thlang a, June ni 24, 2003-a Toilet Van pariat kha tun tumah hian nei ila ava tangkai dawn em ka'n ti deuh a, hei kan Governor Speech hi a ropui khawp mai a, tlem tlem ka rawn chuk keuh keuh dawn a.

A hmasa berin para 3-ah khan inthlanna fel tak kan nei kha a lawmawm ka ti khawp mai a, EVM kan hman loh vang anih te ka'n ring a. Hei kum 1989 khan party pakhat chu sawrkarna an tla a, khami an tlak atanga kum nga chung zawng mai kha Durtlang khamah khan bawm pakhat kha a bo a ni tih kha an sawi a ni, Ballot box pakhat kha. High Court-ah te an han kal a, an inawi lungawi a, 2008- alo thlenga EVM an han sawi sel leh a, tun tumah hian hetiang tuang taka kan Governor-in inthlanna tuang tak kan nei tih a sawi hi a lawmawm riauin ka hria a, chu chu ka'n sawi hmasa duh a.

Tin, para 4-ah khan 'safety of the citizen' a tih kha ropui ka ti khawp mai, mipui kan him tihna a ni. In rukbo a la awm lo anih ka ring. MNF sawrkarah khan helhoten Mizote kha sum tuak nan min hmang a ni. Tichuan hei sumtuaknana min hman nasat zia chu hei ka rawn zia teuh mai a, ka sawi teuh thei mai a, he laiah hian. Amaherawhchu, han sawi vak dawnin hun a tlem si a, hei hi chu eng forum-ah pawh ni sela MNF te nen hian hemi kidnap chungchang a ni emaw, ralthuam chungchang a ni emaw hei hi chu debate hi kan thei reng a ni tih ka'n sawi duh a ni. Sumtuak nan min hmang nasa lutuk a, crore thum a phut tih te, 2005 ringawtawh pawh khan a awm a, tin, synod hnathawktute an ru bova cheng nuai khat leh a chanve te an han phuta, Saipum-ah nuai sawmnga te an han phut a, tin, singnga te Bungthuamah, Saiha-ah, Chhualungah khatiang khan ziakin tam tak tunah hian hmuh tur kan la nei a, hetiang karah peace and tranquility Mizoramah a awm a ni e, tiin kan Governor zahawmtakin a rawn sawi hi a lawmawm ka ti a.

Tin, hetah a hnuai deuhah khan 'there has been no major out break of Law' a rawn ti a, hei hi Lawngtlai Bank rawk ang chi em em kha chu a nih ka ring lova, Mizoramah hian khatiang harsatna em em kha kan la tawk lo niin ka hria a. Hun kal tate kan thlir chuan Sorkar hmasa chuan 14.6.2003 te khan Zodin Square-ah zirlai nuarte kha Uitung ang maiin an vaw thuai thuai mai a ni, kan Police ten. Khatiang hunlaite ka'n

thlir kir a, tuna kan sorkarah chuan khatiang anga sorkar hmel tichhe thei kha a la awm lovin ka hria, ka lawm a. Tin, a hnuaiyah a rawn chhuk zel a Police Modernization-te a rawn sawi leh a, tun term-ah hi chuan corruption kha a awmlo niin ka ring a, corruption Zoramini kan hriatlar em em mawza manto kan han tih te, Ekin kal thei kan tih thil chi hrang hrang mai, a then chu PRISM te nge ni High Court-a kalte pawh an awm a ni maithei, khatiang kha hun kaltaah khan Police Modernization chungchangah hian alo awm tawh thin a. Tunah khatiang an reh ta hmiah mai kha kan Home Minister ka zawt ang ka ti deuh a, mahse alo awm lova, an ti tha anih ka ring, a lawmawm khawp mai. Tin, kan term hmasa khanin mizote hianin naupawlai chen hianin saptawng thiam thar kan nei a, chung chu kidnapping tih te, corruption tih te, compensation tih te kha kan hre vek mai a ni. Kha kha a zahthlak ve khawp mai a, tun tumah erawh hi chuan khatiang ang thil hrisello ang kha a awmlo niin ka hria a, a lawmawm ka ti a ni.

Tin, para 5-ah khan ‘an encouraged private investors to make larger investments’ a rawn ti a, lawmawm ka ti khawp mai. Kan term hmasaah khanin, kan sorkar hmasa pawh khan hma nasa takin lak a tum thin a, amaherawhchu, Mizoramah helna te, silai tawlh rukna te leh thih dan mak tak tak mai kha a tam avangin mi an lo kal ngamlo a ni. Nimina an kawng zawh te pawh khan an rawn sawilang a, an huai ka ti khawp mai, thih dan chi hrang hrang eng engemaw te pawh kha an sawi a ni. Amaherawhchu, anmahni zawk hi check ve an dawl em aw tih ka ngaihtuah a. Sorkar atang liau liaua thihna ang chi 7.3.2003 a Pi Lalthianglimi thihna ang te, tin 14<sup>th</sup> February a Pu Hrangchhuana thih chungchanga YMA an lungawi lohna ang te, tin, Pastor meuh pawh ama inchhunga thihna ang chi te leh thildang tam tak hi a awm a ni. Nimina an thil sawiah khan tualthihna thil chihrang tam lutuk an sawi kha, an sawi loh tawp tur an sawi a ni. Khatiang kha an sawi duh anih chuan ala debate theih reng a ni outside-ah pawh, kha kha ka’n sawi tel hram duh a.

Tunah hian Mizoramah khatiang ralmuanna kha a lo awm tak avangin hel leh silai te, thihna te khatiang sorkar behchhana thihna te a awm tak loh avang khan mi an tlangnel a ni taah kan ngai a, lawmawm ka ti a.

Tin, nimina kan Chief Minister hlui zahawmtak thusawiah khan Mizote hnenah kum 99 atan ram an pe ve tawh em tih kha mipui hnenah a zawt a, keiin ka zawh let ve duh chu, “Kum 99 ni tura ram dil hi Mizote zingah an awm ve reng em?” tih ka zawt let ve duh a, kha kha min lo hriatsak sela. Hmasawna tak tak kan lak dawnin a kal tikham zawng ang mai a lo awm chi kha an mahni duh ve reng ang chi alo nih phei chuan an tih loh tawp tur niin ka’n ngai a, khalai te kha ka’n ngaimawh deuh hlek bawka a ni.

Tin, para 6-naah khanin ‘corruption free’ a rawn sawi a, hei hi a lawmawm ka ti khawp mai, corruption free state kan ni ang tih kha ka ring a. A chhan chu Party pakhat chuanin January thlaah Hnam Run hawnnaah, an President ber chuanin “sorkar hi ngun takin kan en reng che u a nia, thil in tihsual vaih chuan kan ngawi mai mai dawn lo a ni” a ti a. Chumi awmzia chu kum thum chhung khan thil kan tihsual hi an hrelo anih ka ring, hei hi a lawmawm ka ti a. Tin, nimina an kawngzawhna chhan zingah pawh khan corruption hi an telh lova ni, churang chuan kan sorkar hi Pathian zarah a clean anih ka ring. Pathianin Mizoramah fel takin rorel a duh a, hmanruaah congress a hmang a ni kan tih kha ala dik anih ka ring a, corruption-in min tibuai lo a niang. Nimina an kawngzawha an tawng zawng zawngah

pawh corruption kha an sawilang miahlo a ni. Chuvang chuan kan Governor-in corruption free a rawn tih hi a sawi awm tak a rawn sawi niin ka hria a, a lawmawm ka ti a, min thlir rengtute pawhin khatianga sawi a awm tak lovah kha chuan a lawmawm ka ti a.

Sorkar hmasaah kha chuan Social Welfare Department-te ka han ngaihtuah a, meat powder supply vel chungchangah te khan tender an han tichhuak a, an han cancel leh a, a vawithumnaah chuan mizo chhan theih loh turin an han siam ta a, duhsak bik an nei a, an duhsak aia hniam khan pakhat khan alo chhang zel mai a lo ni a, khatianga khan harsatna kha an tawk a lo ni a, chulaiah chuan an supplier pakhat chuan, “Mirethei naute chawtui hi a lo hang tham ta deuh a, a tui tihang turin sa kan thlak hnem si a, thik ang ziazanga lo sawisel tur pawh ka ni love,” a ti a ni. Kha kha *Aizawl Thupuan*, January 24, 2003-ah khan ka hmu a ni. Tin, Assembly Session March 6, 2003 te kan han thlir let chuan Police lak dan te kan han en a, khatih laia kan Home Minister zahawmtakin a sawinaah chuan constable 31 advertisement tel miah lovin kan la a, “Hei hi dan ang thlapa kan lak a ni”, a tih te kha document a la awm vek a ni tunah. Chuvangchuan, keini hi corruption, eirukna thilah hian kan sorkar hi Pathian zarah kan la tha a niang a, khatianga mipui cho taka han sawilan ang chi pawh kha a la awm lo hi a lawmawm ka ti a.

Tin, kan NGO hote pawh hi an tha ve angreng khawp mai a. Kumtin hian ruahmanna hi an nei ve thin a. MUP pawh hian 2005 khan Corruption do kumah a puang hmiah mai a ni. A chhan chu khatihlai khan corruption a awm tihna a ni mai. Hei hi pakhat chuan Tural compensation vang te, irrigation sum tam lutuk vang te, police sum te, BAFFACOS sum han zawrh lai te kha a lo ni a. Helai hi kan Mizoram MUP chuan uluk takin zirna te kha an han nei a ni a. Khatianga te ka han ngaihtuah chuan tuna kan Governor-ina Chiang tak maia corruption free kan nihna a han sawi hi a lawmawm ka ti a. Hetiang ang hi Mizoram hmun tinah awm thei zel se ka duh a.

Tin, NLUP hi han sawi leh zawk ka duh a, para 7 ah khan. Tunah hian hei kan hotuten an rawn sawi a, chutihruala ka han sawi ve duh chu, sorkar hmasaa an NLUP ve an MIP kha tlem ka sawi ve duh a ni. June 9, 2003-ah te khan YMA chuan, “MIP hi kan tel vena tlak a a ni love. Kan kut kan sil e.” te an lo ti tawh a ni, MIP tereuhte an khawih lai pawh khan. Tichuan, vaimim chi te kha nuai 120-in an han lei a, nuai 100 kha MIP sum atangin, nuai 20 kha chu Annual Plan fund atangin, khatianga te khan an lo hmang tawh a. Tin, vaimim chi te kha Zanlawnah phei chuan Kg 1 cheng 7-a an lei kha, in tinah Kg 1 cheng 28.50 te khan an lo hnawn lui a, sum kha an cut sak a ni, khatianga chi te kha a lo ni a. Tunah hian MNF kan unaute hianin NLUP-ah hian sawi ngam tur hi an nei vakin ka hre lo. Cheng 7 a an lei Rs.28.50 in an hralh lui a. Khatianga khanin Cheng singnga pek an tumah te khan 7000/- te an pe a, 3000/- te, a thenah 2000/- te, 1000/- te, document-ah a la awm vek a ni, khatianga kha an dinhmun a lo ni ve bawk a. Tunah helaiah mumal takin kan sorkar chak takin a han tichho zel pawh hi lawmawm ka ti a. Thil tha kan tih hian kan duhthusam loh ang thil, lo pawr zeuh zeuh hi chu a awm tel ve hrim hrim a. Khatianga a lo awm avanga kha kha a ber emaw ti ang maia thil an han sawi thin kha a tha lovin ka hria a. Chu chu ka han sawi duh a ni a.

Tin, Agriculture te kan han en chuan tractor kan han sem te, power tiller kan han sem te, tunhmaa la awm ngai lo deuh vek a ni a, a lawmawm ka ti a. Tunah hian tawi te kan han sawi a, Gideon te, Baraka te, Samsona te thu kan sawi zel dawn em ni? Sawi dawn ila hunin min daih si lovang a tih ang deuh hlek kha a ni a. Sawi tur a tam khawp mai a waviinah hian. Engpawh nisela, kan Governor thusawi hi a tha thlawt a, lawm takin ka thlawp e. Ka lawm e.



**S P E A K E R** : Tunah Pu K.S. Thanga sawm ang.

**Pu K.S. THANGA** : Pu Speaker, ka lawm e. Hei, vawiinah Governor thusawi lawmthu sawina motion Member zahawmtakin a rawn putluh hi ka'n thlawp ve duh a. A hmasa berah chuan a bul tan nana, "I am confident that the House will function with a deep sense of responsibility and purpose and that the reputation and dignity of the House as also the House standard of debate will be maintained" han tih hi he House hi helaia Member kaltena an vawn zahawm leh an enkawl that zia a rawn sawina a nih avangin a Member, hetilaia thute ang pawhin lawmthu kan sawi a ngaiin ka hria a. Tichuan, a para hnihnaah "My Government is committed to providing good governance and administration which is clean, responsive, accountable and target oriented" han tih hi he sorkar nihna hi a rawn sawifiah chiang hlein ka hria a, a ropui ka ti a. Mawhphurhna nei sorkar thianghlim, engkim maia a thil tuma chiang sorkar a ni dawn a ni tih kha a rawn sawifiah kha a ropui ka ti a. Vawiinah hian kan Governor thusawiah hian he sorkar nihna a rawn thailan dan hi a ropui ka ti a ni.

Tin, para 3-na Election chungchangah hian tawite ka sawi duh chu, kan V/C-ah te, State Election-ah te, Municipal Council-ah pawh a ni tho a. India ram state-ah hian election-ah hian public participation hi a tlem sawt hle a, voter turn out hi zaa 50/60 pawh kai mang lote State tam takah a ni tawh a. Keini ramah hian kan ram hruaitute hi mipui rin an la kai a, chuang chuan voter turn out hi zaa 76 chuang te, zaa 68 chuante ram pum huap pawha a la ni thei hian kan ram roreltute mipuiin an rinna a rawn tilangin ka hria a, lawmawm ka ti hle bawk a ni. Kan ram roreltute hi India ram state dangte ai chuan rin an la kai a ni tih a tilangin ka hria a, lawmawm ka ti a ni.

Tin, para 4-naah hian, Law & Order chungchanga kan Police Force-te equipment tha ber ber leh tunlai thiamna hmanrua tha ber ber te nen. Tin, lirthei lamah te pawh an mamawh ang zawng zawng te, infrastructure lamah te an mamawh ang zawng zawnga enkawl an nih avangin India ram huapah pawh tunah hian Police chhuanawm an nih zia te a rawn thailang bawk a. He sorkarah hian Police lamah te, kawng chi tinin a tha ber ber kan nei a. Chutiang chuan hmanrua tha ber bera thuan leh enkawl an ni bawk a, chuang chuan vawiin thleng hian kan ram hi ram nuam a lo ni ta a ni tih a rawn tilang a. Tin, nichina ka hmaa member zahawmtakin a rawn sawi para 6-na hi "My Government is committed to have an efficient, transparent, responsive and corruption free administration" han tih ngam hi Mizorama sorkar kan hmuh tawhin a la tih ngam miah loh a niin ka hria a. He sorkar hi a chak ang a, mawhphurhna a la ang a, a langtlang ang a, tichuan corruption-ah a free dawn a ni, ti ngam sorkar Mizorama a lo ding ta luah mai hi ropui hlein ka hria a.

Niminah North East Games te kan thleng a, kan ngaihthlak tawh ang khan hei Sports lamah te pawh hma kan la a, chak takin kan kal a ni a. Chutihlai chuan North East Games, North East thalai sang rual kan ramah an lo punkhawm laiin chhuanlam dawrawm te tein heti laiah mahni mawng hlim chak pawlte an lo la awm zel a, kawngte an han zawh a. Amaherawhchu, kawng zawhtute mipuiin an support lova, an tam viau lo khan kan hnam hmel mawina, hmai a tibal pha ta lo hlauh kha a lawmawm hlein ka hria a. chutihlai erawh chuan lawmawm lehzual ka tih chu he sorkar laka lungawi lohna mipuite hnena zirtir a, mipuite hnena tih tum te khan an tih tum kha a chiang lo hlein ka hria a. A lehlamah chuan he sorkara ram

anga pawimawh ber chu corruption-ah hian sorkar a tluk chhiat chuan hmasawna leh development hi a thleng thei reng reng lo a ni tih hi khawvel hian a hria a ni. Chutah chuan he sorkar hi nimina thusawitu zawng zawng khan corruption-ah hian a hmingchhia a, a hmai a bal a, sum leh paiah hian dik lo takin mipui chanai a ei a ni tih sawi ngam pakhatmah an awm lo khan he sorkar corruption free, Governor Address-a rawn lang hi an rawn pawmpui hlein ka hria a. Chu chu ram mipuiten General Election lo awm leh turah pawh hian an rawn inngahna tur leh election-a vote an thlak huna an in base-na tur, mipui thinlunga tehkhawngah an rawn hman tur a nih ka ring a. Chuvang chuan chutiang ang tak taka thianghlim, free corruption govt. siam theitu sorkar kan nei leh chumia hotu ropui tak Mizorama Chief Minister ni tam thei ber leh ni rei ber vawiina hriselna tha nena min hruaitu Pathianin min pe hi he ram hi kan vannei hlein ka hria. Eng ang pawn thil tha ti ila, eng ang pawn sum leh pai hi lalut thin mah ila keimahnin tana kha kha kan hman zawh vek chuan Pu Speaker, a titute, a lachhuak tute'n a mipuite tan aia keimahnin kan ei a, a pil a mipui kan vawm mai mai a, a chhunga a thlum tha zawng zawng kan ei zawh vek chuan he ram hi a dam dawn lo a ni. Chuvang chuan free corruption kan din he sorkar hi thil ropui tak a ni.

Tin, NLUP-ah hian niminah khan a figure hi chhut sual a nih ka ring a, chhungkaw 45000 paragraph 7-naah khan pek niin kuminah pawh vaibelchhe 413 heta tan hian earmarked a ni a. He pawisa hi sorkar kutah awm tawhin kan inpe chho dawn department lam a inpeih chuan a ni mai a. Pu Speaker, helaiah pawh hian lawmawm em em chu kan hma kum 10 kaltaa sorkar khan MIP te an ti ve a, kan ro te pawh hi a in pui hleih niin ka hria a ve mai mai a, kan ram mipuiten an hriat atan MIP ah khan vaibelchhe 100 vel kum 10 chhungin an sem thei hram a. Rs. 4000-7000 inkar kha beneficiary chhungkuain an dawn theih a ni. Keiniah hian kum 3 kan tih chhungin Rs.60000 chuang dawng te an tam hle tawh mai a, tichuan, he sorkarina kum 5 a hman hi chuan Rs.1,00,000 dawng hi chhungkaw nuai khat chuang an awm dawn a ni tih a lo lang a. Chutiang chuan vawiinah hian he rama roreltute hisap pawh hi a lo inlen hleih a. Mipuite tan pawisa awm lo chuti khati, sorkar a harsa, sum leh pai a harsa ti tiin sawi sawi mahsela kan hotuten a harsa tih sawi reng chung a ram mipui zaa sawmsarih hnena a tak taka pawisa heti zata tam an thlen thei hi ropui hlein ka hria a Pu Speaker, lawmthu sawi tlak niin ka hria a.

Tin, Horticulture lamah hmalakna ropui tak tak mai kan nei a. Tunah hian Horticulture-ah hian thlai chi duh duh dana supply theih lohna turin Department-in Nursery siamin sorkar approved Nursery atang lo chuan tunhma anga Minister-te laka thiltithei te, hotu lian laka thiltitheite'n an supply mai mai ang kha a awm ta miah lova, tunah hi chuan Dan rorelna leh systematic fel tak leh nichina heta a sawi ang khan a kal mek a ni. Lawmawm em em chu Pu Speaker, ka bialah ngei pawh sanitary of excellent Horticulture Sanitare cheng nuai zanga lain hmalakna tunah sawn a awm a, Mizorama hmun pawimawh tak mai hmun thim thin laiah khan a lo chang ve dawn ta hi a lawmawmin ka hria a Pu Speaker, lawmawm ka ti hle a kha kha ka sawi duh a ni. Vawiinah hian a vaiin kan sawi zo hman ta lova, kan hmalakna chi hrang hrang sawi turin minute 10 hian a daih lova, he sorkar hi vawiinah hian kan Governor Address-ah hian a zawng zawng chu a theih loh chungin sorkar hmalakna lian pui pui a rawn fun a he ram hian ke a pen a ni tih hriat theih tura a rawn address hi lawmawm ka ti a, Motion hi ka'n thlawp a ni e, ka lawm e.

**S P E A K E R** : Col. Z.S. Zuala.

**COL. Z.S.ZUALA** : Pu Speaker, ka lawm e. Kan Governor Speech, a opening sentence atanga “dignity of the House as was highly standard” a tih kha nichina ka hmaa Member zahawmtakin a sawi ang khan kan Assembly House dignity hi, State dangte chanchinte kan lo hria a, House chhungah te an intibuaiin man-handling te a awm hial a, chutiang bawkin Parliament, kan rorelna sang berah pawh a dignity hi an maintain zo dawn ta lo a ni ang tih hlauhawm khawpa an khawsak laia hetiang kan Governor-in a rawn sawi chhuak hi a ropui ngawtin ka hria, hetah hian member zawng zawngte congratulate ka duh a, chubakah heta a mawhphurtu lian ber kan House Leader pawh a zahawm a, House zahawmna kan maintain hi a lawmawm khawpin ka hria a.

Tin, chu lo lehah chuan para hnihnaah khan, “growth inclusive” tih, mirethei te, a rethei berte thleng tur zawnga kan sawrkarin hma a lakna a rawn sawi te hi a ropui a, kan sawrkar hi, tun sawrkar hi, miretheite tan din a ni tih a rawn puh chhuak hi a ropui khawpin ka hria a. Tin, enforcement lama kan police-ten hma an lakna hi a ropui ka ti a, an hnathawh tam tak bakah Human Trafficking a han sawi kaiah hian, kan Police te, miin an lo kidnap, an lo hruaibo, Mumbai thleng thlenga an zuk chhui chhuaka, an rawn lachhuak te hi a ropuiin ka hria a, kan police officer-te, Minister te leh a thawktute hi an fakawm ngawtin ka hria. Kan hnam an hmangaiha, hetiang taka kan fellow Mizote chhanchhuak tura hna an thawkte hi a ropui a.

Tin, NLUP hi han sawi ka duh a, heti laiah a figure hi an rawn titem e an ti a, Party thenkhat sawrkarna nise chu inflated figure-te hi an rawn tar chhuah zawk mah mah ka ring a, amaherawhchu, tun sawrkarah chuan a tlem zawk mah mahin an rawn tarchhuak a, chuvangin kan sawrkar hi a chapo lo hle a, dawta figure tihpun vak vak ang chi hi a rawn tilo Chiang hle mai a, hetah pawh hian sawrkar kalhman a tilang Chiang hlein ka hria a. Tin, NLUP hi hmanni lawkah pawh khan kan Chief Minister zahawmtak hoin bawngpui tha, Haryana ami kalkawngah pawh ni 15 dawn lai an rawn thang a, chuti chungah harsa pawh chuan kan mirethei ber ber te tana khatianga hma an lakna kha a ropui a. Tin, Auto-rickshaw hmanni lawkah kan hmu a, heti laiah an han sem chhuak a, an tlanhhuak pur pur maite pawh kha, kan NLUP hi kan campaign laia, ‘an sem thei lo ang e’ an ti a, chutah kan han sem dawn a, ‘sem tlem em mai’ an ti a, chutah “installment in an sem” an ti leh a, tunah hi chuanin han sawi leh tur hi a awm vak tawhin ka hrelo. ‘Kan ti ang’ kan tih chu, hei kan sawrkar hian a ti chho zat zat mai a, chu pawh chu miretheite tan. A thenin NLUP hi a ‘chumi khami, sawrkar hnathawkte hlauh atanga pawhpen a ni,’ an tih laiin kan sawrkar chuan miretheite a pe mai a, a khawi atang pawh chuan la pawh ni ta se, kan mirethei ber ber te pawisa an pek kha chuan, miretheite sawrkar a ni maia, sawrkar hnathawkte chu a thlakip a hlauh la te an ni a, engemaw chen te chu an lo ip thei deuh anga, kan miretheite erawh hi chu kan sawrkar hi chuan a ngaipawimawh khawp mai tih hi chu a Chiang khawpin ka hria.

Tin, hei agriculture hi, kan rice production hi 46 % in alo pung te hi a ropui a. Tin, hman deuh lawk pawh khanin kan hre reng anga, small State zingah khanin Mizoram Agriculture Department khanin First Price te a zuk hmuh kha kan la hrengin ka ring, tun kan sorkar hi hetiang hmalakna lampangah hian a kal zel a. Tin, heti laiah Rural Slaughtering House a tih hi kan bial Aizawl South II, Mualpuiah sawn an sa mek a, hmanni lawk pawh ka zuk en a, hengte hi a ropui a, hemite hi a lo hlawhtlin a, a lo puitlin tak tak chuan, sa hrisel zawk, sa thianghlim zawk kan mipuite hnenah an lo hralh thei dawn a tihthe hi

a tha hle a. Chulo leha chuanin Power lampang a sawi hi han en ila, heta sawi loh zawk Tuirial Hydel Project Congress Sorkar hmasain a lo hmalakna compensation avanga a thuanawp ta hi ka han ngaihtuah thin a, Sorkar hmasa khan lo tihlawhtling ta se Power-ah hian engzatnge pawisa kan lakluh ang, hetiang an lo tihthuanawp avanga kan hlauh tak expenditure pawisa kan hmuh tur kan hlauh tak kha a interest te nena han chhut phei chuan crore engzatnge kan hlauh tawh tih hi ka ngaihtuah thin a. Hei hi pawu ka ti khawp mai a, mahse hei tunah hian Hydel Project tam tak siamna tur hma an la chho leh ta hi a lawmawm a.

Tin, Games, North East Games hi nimin khan kan Chief Minister zahawmtak ho khan kan zuk hawng a. A ropui hle mai a, khutiang Stadium khu India ram hmun hrang hrangah hian kan kal a, khutiang anga ropui leh tha khu a vang ngawtin ka ring, a la hmulo te in awm phei chuan zuk hmu ve ula. Kan Sorkarin a hmalakna hi a chiang khawp mai, khu khu a example pakhat a ni mai a, hetiang hi Lungleiah te hmun hrang hrangah hian a awm thluah tawh, henge pawh hi hmuh a tha khawpin ka ring.

Tin, Health lampang pawh hi han sawi zawk ka'n duh deuh a. Kan Health Department, kan Minister zahawmtakte hmalakte pawh hi Agriculture Small State a first price, kan hotute hmalakna zara kan dawn ang chi baw kha kan Health Department Minister zahawmtak kaihhruaina hian Small State-ah pakhatna an lo zuk la ve leh a. Mizoram hi Northeast-ah leh kan State anpuiah hi chuan kan lo te love, kan lian khawp mai. Tin, UD & PA hmalakna sanitation ringawta kan improve tak em em ziate pawh hi. Tun hma kum khat emaw kum hnih emaw kal ta a kan sanitation condition-te kha han ngaihtuah ta ila, tunah hi chuan ropui leh nasa takin hma kan sawn tih hi kan hriat a thain ka ring. Tin, Koladyne Multi Model Transit Transport-te hi a lo through phei chuan Mizoram hi India ramin bungrua tam tak a lakna kalkawng a ni dawn a, heng ringawtte pawh hi a ropui a, PWD lamah hian kawng tihzauhnaah kan kal a, hmun hrang hrangah hian kawng tihzauh leh improvement nasa takin a lang a, henge hi a ropui a. Tin, Tourist Department hmalaknain thlenna In hmun nuam tak takte tunah hi chuan kan nei tawh a, a lawmawm a, a ropui hle a. Kan Governor-in thu a han sawi hi a ropui a, a tha a, ka han thlawp a ni tih ka han sawi duh a ni, ka lawm e.

**S P E A K E R** : Tun tum chu Col. Zuala hetiang reng renga a khah kan la hre lo. Tun tum chu hun pawh minute 50 pawh pe ila a hmang zo vek hial ang tih awmin a khat a ni. Tunah chuan Pu B. Lalthlengliana.

**Pu B. LALTHLENGLIANA** : Pu Speaker, wawiina kan Governor zahawmtak thusawi sawihona hun kan han nei hi a lawmawm hlein ka hria a. Amaherawhchu a vai hian a lawmawm lo lova, a lawmawm lai a awm a.

A hmasa bera ka sawi duh chu MNF Sorkar laia kan hma lo lak tawh a bikin Sports-ah heng Rajiv Gandhi Stadium te, tuna kan Chief Minister zahawmtak hming chawia Hawla Stadium, Pitarte tlang tihte, tin, Lunglei Zobawk amite, Kolasib amite, Thenzawl amite, Kawnpui amite, hmun hrang hranga hma kan lo lak tawh chhunzawm a ni a, zawh an ni chho te hi lawmawm ka ti a, kha kha a detail-in kan Governor khan a rawn sawilo na-a kan hunlaia a pawisa te pawh engemawzat kan lo hmuh tawh, a then contractor hialte thlan fel hman tawh te kha an ni a. Hetiang a hma amite sorkarin hma an lo lakna chhunzawm a nih a, wawiina chhawr theiha a awm

ta hi lawmawm ka ti a, khalaiah khan lawmthu sawi tur awmin ka hria a, chu chu lawmthu ka rawn sawina ni sela. A dangah pawh khan lawmthu han sawina tur chu a awm ve nual, mahse a tam zawk kha chu Budget Session hmasa lama sawi tawh repetition mai mai te an ni hlawm a.

A hmasa bera ka sawi duh chu VC leh Local Council inthlan kha smooth taka zawh a ni a ti a. Inthlan hrim hrim kha a smooth a nih pawhin inthlan campaign laia kan tihdan kha a fair lova, a thianghlim tawh lo a ni tih thingtlang lamahte campaign-a ka chhuah avangin ka hria a, indona leh inrikrapna chi hrang hrang karah thingtlang lama kan voters-ten vote an thlak a ni tih ka hmuhin a lungchhiatthlak ka ti a. Aizawl lam atanga Party thenkhat zin chhuakin Block hruaitute kaihza vengah hmangin Mizoram hmun hrang hrangah Congress hi in vote loh chuan R.O atangin in number kan lachhuak ang a, NLUP in dawn sa pawh pek in ni lo ang a, dawng tura thlan pawh pek in ni lo ang tiin nasa taka invauna a awm a. Chutih lai karah chuan a bikin ka bialah te khaw 10 dawn lai maiah VC a hlanga MNF-in kan han siam thei te kha Mizoram mipui hian thingtlang kilkhawr tak atang pawhin he Sorkar dinhmun hi an hmu Chiang viau ni te pawhin ka hria a. Aizawl khawpuiah te phei chuan sawi thu a cheng lova, Local Council inthlanah khatiangte kha he sorkar dinhmun a ni, Aizawl khawpui chhungah pawh tlema a daifem deuh, invauna leh inrikrapnain awmzia a neih deuhna hmunah ruling khan awmzia an nei deuh chauhniin a lang a. Chuvangin, he Sorkar nihphung leh awmzia hi chu helaiah hian kan sawi tam vak ngai lovin Mizoram mipui hian kan hriain ka hria a, chu chu ka sawi tam lo ang a. Chuvang chuan, kha VC inthlan kha thianghlim lo tak karah kan inthlang a, khati chunga MNF in khatiang zat kan han hmu te kha a ropui thlawt a ni, kan beisei ngam loh piahlahmah kan awm a ni.

Tin, NLUP chungchangah hian sawi ngam tur in awm tawh dawn em ni in rawn ti thin a, sawi ngam tehreng mai, NLUP in inzawrhnaah khan kan Sorkar tukah cheng nuai 1-in kan pe ang tih kha a ni. Kha kha kan sawi lo in ti na a, in sawi chian zia chu Pu Speaker, i hnenah ngei pawh Budget Session-ah CD Cassette House Property atan ka pe che a nih kha. Kha kha in sawi chian zia tilangtu a ni. Amaherawhchu, a pek chu kan pe zel a lawm in ti a nih chuan kan pawm e, mahse in sawi ang diak diak kha chuan in ti bik lo a ni tih erawh kha chu vawiinah hian ka sawi duh a.

Tin, in pek dan pawh hi a inang lo nasa a, a then Rs.4000/5000 lek in pek laiin a then chuan sing tel te pawh an dawng a ni awm e. Chutiang chu in pek dan a ni a, kha kha chu a trade thlan dan a zir te pawh a niang, engpawh nise, kha kha chu a tha-ah ngai ila. Tin, NLUP chungchang Governor thusawia kan hriat thiamloh deuh pakhat a awm a, tun current Financial Year-ah hian NLUP implementation-ah khan crore 413.27 dah a ni tih kha a ni a, tun kum kan hman mek hi anih ka ring a, nikumah Budget session-ah khan cheng vaibelchhe 234 kha Budget bua lo lang kha a ni a, chumi bak zali sawmpathum alo tlinna lai kha ka hrethiam lova, khawi atanga khatiang zat kha lo awm nge? Budget bu bakah Central atanga hmuh a awm anih chuan a copy-te member-te min pe thei ula a lawmawm ngawtin ka ring a. Khati zat zat kumin Financial Year-ah nei si a, in pek tawh number hi a la tlem hlein ka hria a. First Phase-ah khan chhungkaw singnga sangnga zasawmthum pakua hnenah pek ni khan sawi a ni a, second phase-ah khan singli sangnga, a vaiin chhungkaw singkua leh za sawmthum pakua vel pek tawh ang a ni. Kum hmasa berah cheng vaibelchhe za kha dah a ni a, amaherawhchu, a hmanna mumal tak sawi tur hriat loh khan kha kha a thamral a, a kum lelah khan cheng vaibelchhe zahnih sawmthum pali leh nuai

sawmriat leh pathum vel kha dah a ni a. Tun Financial Year-ah hian cheng vaibelchhe zahnih sawmthum pali dah a ni bawk a, a vaiin cheng vaibelchhe 568.83 lai dah a nih tawh hnuah chhungkaw heti zat lek pek an nih hian a lehlamah chuan ti tha in in tih viau laiin he pawisa zozai in hmanna hi uluk taka bihchian leh Budget Session-a management-in component of NLUP Fund 2010-11 inrawn ziah chhuah te han en hian a tul lova pawisa hman hi a tam lutuk a ni. NLUP Hall han tih te, eng atan nge NLUP Hall han sak ringawt te kha a tulna awm?

Tin, officer tam tak Department atangin in depute a, chung tana motor heti zozai lei a driver nen, POL nen hetiang anga nawmsip bawlina ang a NLUP in hmang hi thil tha in tih duhna mah ni sela hei hian a tihmelhem che u in ka hria a, chu chu ka sawi lang duh a. In pawisa dah zawng zawng, budget bu a awm zawng zawng hi mirethei NLUP dawngtu turte tan hman nisela, hei aia tam chhungkua a pek theih tawhin ka hria a. Chu chu Pu Speaker, ka'n sawi lang duh a. Tin, budget plan fund atangin chuti zozai chu dah a ni a, party induhsakna hleihluak taka kal a ni, a hminga bial nei kan nih avangin kan bial chhungah pawh, midang bialah pawh a ni vekin ka ring. Party dang hming chuang an awm pawhin an in paih zar zar a, a hlanga congress inpekna a ni. Amaherawhchu, khatiang anga tih anih avang khan sorkar hnathawkten hlawh lak tur an lo nei lova, a lehlamah hmingthatna nei ang chuan lang mah ula, a lehlamah hmingchhiatna nasa tak a ni a, MR te nei hleithei lovin mi eng emaw zat ban an ni a. Heng NLUP avanga Plan fund pawhpen vang hi a ni lo thei lo a ni. Chuti anih loh chuan kan Education Minister zahawmtakin chawhmaah khan Plan fund atangin hlawh kan inpe daih thei ngang lo a ni tih a sawi a. Heng cheng vaibelchhe tel hi NLUP atan pawhpen ni lo sela kuminah pawh Education lamah pawh khan an mamawh ang tawk kha pek theih niin a lang a kan budget plan fund atang khan. Chu chu ramin a tawrhna chu a ni.

A tawp bera ka sawi duh chu, bawng pawh a dawngtu turte hmanni lawkah pek an ni. Amaherawhchu, Shillong leh Guwahati lama bawngte a tha em em a kan hriat lai a Haryana bawng zu lak kher kha tunah pawh hian a that lohna kan hmu nghal a, a beneficiary hote pawh an inhmua khawm a, Haryana bawng a that loh zia an sawi tan leh tawh niin kan lo hria a. Pakhat phei chu a thi lehngal ni awm tak a ni, ni sawm leh tih chuang lokal ngai anih avangin a thi pawh kha a awm viau a ni. Chuvang chuan, thil tha kan tih dawn hian hnai vai zawka thil tha ni ve tho si ang te kha kan ngaituah thiam a tulin ka hria a.

Tin, NREGS ah Aizawl Project hnuai ami ni za inhlawhna tur atana Central lamin arawn sanction nia lang si mahse ni 14 a sanction kim ta lo tlat mai te hi enga tan nge ni 14 a inhlawh tur kha hman a nih dawn ? Party sumah hman in tum ta em ni ? Tunah hian Local Council leh V.C inthlanah MNF a lo chak chhoh hian V.C term hmasa lama ni 100 a full-a inhlawhna an nei theih laia ni 14 a lo kim thei ta lote hi enge a chhan hei hi a chhan dik tak hriat a chakawm khawp mai.

Tin, Pu Speaker, ka bial chhungah Police Station dah turin vawi engemaw zat ka nawr a, kan Home Minister pawhin min sawi hmuh tha viauvin ka hria a, Farkawn atangin Burma ram panna kawngpui a tlang a , Vaphai atangin a tlang tawh bawk a. Aizawl atangin Bike leh Motor engemaw zat ruk a nihin khi lai tlangdung khi Burma awlsam taka thlen theihna a ni a, Khawbung, Lungdar, Dungtlang YMA ten engemaw zat an lo man tawh a. Khi laiah khian Police Station dah a pawimawh em em a ni. Chuvangin a hmun kan sawi lai kha strategic point pawimawh tak a ni a, East Tuipui constituency-a Police Station pakhat dah hi chu a awm em em a ni. Khi khi kan ram leh hnam tan pawh security atan pawimawh tak anih avangin kan Home Minister a awm lo na a hei hi min ngaituah sak ngei

se thain ka hria a. Tin, chutihruah chuan entirnan, khaw pakhatath thil thleng a awm a, police an ko va, police kal lam leh haw lam man, a kotuten an chawi thin nia lang hi hei hi a diklo khawpin ka hria a. Sorkar chak kan in tih kan sawi lai meka police duty-te kal man mipuiin tum sak hi chu kan sorkar hian enfel rang se a thain ka ring a.

Tin, ka bialah Pu Speaker, Mega wt. 2.5 pechhuak thei tur Tlawva khuah tura hmalak mek a ni a. Rs. Nuai 5749 vel senga khuah tur a ni a, amaherawhchu, ka hlauhthawn chu Tuidumpuiah tih a ni tawh a, chumi hnuah Lamsialah tih a ni leh bawk a, chu chu enkawl mumal loh anih avangin Tuidumpui pheih chu a ruang pakhat mah hlawn tur a awm tawh lova. A side-ah Hydrel Project siam a ni tih hriat theihna pawh a awm tawh lova. Chutiang khawp chuan ngaihthahin a awm a, tunah hian Lamsial pawh hlamchhiah ni chho mek zel niin a lang a. Khawbungah E.E hmun turte Quarter leh Office sak mek a ni, reiloteah hawn tum anih ka beisei a, chu tih lai chuan Lamsial hi hlamchhiah tan mek a ni em aw ka ti a, a chhan chu Farkawnah Power SDO awm te pawh sawn chhuah tum mek nia hriat a ni. Hengte hi Pu Speaker, kan sawrkar hian Mini Hydrel Project-a hma kan la a, maintenance kan ngaihtuah leh si lo anih chuan Tlawva pawh hi ti leh mah ila kha tho kha kan dinhmun tur ni lehin ka ring a. Chuvang chuan Lamsial enkawltu tur hian Power SDO hi Farkawn atangin lakchhuah loh hram ni se tih kha kan Power Minister ka'n ngen duh bawk a.

Tin, Primary Zirtirtu hi kan bialah hian kan indaihlo nasa hle mai a, entirnan, Sazep leh Vanzau leh Zawlseiah chuan regular teacher pakhatmah an awm lova. A ngetlo zirtirtu 2 emaw 3 te an awm a, chung chuan kan biala Sikul an enkawl a ni. Chutichuan a tlangpuih Zirtirtu 3 naupang za awmnaah an awm tawh a, a thenah chuan pahnihte . Pu Speaker, Zirtirtu kan la leh dawn anih chuan a khaw chhunga qualify an awm chuan chu chu lak nisela helai problem hi chu kan solve theiin ka ring a.

Sateek bial ka bial lai khan Lungseiah Zirtirtu problem kan neih thin avangin an khaw chhunga Zirtirtu qualify kan nghak a, Seiliani a ni a, chu nu chuan pawl 12 a rawn pass-in zirtirtu atan an la ta a. Chu chuan regular deuhvin engtik lai pawhin sikul a enkawl a, pawn lam atanga an dah ten sikul an kal that duhloh pawhin mualpho lovin vawiin thlengin a enkawl a, sikul tha takah a chhuah chho ta a. Chutiang chuan kan ram education hi siam that tak tak kan tum anih chuan chutiang chuan tih ni thei se hma kan sawn ka beisei. Party mi kan induhsak anih pawhin zirtirtu hmun ruahna khuaa qualify kha induhsak ni mai sela. Chutichuan transfer tih te hi an sawi an sawi lovanga, zirtirtu pension leh hmun ruak te khati zawng khan inhnawhkhah ni zawk sela, Commission-te dina tipuitling tur hian kha kha thil tangkai tak a nih ka'n ring a, chu chu Pu speaker, ka'n sawilang duh zawk a. Zirtirtu indaihlohna nasa tak hi kan Minister pawhin min ngaihtuah sak se tih kha ka'n sawi duh a ni.

**S P E A K E R** : Awle, tunah chuan kan hun a lo tawp ta a, dar 2 ah kan chhunzawm leh ang a, i lo chawl rih ang u.

2:00P.M.

**S P E A K E R** : Governor thusawi Motion of Thanks kan sawiho ang a, movers telin mi 6 in kan sawi tawh a, tin, minute 10 kan inpe a, minute 8-ah bell kan tiri ang a, minute 10 ah chuan in khung len ngei tum ila, chuan Pu R.L. Pianmawia a phar a, a dawtah Pu John Siamkunga. Pu R.L. Pianmawia i lo kovang.

**Pu R.L. PIANMAWIA** : Pu Speaker, ka lawm e. Kan Governor thusawi takah khan lawmthu sawi sen loh a awm a, chung zingah chuan tlem tlem ka'n thailan duh chu UD & PA hmalakna atang ringawt pawh hian Darlawnah te pawh nasa takin bul tan a ni a, a lawmawm em em mai a ni, hetiang hi khawvel awm chhung pawh hian kan tawng ang tih kan hriat phak loh, kan man phak loh thil kha a ni a, tunah hian hmalakna nasa tak khawchhungah a kal mek a ni. Tin, Sport Department-ah pawh bial thlawhkhum thin leh hriat ngai lovah pawh Zohmun field te, Sakawrdai te, Vaitinte leh Darlawnte thawh sak kan ni a. Tin, Darlawn field tur pawh puitling zawk turin cheng nuai 495 man tunah hian ruahmanna min tihsak bawk a DPR siamin NEC ah min thawn sak a. Chutiang chuan ngaihsak hlawh ngai lohte pawhin ngaihsak kan lo hlawh takna chungchangah hian kan Governor thusawi atanga thil lawmawm tam tak hmuh tur a awm a ni.

Tin, PHE Department-ah hian tunhma zawng zawnga la awm ngai lo khawtin ti mai ila Zohmun tih loh chu tui mamawhna atana tuizem siamte kan nei tawh a, Zohmun hi kan hmabak a ni a. Tin, chu mai bakah a tihlawhtlinna tur thil dang tuna kan neihsa mai bakah ruahmanna lian tak mai kan PHE Minister leh kan Chief Minister zahawmtak remtihna in Tuivawl tui Kepran tlangah pump a, chumi pump chhuah atang chuan Khawruhlian atanga New Vervek inkar zawng pekna turte ruahmanna min siamsak a ni. Heng scheme ropui takte hi kan tawng ang tih kan ring ngai lova, tin, sum tam tak ngai tur a ni a, hetiang ruahmanna min neihsak hi kan lawm a. Tin, Darlawn khaw bik tan nuai 400 man ruahmanna kan PHE Minister kawhhmuhna in min buatsaih sak bawk a, kan lawm takmeuh a, Governor thusawiah hian lawmna tur tam tak kan nei a ni.

Tin, Home Department-ah pawh Police Modernisation Scheme atangin Sakawrdai kan Police-te pawh motor tha zawk pek an lo ni ta hi lawmthu kan sawi takmeuh meuh a.

Tin, LAD-ah hian kum khata Christmas dawna step pahnih khat vel pakhat cheng singhnih man vel kan hmuh thinah khan tunah chuan chutiang let sawm ang vel chu kan hmu thei ta a. Chi hrang hrangah LAD hmalakna atang ringawt pawh hian sawi tur tam tak kan nei a ni tih ka'n tarlang duh a.

Tin, Social Welfare Department lamah pawh Anganwadi, kan naupang enkawl na hmun pawimawh ber mai in chhe tak thinte kha sak an ni ta vek bawk a. Chubakah a tul anga hawn belhna tur programme thlengin min ruahman sak a, churang chuan, kan Sorkar hmalakna lawmawm tak a tlangpuia kan sawiah khan a then tet tur sawi tur hi a tam leh lutuk a churang chuan, a lawmawm hlein ka hria a.

Tin, Health Department-ah hian Ratu-ah damdawi in min dah sak turin kan Health Minister-in min tihsak a. Hengte hi tunhmaa Sorkar kalta zawng zawngin an tiam, tihlawhtlin theih loha ngaih tawh a ni a. Amaherawhchu, tihlawhtling thei turin kan Sorkarin min ngaihtuah sak a. Tin, Quarters te, Sub-Centre building te, hmun kilkhawr ber Mauchar leh N. Tinghmun khuaah te hian min sak sak tawh a, a lawmawm tak tak a ni.

Tin, Forest Department pawhin hmalakna hrang hrang Mauchar khua leh N. Tinghmun khua tuma tlawh pawh loh khuaah te quarters an rawn sa a. Chutiang chuan Darlawn division hmunah te pawh a theih ang chin chinah ruahmanna thar an



siam a. Sorkar hmalakna hi he Sorkarah hian a lang nasa em em a ni. A bik tak pawhin ka bial aiawhin lawmthu sawi tur ka ngah em em a, lawmthu ka sawi takmeuh a ni.

Tin, supply chungchangah hian, buhfaiah te, gas chungchangah te duhthusam lohna tam tak miin an sawi thin laiin keinia chuan buhfai hi a harsat ber hunlai pawh khan harsa loin kan awm a ni. Min duh sak bik a ni, bial dang chu ka hre lova keini bialah chuan tlak chham kan nei ngai lo, kan mamawh tawk hi engtik lai pawhin kan nei a ni tih ka sawi lang duh a. Tin, gas-ah pawh agent tunah min dah sak a, tun thla March, 2012 chhung hian commission beisei a ni a, agent nei turin kan supply Minister-in min ruahman sak hi a ropui ka ti takmeuh meuh a. Tin, chumi hma pawh chuan Zohmun thlenga pek theih turin kan dil a, chungte pawh chu a khat tawkin agent awm lo mahsela rate hniam zawkin min tihsak a, chutiang dinhmuna kan han ding chho hi a ropui em em a ni.

Tin, chawhma lam khan kan member-pui zahawm tak Pu B. Thlenga khan, Aizawl District-ah ni 100 inhlawhna kan tih mai, miretheite chanpual tak tak kha ni 100 pawh an titling thei lo hi chuti khati kha a rawn ti a, amaherawhchu, a rah lo zar lamah a awm avang a nih ka'n ring a, ka hre chiang lova. Tun thla ni 14 khan Central-in fund hi a rawn release chauh avangin neilo turah alo inngai a, chuvangin miretheite ngaihsak tak tak hi chuan sanction awm leh awm loh hi kan hre mai a, a ngaihsak lo chuan an hre lo mai a. Chuvang chuan miretheite ngaihvenna kawngah he sorkar hi a tlan chhe ngai lova, a tih tur hi chu a hria a ni tih ka sawi duh a. Chuvangin harsatna tam tak karah pawh miretheite chan tur kawngah hi chuan kan sorkar hian tlan chhiat a tum lova, a tlan chhe ngai bawk lova, a tih tur ati zar zar a ni tih ka'n sawi duh a, tlai/tlan ngailo sorkar a ni tih hi tun hunah hian ka'n sawi lang tel duh bawk a ni.

Tichuan, kan sorkar hmalakna hrang hrang lawmawm tak mai kan Governor zahawm takin a rawn sawi chhuahah hian sawi tur tam tak a awm a. NLUP chungchangah tanpuina kan han sem te kha tap zawih zawiha dawngte pawh an awm a ni. Rs. 2000/10000 pawh in leh loa la senglut ngai lo ten an han dawng a, chuvang chuan miretheite hetiang khawpa hria sorkar kan neih fakna thu ti mai ila, a nihna dik tak Governor-in a sawi chhuak hi kan Governor pawh hi a fakawm ka ti a, fak tlak fak nachang hria Governor kan han nei ringawt pawh hi a lawmawmin ka hria a. Chuvangin Department hrang hrang hmalakna te pawh hi sawi dawn pawh ni ila sawi kim sen tak tak a ni lova, tun hun reilote chhung hian AH & Vety Department pawh a khawro em em chungin quarter te, dispensary te hmun 2-ah kan han sa ta ringawt mai a, a bak ruahmanna te min la neih sak nghe nghe a, a lawmawm hlein ka hria a.

Tin, Education Department-ah hian namen lova hnufum kan nih avang hian kan sorkar hian rusum thlak nan min hmang ta a ni tih theih khawpin hma min lak sak a. Tuna RMSA School dah turah pawh sikul 5 min han tih sak a, tin zirtirtu dahna chungchangah pawh duhsak bik bial kan ni kan ti lo thei lova, chuvangin lawmthu sawina tur hliir kan bialah hian a thleng a ni. Chuvangin kan Governor thusawi atang hian kan lawm takmeuh meuh a, ka thlawp tlat a ni tih ka'n sawi duh a ni. Ka lawm e.

**S P E A K E R** : Hun a hmang thiam hle, a lawmawm khawp mai. Tunah Pu John Siamkunga, a dawtah Pu K.Liantlinga.

**Pu JOHN SIAMKUNGA** : Pu Speaker, ka lawm e. Hei kan Governor thusawiah hian lawmthu han sawi tur tam tak karah tlema zawng chauh ka'n sawi ang a, a vai vaiin ka sawi hman dawn lova. Ti laia ka han sawi hmasak ber duh chu, a phekkhatna laia mi 'Responsive Accountable and Target Oriented Government' kha. Responsible Government emaw Accountable Government emaw hi nih a har khawp, avang chu khawvel ram 200 dawn emawah hian mawh la ngam leh mahni mawha ngai ngam, khawvel chhiat hlau sorkar pakhat a awm a, chu chu USA sorkar a ni. Remna leh muanna a awm theih nan khawvel mipuite him zawka kan chen theih nan mawh lain khawvel himna a zawng a ni. Chutiang bawkin he kan sorkar zahawmtak hi mawhphurhna la ngam a ni a, mawhphurhna la ngam a nih avangin retheite harsatna a hria a, an dinhmun hrehawm ziate a hria a, chumi a nih avang chuan kuthnathawktu mahni pawh inchawi nung thei tawh lote hi chawi chhuak ila Mizoram hi ram nuamah i siam ang u, tiin hma a la ngam a ni. Huai takin hma a la a, NLUP chu chak taka kalpui a lo ni chho ta a; mahni kut leh kea ding thei reng reng tawh lo, u leh nau pawh inpui dawn sela inpuih ngaihna awm tawh lo mi tam tak kan awm a ni. Chungte chawichhuak thei tura mirethei sorkar kan nei hi a ropui a.

Pu Speaker, i veilama mithenkhaten MIP an kalpui lai te, Jhum Control an kalpui laite kha diklo lai a awm a nih chuan inennawn mai sela, an lo hlawhtlin lohna laite kha in ennawnin leh an tihthat lohna laite kha ennawn mai sela, mi policy sawisel leh mi kaldan thalo lai pir pira an kal hi chu Zoram hmangaihna a niin kei chuan ka hre lo. A chhan chu wawinah hian mirethei budget kan pharh thin a, tunhma zawngin Zoramah miretheite tan a awm ngai lo. Wawinah erawh chuan vaibelchhe za tel a lo awm ta a ni. Kuthnathawktuten lei rem an rah theih nan leh hlim taka hmalam an pan theihna tur sawi sawp zawng leh a nilo zawnga kal talh kan tum hi chu a dikin a lang lova, chu ai chuan an lo tih tlinlohna laite kha tuam thar lehin heti hian kan kalpui zawk dawn e, ti thar thei sela a lawmawm hle ang.

Tin, kan Member zahawmtak, i veilama mi thenkhatte hi chuan ka bialah ngei pawh NLUP hi he sorkar hian a sem a nih chuan keima mimal pawisa ka pe ang che u, tih pawh an lo tiam a ni. Khangte kha an sem dawn nge, hetiang khawpa NLUP he sorkar hian a sem tawh lai hian an lo tiam tawh ang ngei khan kal se ka'n sawi duh bawka a ni. He sorkar hi mawhphur ngam sorkar a nihna hi lawmawm ka ti a, mipuite phurrit phur ngamin corruption ka do ang e, tiin he sorkar hi a kal a ni. Corruption do hi a namailo, thil har tak a ni. Harsatna tam tak he sorkar hian a tawka ve thin reng a ni. Chutiang anga theihtawp a chhuahna chu mawh phur ngam, mawh la ngam sorkar a nihna hi a ni. Chumi a nih avang chuan tuna kan sorkar chelh lai mektu kan Minister zahawmtak takte, kan Parliamentary Secretary zahawmtak takte hi corruption-ah hian "Kei zawng ka fihlim a ni", an ti ngam a ni.

Tumah inthlim kan awm loh avangin pawh pawh kan inpawh a, thian innel tak angin kan inkawm vek a ni, reng ana. Amaherawhchu, corruption do hi thil namai a nilo ka tih tawh kha. Term hmasa lamte kan thlir chuan he House zahawmtak rorelna chhungah ngei hian House zahawmna tibawrhbanga corruption vanga inbeihna te pawh a thleng a nih kha. Patling puite helai chhuatah hian bawka

vak khawpin an inum a nih kha, a zahtlak khawp. Chuvangin he sorkar hian corruption hi kan hnam chhiatna tur kawng a ni e, tiin huai takin engkim hmachhawn ngamin i do ang u, a tih hi a ropui ka ti a. Hetiang sorkar a lo ding hi a ropuiin kan Governor zahawmtak pawhin hetiang sorkar a lo ding ta leh responsive, accountable Government a ni, a rawn tih hi a tih awm reng niin ka hria a, a tilawmawm hlein ka hria a ni.

Tin, mawh la ngam sorkar a nih avangin mipuite zalen nan ram chhungah Hel, mipuite chawk buai theite an awm lohna turin na takin hma a la a ni. Chumi a nih avang chuan Mizoramah Helin mi an tibuai ngai lo. Hel inkah te a awm ngai lo ta te hi Pathian malsawmna a ni. Pathianin he sorkar hi a awmpui a, a hmalaknaah te a tanpuiin vawiin thleng hian muang takin kan la nung thei a ni. Sorkar hmasa kan en chuan Hel nen kan inchenpawlh a, tunge hlauh tur kan hre lo, khulai hmunah khuan training centre an nei a ni. ‘Chutiang/khatieng chuan an ti a ni’ kan ti anih pawn an ngaihsak lo, chu chu mipuite tana mawh la ngam sorkar a ni lo a ni. Amaherawhchu, vawiinah hian mipuite hmakhua ngaia mawhphur ngam, mawh la ngam sorkar kan nei hi a lawmawm a, kan Governor thusawi hi a sawitur reng a rawn sawi hi a ropui ka ti a, fakawm ka ti a ni.

Tin, a dang lehah chuan mawh la ngam sorkar anih avangin, mipuite harsatna tur tam tak an lo awlsam zawkna turin hma an la a. Vawiinah pawh hian NLUP avang leh WRC I leh II te kan tihchangtlun avangin buh thar chhuah alo tam ta, vawiina chanchinbuah khan mi tam takin kan hmu a ni. Lo neih lam chu nasa takin a tlahniam a, thingtlang lo neih lam, 42 percent-in a tlak hniam laiin WRC I leh II lamah kan sang thung a, 46 percent-in hma kan sawn a ni. Chumi anih avang chuan kan tharchhuah pawh a pung narawh a, 519480 Qtls laiin kum kalta khan kan thar ta reng a ni. Chuvangin he sorkarin miretheite chawikang zawnga hma a lakna hian rah tha a chhuah tan mek a, a lawmawm takzetin ka hria.

Tin, he sorkar hian eng lamah te theihtawpa hma kan lak loh chuan hetiang reng hi chuan kan changkang thei dawn lo tiin power generation lampangah hian nasa takin hma a la a ni. chumi atan chuanin hmun tam takah hma ala a, Kolodyne ah te, Lungreng Hydrel Project te, Tuirial Hydrel Project tharthawh leh te, a tam mai, 2800 megawatt vel bawrah tunah hian hma chhawp a ni. Power kan neih loh chuan kan intodelh thei lovang tih leh industry lian a ding thei lo ang tih hrechiantu sorkar kan nei hi a ropui takmeuh a, chuvangin kan Governor thusawi, power chungchang a rawn sawina phok 11-naa a lo lang ta te kha a lawmawm a, khangah khan hmalakna hrang hrang leh hmalak mekte a rawn tarlang a ni.

Tin, Buhfai chungchangah hian kan unauten niminah te pawh kawng an zawh a, harsain min sawi thin. Amaherawhchu, Congress sorkar tih phat atanga vawiin thleng hian mahni quota la thei lo leh quota lak tur awmlah lai hi a awm lo a ni. Chuvangin miten an hrereng tawh lovang tih ringa, nilo lama inpuh hi chu kan tih tur niin a lang lova. A nihna dik tak zawkah chuan hun hmasa lam te kan thlir chuan buhfaiah kan harsa, Josefa buhzem siam a ngai, khatiengin thil tamtak a awm, Gas pawh harsat lai ber kum chu khatih hun lai kha a ni. Thir khaidiatin kan thlung fer fura, Aizawlah, Gas bur ri kha a nasa hle thin a ni. Chuvangin midangte thiltih hmu liana, mahni thiltih hmu te si hi a pawt takzet a.

Tin, a tawp bera ka sawi duh chu, sumdawng lianten kan rama investment an rawn neih hi, hei hi a pawimawh takzet, kan rama tithei tute an lo loh loh chuan hetiang reng hian zoram a awm dawn a ni.

Tunah, India ram pawh alo thanna kan en chuan 1988-ah America-in Trade Sanctions min hrema, super 301 khami hmang khan min hrem ta a ni. Khami a kan tal chhuah lehna chu enge kan tih chuan kan tangkate titlawmin foreign investors-ten kan ramah an rawn sumdawn theihna turin hma kan la a ni. chumi anih avang chuan foreign company lian tak takte an rawn lut ta a. Vawiinah chuan kan awh em em thin, car company lian tak takin hmun an rawn luah tawh, Hyundai Motor te pawh Hyderabad-ah hmun an rawn luah a, Ford India Private Ltd te pawhin Chengapaltu-ah America company an ni. Tin, Mercedes Benz te pawhin Pune-ah, khatiang khanin hmun tam takah sawi tur a awm,ka sawi vek seng lo. Vawiinah hian foreign car-in Mizoram kawng hi an rawn rapin foreign car ngat kan khalh thei tawh a ni. Hei hian India ram economics-ah eng angin nge a chawisan chu kan hre tawh a ni.

Khawvela ram thangchak ber ber, China, India leh Brazil an lo ni tawh. Engvangan nge, kan tih chuan kan thiamloh thiamtena hma an rawn lak vang a ni. Vawiinah hian Ispat company-in hma an rawn lak tur te, a nilo zawnga sawichhiat hi kan tih tur a nilo. Kan thiamloh titheitute an rawn luh hian kan miten hna an hmu ang, Mizoram a changkang ang. Chu chu kan tinzawn zawk tur a ni a.

Pu Speaker, minute khat lek, tunah pawh Meidumah ONGC ten gas emaw oil emaw an laichhuak dawn. Ram chu kan hawh tir tur a ni. Kan ram hmang khan zoram hi a changkang thung tur a ni. Vawiinah hian kum 10 lek hawh tira, kum sawm dan zela extent tur hian tunge khawl ropui bun duh ang a. Tunge khawl lian pui pui rawn bun duh ang. Chuvangan kan hawiher tizau ila, Zoram kan hmangaiha Sorkar mipuite tana mawh la ngam kan nih ngai chuan Zoram thatna tur ngaihtuahin Foreign inventors-te emaw company lian Mizorama investment rawn nei tha ngamte hi kan encourage ngam dawn lawm ni tih kha ka'n sawi duh a ni e.

**S P E A K E R** : Tunah Pu K.Liantlinga ilo ko ang.

**Pu K.LIANTLINGA** : Pu Speaker, ka lawm e. ka aw hi a chhang deuh a, ka hritlang deuh a, sawi fuh loh te pawh a awm thei a. Hei vawiinah kan Governor thusawite lawmthusawina han neihte pawh a tha a. Tin, helai chu lawmna tur pawh a awm emaw ni le? tih te pawh han sawi pawh a tha a.

Hei, pakhatnaah hi chuan, 'reputation and dignity of the House and also the high standard of debate will be maintained' han tih, helai vela han sawi chhoh laite hi chu, infak hi chu a lawmawm hrim hrim a, tu tan pawh hian, han lawm loh tur chi pawh a ni lem lova, kan House zahawmnate leh debate-te State dangte kan thlir hi chuan, Parliament thleng pawha kan thlir chuan, thil tha tak leh mawihnai tak pawh a ni a, a lawmawmna laite pawh awmin ka hria a. Amaherawhchu, a thusawi thenkhatah hi chuan, han thlir thuak thuak hi chuan fimkhur a ngai deuh awm mange aw! tih te pawh ka rilruah hi chuan a awm a. Governor Speech turah hi chuan tlema han ziah dan draft-te pawh thiam deuhte pawh a ngai awm mang e. Hei inthlan chungchangte pawh an han sawi a, helai NLUP te nen pawh inchawhpawlhna lai te pawh a awm a. No.6-ah hian 'My Government is committed to have an efficient, transparent, responsive and corruption free administration' a ti a. Hei hianin helai kalphung tur zawng zawng dik leh diklo hi a hril hle dawnin ka hria. General Election, V/C leh Local Council kan neihnaah te, NLUP chungchangah candidate te, vau leh thlem te, tin, mipuite pawh nasa taka pressure han inpek te, thil tha tih hi chu thil tha tihin kal sela, tin, intih loh chuan

kan pe lovang che tih zawng ni lo hian a thain ka hria. Chu chu Press Conference-ah pawh khanin ka'n sawi hial a, mite kan inlei ang hrim a, first installment i la tawh a, i vote loh chuan 2<sup>nd</sup> installment i la thei lovang tih ang zawngte kha thil tha a nilova. Hetih lai hian Governor hi chuan an sawi mam a, inthlanna hlawhtling tak kan nei a ni, te pawh a tiin a lang thei mai a. Amaherawhchu, kha khanin corruption a free lo aniang tih kha, khatianga mite vote tura first installment lak tawh, second installment i la thei lovang tih te a invauna te, inthlemna te, candidate-te invaubeahna kha a that loh avangin, hetilai hi sawi lang tel lo law law se, a tha awm mang e, tih kha ka'n sawi lang duh a.

Tin, tunah hian point 7-naah han kal leh ta ila, Governor thusawi meuh turah Land Use beneficiaries Rs.20,000/- (cheng singhnih) te a rawn ti a, thil diklo Governor hi House-ah kan sawitir hi a paw em em a ni. Dik tak chuan member leh member-te pawhin kan inchhan dik loh palh te chuan corrigendum kan siam a paper-in House-ah te pawh kan inpe leh a. Hei hi Governor hian a rawn pe leh dawn nge? Engtingge kan tih dawn? Vawinah hian kan House hian a ngaihtuah chian a ngai viauin ka hria, kan Governor chang a mualpho lo va, he kan House a mualpho va, tin, kan House Leader pawh a mualpho a ni.

**S P E A K E R** : Ngawilaw rawh aw, Chair kan han in thlak lawk a nge.

**Pu K.LIANTLINGA** : Tunah hian cheng vaibelchhe 413.27 pawh hi a dik a ngem le? tih a ni tawh a ni, kan lo hriat danah chuan he beneficiaries hi Rs.45000/- tih te a ni si a, chuvangin Governor meuh thu kan sawi sual tir hi kan Sorkar pawh hi a fimkhur a ngai hlein ka hria a, chuvangin han lawm dawn rual rual khan a lawmawm loh a ni, kan State Head te hetiang a thu kan han sawi tir kha a paw em em in ka hria a, Chutih laiin “my government is committed to have an efficient, transparent, responsive and corruption free administration” a ti a.

Chutihlai chuan number 9-na te pawh hi han thlir ta ila, helai sentence-ah hian Horticulture Centre of Excellence at Thiak has been established wherein infrastructures are being installed for production of quality planting materials and various other needed facilities. A dawt lehah hian nurseries tihhlawhtlin a nih te a sawi a, hengte pawh hi Horticulture Department officers te, private farm vek a ni a, a siam man pawh technology mission sum vek an hmang a ni. July, 2011 khan pawisa chungchangah Bank balance-te kan dilnaah pawh khan 20 crores Bank balance Account-a awm si khan 42 lakhs chauh mai kha ka zawhnaah khanin min rawn chhang a. Tunah pawh thil diklo deuh maite hi awm theiin a lang tlat mai a, hetilaila supply an pek ringawtah pawh hian nikum hmasa khan gram 200 hi Rs.8/- man a ni a, chu bakah tlem, a commission deduction a awm hnu khan Rs. 690/- in an pek theih laiin kuminah hian Rs.1300/- in an pe a, heng an pekte hi company dik tak / manufacturing dik tak an pek lai khan a ni a, he lai difference ringawt pawh hi tunah hian heng farm siamna atan hian cheng nuai 32 vel, ni 20 vel lek chhungin an han pe a, 5 quintal vel lek a ni a, Gypsy trip khat lek a ni. Khatiang chiah khan collection fee- te pawh hi a ni thei dawn em ti a, kan ngaihtuah chian a ngai viauin ka hria a. Heti laiah pawh hian Tilak Aggitt Service Agro Division ho in Rs.690/- a an supply lai khan, tunah hian Shri Biotech hovin tun February mai khan Rs. 1300/- in an supply thei a, khatiang different nasa lutuk te kha. Tin, hengte hi manufacturing pawh an ni lova, a agency pawh an ni lova, tin, supply theihna turin engmah permission pawh neilo te an lo ni lehngal a. Khatiang lai khan kan Minister-te pawhin an hre kherlo pawh a ni thei, kan Sorkar hi a

hnathawkte lam a tanga fimkhur a ngaih ziate pawh kha han sawilan a tulin ka hria a. Tin, Farm tamtak atanga Planting materials an han pekna te pawh hi, a lehlamah chuan Sorkarin mipuite tan a ti tak tak nge ni a, Sorkar Officer-te Farm kha an ring ta mai mai khan technology mission sumte kha an tlan tlang ta mai mai ami? tihte pawh kha ngaihtuahnaah a lut thei a ni, henglai documents-te leh thildang tamtak han en hian, chung avang chuan fimkhur a ngai hlein ka hria.

Tin, hei number 10-na te pawh hi, fodder production chungchang thu te, Animal vaccination chungchang pawh hian ngun taka tih ngai chu, hemi vaccination hi Mizoram hian kan ti hlei thei lova. Tunah hian chuan, 'tha taka tih a ni e', an ti a. Bird flu te kan nei a, a damdawi kan nei lova. A vaccine pawh kan nei lova. Swine Flu te a lo leng a. Tin, Mizoram, hemi kan thlai, kan ranvulh pawh ni mai lo hian Wildlife, wildboar, sanghal kan tih ho thleng thlengin an pul puk puk mai a ni. Chuvang chuan control a ni lo a ni tihte pawh hi kan chian a ngai a. Hetiang ang damdawite pawh hi ngun taka kan thlir a ngai a. Chuvang chuan kan Governor-te pawh hi Pu Deputy Speaker, dawt kan sawi tir mai ang tihte pawh thil hlauhawm a nih avang hian helaiah hian fimkhur a ngai hle a. A then laiah chuan North East Games te kan han nei a, Sports Department-ah te chuan a lawmawm em em rualin khatiang ang chia Governor thusawi turah te, hetiang anga thil dik lo takte kan han dah thei te a nih chuan fimkhur a ngai a, tun aia uluk zawkin kan hotute pawh hian la ti leh ta ula. An Draft zawng zawngte pawh hi uluk taka en a, a tha leh tha lo awm chin hi chu hriat tur a ni. Tin, hnathawh thate hi chu tarlan tur a ni a. A tha lote chu tarlan loh mai te pawh a tha a. Amaherawhchu, a kuang nalh taka han tuam mawi a, a chhung tawp tak si hian a awm theih a ni. Chuvang chuan vawiinah hian kan Governor thusawi hi a chanve velah chuan lawmthu sawina tur chu awmin ka hria a. Amaherawhchu, a chanve velah hi chuan thil tihchian ngai, ngaihtuah chian ngai, kan Sorkar pawh a inen let vang vang ngaihna lai awmin ka hria a. Chungte chu Pu Deputy Speaker, ka'n sawi ve duh te chu a ni e, ka lawm e.

**Pu LALROBIAKA** : Pu Deputy Speaker, ka lawm e. Hei, vawiinah Larsap thusawi, Motion of Thanks kan sawi mek a ni a. Vawiinah hian sawi tur tam tak awm theiin ka hria a. A bik takin mihring kan nihphungah, lawm tum reng reng lo mai te, tha duh hauh lo te, tih Bible-in a sawi kha kan awm ni te pawhin ka'n hria a. Chung avangte chuan a tha lai hmuh tum hauh lova, a chhe lai hmuh tum talh te, a lawmawm lam hmuh tum lova, a lawmawm loh lam hmuh tum talh te tam tak kan awm te pawh hi vanduaithlak hlein ka hria a. Engpawh nise, han indem ngawt chi pawh a ni lova, kan hmuh dan a inang lo a ni mai a.

Tichuan, hei, points 6-naah khan, 'the Govt. is committed to have an efficient, transparent, responsive and corruption free administration,' han tih lai hi tlem han sawi ka'n duh a. A bik takin a transparent zia, a langtlang zia chiang takin kan hmu thei a. Chumi chhut zuina tur atan chuan mipuiten an duhna leh he Sorkara beiseina an neihte an sawichhuahna ni turin 'Mipui aw' te an han siam a. Tiang khan NIC te nena tang hovin hetiang ang han siam thei sorkarah, kan sorkar awm tawh zawng zawngah a vawikhatna, record kan break niin ka hria a, a lawmawm hlein ka hria a. Mahni sorkar sawiselte emaw a sawisel duh emaw, a thatna tur, a constructive zawnga ti duh te, tin, a lo ti duh chiah lo te pawhin an sawisel theihna ni tur atana a Forum han siam hrim hrimte pawh hi eng sorkar mah hian a la ti lo a ni tih hi a hretute, Mizoram mipuite kan ni a. Chutih rual chuan he Sorkar hi chuan chutiawng zawng zawng chu thlir chung pawhin, mipuiten he Sorkar an khalh ngil theihna tur te, he sorkar tha zawka a lokal theihna tur leh an inhmuhfiah zung zung theihna

tur atana mipuite tih ve theih tur lam tiang khan ruahmanna an siam te hi ropui ka ti a. Tin, Corruption free Administration han tih te pawh hi a namai lo a ni. Kan Minister zahawmtak takte, kan Chief Minister thlengin kan House Leader te, kan zavai mai hian vawiinah heti zawng corruption-a mualpho leh harsatna nei pakhatmah kan han awm lo te hi vawiinah hian han sawi chhuah ve hrim hrim ka duh a ni. Heng zawng zawng hi an chakna te, kan chakna te a ni lo, Pathianin he sorkarkar hi a veng a ni tih ka'n sawi tel duh a ni. A nihna takah chuan mihring theuh kan ni a, duh te chu kan ngah alawm, awm te pawh kan ngah alawm; amaherawhchu, chutiang kawng harsatna kan neilo tih vawiina kan Governor-in a rawn sawi lehzet te hi a lawmawm ka ti a, a Pathian thu ka ti a ni.

Tin, sawi tur a tam khawp mai a, a bikin Power-ah khan han sawi lut leh ila. Power chungchangah hian inhnialna a tam tawh khawp mai a, vawiinah hian he sorkar a lo din hnu hian nasa takin power-ah hmalakna a lo awm chhunzawm chho a, Sorkar hmasaah khan Congress sorkarin a lo siam tawh Tuirial Hydel Project-te pawh tihchhiat vekin a lo awm a, chutih rual chuan Tuirial kam ni lovah Champhaiah te chuan Tuirial Hydel Project House-te pawh a awm an ti tak tak ni maw, ka hre lova, chutiang hial te chu kan sorkar kal tawh kha a lo ni a. Engpawh nise, chung zawng zawngah chuan, a siam thatu ni ang che, tih ang deuh khan vawiinah hian Tuirial Hydel Project 60 megawatt-te chu an ti leh mup mup tawh a, vawiinah hian kan hlawhtling chho mai dawn pawh niin a hriat a ni. Tin, Tlawva Champhai bulah te, tin, Tuivai, Ngopa bulah te, Tuirini, Phullen bulah te Hriamhmun bulah te Lungreng kan sawi seng lovang heng zawng zawngah hian nasa taka hma laka din chhoh mek a ni. Chung a lo thlen theihna chu he sawrkar mipuiten he sorkar duhsak taka in chawimawi avang leh an tlinglo chung pawha Mizoram History siam khawpa MLA ni sela, MLA 32 lai inpek vang a ni tih hi hnial rual a ni lovang tih hi ka ngaih dan a ni. Chutiangte chu a ni a. Mihring kan nih phungah thil pawimawh tak tak a awm a, a bik takin kawng te, Electric eng te leh tui te a pawimawh ber ber te an ni. Vawiinah he sawrkar a lo din hnuin kan hmuh ang khan Eng nei ngai hauhlo ten eng an lo hmu ta a, eng thlen phak lohnaah eng a thleng ta a ni. Vawiinah khaw 570 lai mai sawrkar kal tawh atanga eng la hmu reng reng lo, tu te tih dan takah emaw Tuilet hnuah pawh la eng ngailo kha a eng tawh a ni. Chung khuate chuan an lawm zia te eng hnuai Pathian faka an han lam te an hrih fak a ni. Chutiangte chu a ni a, helaiah hian kan Governor hian a han sawi chhuak a. Tin, chumai a ni lo, chhungkaw 27417 lai mai BPL a thlawnin Electric Eng te pek an lo ni lehzet te hi achievement ropui tak a ni. He sawrkar hi mirethei hmangaihtu sawrkar a nih zia a lang Chiang hle a ni. Hei sawitur a tam khawp mai a kan sawiseng lovang.

Tin, point 19-naah khan kalkawng chungchangte an rawn sawi a, kalkawng tha zawk tunah hian kan nei mek a, a bik takin kan bialah phei chuan he sorkarah hian kan lawm ngawih ngawih a ni. MNF in kum 10 min awp a, chuti chung chuan kan kawng chhiat zia te, Pukzing pa phei chuan Pu Zoramthanga, kan Chief Minister kalta hnenah khan a han zin chho va, “Ka pu, kan lo zin chhohna tur lawngleng min pe rawh” a ti a ni. Fur laiin a lo zin chho va, a diak lutuk a, tuitling a tam lutuk a, chutiangte chu kan dinhmun a ni. Amaherawhchu, vawiinah chuan he kan sawrkar chak takin Phaileng to Marpara kawng siamna tur atan cheng nuai sangli chuang tehmeuh min han pe a, chu chuan vawiinah hian kan siam chho mek a ni. Chutiangte chu a ni a, vawiinah hian a bial ang pawhin he House-ah hian lawmthu ka'n sawi duh a ni.

Tin, Kanghmun tlangdung kan manganna thin leh Darlung te kan mangan thinna Leilawn tha tak mai te dawh zawh a ni tawh a, vawiinah chuan eng Lirthei mai pawh tlan theiin a awm tawh a, heng hmasawanna hrang hrang rawn awm chho te hi ropui kan ti a, a lawmawm kan ti takzet a ni tih kha ka'n sawi duh a.

Tin, kan sawi hmaih hauh loh tur NLUP chungchangah hian a buai lo turten rilru tak taka min lo buaipui ve hi a lawmawm ka ti a. Pu Dy. Speaker, tawi tein kan hrual mum anga min phal sak la, a buai lo turten min lo buai puia, pek chungchangah te pek thuai thuai tura min han nawrna te, he sawrkar thu leh hla kan han hriate hi a that zia leh chutih rual chuan sawrkar kal tawhina vawiin thlenga mi retheite tana policy a neih loh zia leh vawiina an policy an pho chhuah chu NLUP sawichhiat a ni ringawt mai a ni. Chungte chu anih avangin kan ti fuh a, Pathian lam kan tang a ni tih hi ka ngaih dan a ni a. He Governor thusawi hi a ropui ka ti a, a lawmawm ka ti takzet a ni. Pu Dy Speaker, ka lawm e.

**Pu K. LALRINTHANGA :** Pu Dy. Speaker, ka lawm e. Hei vawiinah nimin lama kan Governor zahawmtak thusawi lawmthu sawina a sawina hun remchang ka neih theih avangin lawmawm ka ti a, kan member puite khan a hma lam pang atang khan an han sawi hlawm a, a tawp lam atang khan han tan ve tha riauin ka hria a. A tawp lam pang kha a tlangpuiin an sawi hman lo deuh zel a ni a.

Ka sawi hmasak ber duh chu Tourism chungchang No 31-na, State Institute of Hotel Management sak chungchang kha a ni a, kha kha a zo lek lek tawh tihte kan lo ngaithla a ni a. Tourist chungchangah hian Mizoramah Tourist Lodge hmun hrang hrangah kan nei a. Kan Minister tawngkam ka hriatah chuan kan manganna chu management chungchangah hian a ni a ti a. Hnathawktute hian an hlawh turte hi an thawk chhuak vak thin lo ni awm tak a ni. Chutiange anih avang chuan kan sawrkar chuan State Institute of Hotel Management building alo sa reng mai alo ni a. Hemi atang hian Tourist Lodge-te leh Highway Restaurant kan han tih te khang enkawltu turte an lo piang chhuak ang a, management fel tak mai an nei chho thei turah ka ngai a. Chutiang anih chuan kan mipuiten, ‘change’ kan mamawhna , Mizoram sum leh pai , sawrkar sum leh pai inpawh siak tum ringawt maia kan awm hi a lo tawp ang a, mahni manage-in an lo intung nung ve thei tawh ang a, chutiang chuan danglamna nasa tak a awm thei turah ka ngai a ni. Chutih rual chuan keini Serlui bialah te pawh Tourist Lodge mi sak sak tumin ruahmanna an lo siam mek tih he House-ah hian han tarlan ve reng reng thain ka hria a, lawmthu sawi pawh thain ka hria a. Cheng vaibelchhe 3.8 vel niin ka hria, central sawrkar atangin sanction an lo hmu diam tawh mai alo ni a, Serlui ‘B’Hydel Project tunhmaa sawrkar kal tawhin a to lutuk mipui hnena kan hralhna tur a to dawn lutuk a kan chhonzawm duh lo a ni an tih sorkar lo piang, kal leh ta compensation nasa lutuk duh avanga an chhonzawm leh tak kha hman hleih theih loha awm chungin tunah chuan Tourism Department atangin hman tangkai tumna alo piang chhova. Chutiang chuan Serlui bialah tourist hipna tur hmun pawimawh tak mai kan han siam sak thei dawn a ni a, lawmawm ka ti hle a ni.

Para 30-naah khan Forest Department chungchang kha han sawi leh ta ila. Helaiyah hian thil danglam deuh a piangin ka hria Bamboo plantation hi 1600 hectares, non-forest area leh 5150 hectares forest area-ah khan tihbelh a ni a, chutianga tihbelh a lo nih chuanin he House hian hria se thaa ka hriat chu, sorkar kalta a Chief Minister tuipei em em a kha, he sorkar hian a chhonzawm sak a ni tih han puan thain ka hria a.

Nichinah kan opposition member pakhat khan Sports Department lam hmalaknate pawh kha kan hunlaia kan tan a ni ti ang zawng khan a rawn sawi a. Sorkar hmasa thil tih kha he sorkar hian thil tha anih chuan a chhonzawm duh zel a ni. Tunhmaa mipuiin an sawi thin “sorkar hmasa thil tihte an chhonzawm duhlo” ti a an sawi thin kha a lo tawp ta a. Tunah chuan sorkar thar chuanin sorkar hmasa thil



tihthatte alo awm anih chuan an chhunzawm zel duh a ni tih kha a lo piang ta a, thil danglam tak alo piang chhuak leh ta a ni tih ka sawi duh a.

NLUP atangin chhungkaw 10740 tan 21480 hectre lai mai kum 5 chhunga Mau hmun atana cover tum a ni tih a lo ni ta zel a. Hmanni khan PAC kan zin a, South India-ah te kan kal a. Ruling Party Member-te leh Opposition Party lama Member-te kan kal hova. Kan Chief Minister kalchhuak ta kha Lengpui Airport-ah alo kal ve a, kan zingah minute 10 vel a lo thu ve a. Chumia a tuipei ber chu Mau hi a ni a. Chu a tuipei ber, Mau chu NLUP atang pawhin kan tuipei ve dawn a ni tih kha ka tarlang duh a, chumi anih avang chuan kan Governor thusawi atang hian a lawmawm em em a ni tih ka'n tarlang duh a ni.

Trade & Commerce chungchangah hian infrastructure hi sorkar-in a lo din chho hle tawh a ni a, Tlabung-ah Rs. 108.07 lakhs in hmun an lo buatsaih a, an lo commission daih tawh a ni tih kha para 28-ah khan a inziak a, Zokhawthar ami pawh commission mai theihin an buatsaih der tawh a ni tih kan lo hria a, chungte avang chuan lawmawm hlein ka hria a.

Para 23-na Supplies Department chungchangah khan tarlan tul ka tih em em mai chu APL atan hian normal allocation-ah 2841 metric tone anih lain 1600 metric tone November leh December-ah kan Minister hian a lo sawichhuah belh a. Tin, 6001.4 metric tone February, 2012 khan a lo sawichhuah belh leh ta a, BPL atangin 1470 metric tone normal allocation ni thin kha 5000 metric tone leh OMSS atangin 3000 metric tone lai mai a lo sawichhuah belh leh hi a ropui em em mai a, Mizoram mipuite tan nasa takin hna a thawk a ni tih kha a lang a. Chung chuan lawmthu sawina tur kan nei a ni tih a tarlang a. Hun kal tawha kan hriat chu Gas tlaivar var a chan te, lungtum intlar te kha a ni a. Khangte kha chu kan khum tawh hle a ni tih kha a tarlan theihin ka hria.

Power & Electricity Department hi han tarlang leh ta ila. Helaiia ziahlan kan belhkhawm zung zung a, 2201 Mega watts lai mai sorkarin khuah turin hma alo la mek a ni tih alo lang a. Thil lo danglam leh ta em em mai chu sorkar hmasaah khan chuan Tuirial Hydel Project chu bandh avangin tihtawp a ni tih kha a ni a. Tunah chuan tihtawp a ni tih ni lovin 2201.46 mega watts zet mai pechhuak thei khuah turin hmalak a ni a. A then chu hmalak tawhin agreement te pawh sign theih a ni a. Heng Tuivai, Lungreng, Chhimtuipei, Mat, Kolodyne tih vel kha han belhkhawmin 2201 MW lai mai alo tling khawm a. Chungte chu tiang hian han ngaihtuah ta ila, tun dinhmunah hian Mizoram hian 75 mega watt kan mamawh san lai berin kan mamawh a ni tih kan hotuten an sawi thin a. Chutiange anih rual chuan 75 chu 2201 atang khan han paih ta ila, a bak zawng kha chu hralhchhuakin Zoram revenue atante engemaw zat a lo chhuak thei a ni tih a lang reng mai.

Tin, pakhat sawi loh theih loh Pu Dy.Speaker, ka'n tarlan duh chu General Election, Local Council leh V/C election kha tlem te han tarlan ka duh ve a. Hei, peaceful takin inthlanna kan nei a, kan Governor thusawia a lan danah chuan V/C ah 76.54% in vote an thlak a, chu chu record a lo ni a. Local Council-ah 68.33% in an thlak a, khatiang khan a lawmawm em em a ni. Tuna thil lang ta, danglam ta em em mai chu harsatna, buaina engmah awm lovin kan inthlang a. V/C inthlan hmasakah te kha chuan kan Chief Minister kal chhuak ta te kha chuan mi hmingte pawhin vote an thlak duh a, khatiang ang chi kha tunah chuan a awm tawh lo reng reng. Mi tumahin mi hminga vote thlak tum pawh an awm tawh lo. Chuvang chuan lawmthu sawi hi a tulin ka hria a, ka lawm e.

**DEPUTY SPEAKER** : Ruling lam atangin phar an awm nual nang a, a phar hmasa bawka, a inchhawk deuh te pawh a ni ang a, Pu P.P.Thawla ilo sawm ang.

**Pu P.P.THAWLA** : Pu Dy. Speaker, ka lawm e. Kan Governor zahawm tak maiin kan House-a a thusawi vawikhatna chungchangah member zahawm tak Pu Selthuama'n lawmthu sawi motion a rawn putluh hi a lawmawm lo tawp e tihna lam chu a ni miah lova. Amaherawhchu, lawmawm tia han pawm liam mai rem si lo point engemaw zat han sawichhuah ve ka duh a.

Pakhatna atan para 7-na, NLUP chungchang thuah hian Election campaign lai hian NLUP hi a vote-tu apiangte hnena pek tur tiha zawrh a awm lem lova. Sorkar huna chhungkaw tin hnenah nuai 1 theuh pek tur tih kha mipuiten kan lo hriat ve dan leh kan lo beisei, kan lo thlir dan kha a ni a. Chu chu he sorkar kum 2 lai vel a liam hnuah nikum khan January ni 14 ah Launching Programme neih a ni a, kum 1 vel chu sem a lo ni ta a. Hemi atan hian pawisa dah chu vaibelchhe 234 vawikhatna atan tih te kan lo hmelhriat a. A sem chungchangah erawh chuan kei thingtlang lam bialtu ka ni bawka, mipuiten phur taka an lo thlir ang chi kha chu a tak takah chuan a thleng lo a ni tih kha a hriat hle a. Hei hianin ram pum mihring, rorel lai party bik leh bik lo te inthliarna nasa tak kan Zoram chhungah hian a hrin niin a lang a. Chuvang chuan policy tha tak anga lang kha mipuite rilru tibuaitu leh tikalsualtu mai alo ni mai lo maw tih ngaihtuahna mi a siamsak a. Chuvang chuan, NLUP chungchangah hian lawmthu han sawi mai hi chu harsa ka ti hle a. Tin, mi tam tak chu dawn zat alo inruah lova, tin a dawng tawhte trade tihdanglam sakte a lo ni a. Chuvang chuan, a kal fuh dawn em aw tih te min ngaihtuah tir a ni. Tin, NLUP-ah hian pawisa a tam hle mai a. Hetah hian corruption thui tak a inzep mai ang a tih ngaihtuahnate pawh mi a siam sak bawka. NLUP chungchang thuah hian ngaihtuahna thui tak mi neih tir a ni.

Tin, para 10-naah hian, kan Governor zahawm tak khan thingtlang lam mite khawsak tihhmasawn nan Vety. Deptt. hmang hian hma nasa taka lak a ni tih a rawn tarlang a. A thuah hi chuan a tha hlein a lang. Amaherawhchu, Mizoram UT, sorkar kum 14 a nih hun chhunga ram tana hma a lo lak tawh, ran vulh lampanga thingtlang mite kan lo intodelh theihna tur atana VFA post a lo dah tawh te, quarter a lo dah tawh te, SDVO post a lo dah tawh te, Surveillance post a lo dah tawhte zawng zawng kha vawiinah hian state, kum 25 lai kan kal tawh hnuah, tun sorkar thleng pawh hian hmel thar leh hmasawna thar hmuh tur awm lovin ka hria a. Chuvang chuan thingtlang lam mi chu Vety. Deptt. hi kan beisei angin an che lo hleah kan ngai a, pawh kan ti em em a ni. Chuvang chuan kan Governor thusawi kha zahawm hle mahse, Vety. Deptt. hmanga thingtlang mite tihhmasawn tumna lai kha a lang Chiang lo hlein ka hria a, chuvangin, kha kha ka han tarlang ve duh a ni.

Tin, a dawt lehah chuan para 13-naah hian ka han sawi duh a, District Council chungchangah kan Governor zahawmtak hi December 17 kha ni tain ka hria a, ka sawi sual lovang chu maw, mimal takin hun rei tak kan inkawm a, mimal chungchang thu te, Council kan lo neih dan chungchang thu te leh vawiin thlenga kan chan chungchang thute thui tak inkawmna kan lo nei ve tawh a. District Council member pek belh kan lo nih pawha ram mipuite kan phu tawka pek mai kha tha ka tih thu te, tin, MDF MLA ka ni bawka, Delimitation Committee-ah min telh ve ang che ka tih lai thute kha a tak a lo thlen chuan hriat tur a awm ta lova. Party pahnih/pathum Council huam chhungah kan awm a, MDF chu telh kan ni lova.

Lehlamah chuan District Council atan chuan party recognized kan ni pha ve main kan hria a, MLA kan lo tlin pawhin PP Thawla, MDF tiin tarlan a ni thova. Delimitation Committee-a telh kan nilo te kha a lawmawm lo hlein ka hria a.

Tin, chubakah Council member pathum pek belh kan nihte hi kan population-in a mamawh em em lam ai chuan tuna sorkar kal lai hi party pahnih/pathum tlankhawm Congress sorkar siam a ni a. Chuvang chuan inthlan a hnai tawh si a, sorkar leh theih nan dan thar ngaihtuah a, bial pumpui hi siamthat tumna mai niin a lang a. Council member kan neih tharte hi a lawmawm tur angin a lawmawm lovin ka hria a ni. Complaint hun a la tawp lova, chuvang chuan party hrang hrang atangte leh VC hrang hrang atangin complaint a lut teuhvin ka ring a. Chungte chu sorkar hian a ngaipawimawh angem le tihte ka ngaihtuah a ni. District Council-te hi kan sum chan hi a tam lova, Zoram pumpui population nuai 10 kan nih atanga Council pathumten percent kan lo siam ve dan, kan mipui tam lam, kan chan tur zat Zoram Budget atanga semin kan chang pha lo hlein kan hria. Chuvang chuan helai chungchang thuah hian a lawmawm tawk lo hlein ka hria a ni. Tin, kan Council kalphung hi sorkar hnate kan siam kan siam a, Plan sum, kan Council huam chhung tihhmasawna tur sumte hi kan lo nei daih tawh lo te hian a lang a. Kan kalphung hi siamthat tul hlein ka hria. Chu chu ka han tarlang duh bawk a.

Tin, kum 2002-ah khan tuna CCB Rules, Constitution and Conduct of Business Rules hi siam a ni. 1974 Council kan lo nih a, rules kan neih hmasak ber chu state sorkar siam tur a ni a, Constitution dan angin. Kha CCB Rules kha chu kum sawm a kal tawh hnuah Council hotuten kan dan hi Constitution phal angin keimahni'n kan in legislate a ngai, kan insiamthat a ngai a ni tia an lo siam thin kha State sorkar hian a lo pawm duh thin lova. Amaherawhchu, kum 2000-ah ka'n CEM lawk a, kan han tla leh a, a kar laklawkah khan 2002-ah khan CCB Rules thar a lo chhuak a. Chu chu keimahni'na kan in legislate a ni lo, kan pawm lo, court-ah kan khing dawn te kan ti hial a, kan bengchheng viau a ni. Mahse, sum te a ngai thin a, kan duhthusamin kan ti thei lova. Chu chu a kal zel a, tunhnaiah pawh khan kan CCB Rules kha tihdanglam tum ila, engtinngge siamthat a nih ang tihte a a nih laiin kan CCB Rules tuna siamthatna lai pawh kha Ruling sorkarin Governor thuneihna lam atanga passed luh tir a ni mai lo maw aw tih ngaihtuahna mi siamsak a, a ram mipui NGO a ni emaw Kohhran a ni emaw hruaitu hrang hrangte lungual taka hei hi rorel laite siamtir nilovin state sorkar thuneihna dan zawh loh avanga siam luihtir mai te niin kan lo hria a. Chuvangin District Council tihhmasawna tur atana kan Governor zahawm takin hma thar la ni anga a rawn tarlante kha a lawmawm tawk lo hlein ka hria a, tha lo ka ti em em a ni.

Tin, para 18-naah hianin sawi duh tlemte ka nei a, power chungchangah Saiha District huamchhungah hian Tuisumpui Hydro kan nei tawh a, 1995 khan commission a ni a. Commission atanga hmang hman lovin chhiatna rapthlak thleng khan a tichhe zo vek tawh a. Tin, a aia ropui zawk Tuipang Lui Hydro siam a ni a, sorkar hmasa khan a commission zet a, mahse tuna thu hnukung ber ta chu a chhe leh vek a, siamtha tur chuanin nuai zahnih chuang a ngai ang tih kha chianguang lo deuha ka hriat kha a ni a, ka mit ngeiin ka zu hmu hman bawk silova, chu chu kan dinhmun a ni.

RGGY lampangin hma min lak sak a BP tam tak connection nei anga kan ngaihtlakte pawh kha a lawmawm viau rualin RGGY tena electric eng kan neih

theihna tura hma min laksak dan hi a khamawm lo lutuk a, an chak lo lutuk a, generator khawl min pekte hi a power a tlem lutuk a thingtlang khua khawi emaw laite chu a lo chhe leh hman zel a, chuvang chuan hei hi a tha tawk lo hlein ka hria a, power thingtlang lamah kan kham lo em em a ni.

Tuna Kolodyne river-a power tam tawk tak siam chhuak thei tur siam tura ruahmanna kal mekte hi kan thlir reng thin a, hmalak dan hi a chak tawk lo hlein kan hria a, hei hi Lai District Council leh Mara Autonomous District Council-te chuanin helai hi power siamchhuah anih chuan keini District Council pahnihte kan huam chin ram zau tak a aw h avangin hlawkna te, engzat percent nge kan lo ei ve tur ni ang tih chu Mizoram sorkar thatna beiseiin kan thlir reng thin. Amaherawhchu, agreement siam tawhah chuan kan chan ve turte hi a land development compensate bawr velah khan a tawp mai dawn ni tein kan hria a, chuvang chuan hengte pawh hi siamthat anih loh chuan hetia tlingtlak mai anih chuan a tha lovang tih kan hlauthawng em em bawk a ni.

Tin, Pu Dy. Speaker, para 23-naah Supply chungchang thu hi tlem han sawi ve ka duh a, hei a bik takin Zoram pumpui leh thingtlang lamah Gas-ah kan harsa em em a, tin, thingtlang ka zin kual velna a ka hriat pakhat chu Ration Card pakhat hianin chini hi 1 Kg anih chuan 1 Kg. vek pek mai, 2 Kgs. anih chuan 2 Kgs. vek pek a ni mai a, chhungkaw member 10 awmna ration card leh member 2 lek awmna ration card, card khat chan kha a inang reng mai a, hetiang hian Mizoram sorkar hian min sem a ni tih tawngkam ka hre zeuh zeuh a, chungte pawh chu en that ni leh se, chuti chuan Supply Department leh Zoram pumpui tana a hmalakna lai hi a lawmawm lehzuang a, tuna kan awmdan leh chantawkah hi chuan a lawmawm tawk lo hle a ni tih kha ka han tarlang duh bawk a.

Tin, chubakah kan Aizawl khawpuiah pawh Gas harsat zia chu keini MLA-te letter head hi a hlu hle dawn emaw kan tih laiin a chang chuan kan letter head-in awmzia a neih loh em em tum te a awm a, chuvang chuan Gas kan harsa hle a ni tih a hriat maiin ka hria a. Chuvang chuan hengah te pawh hian sorkar tan nasa taka tan lak a tul hle bawkin ka hria a ni.

Tin, para 11-naah tlemte han tarlan leh ka duh a. Sangha Dil siam chungchanga Zoram mipuite eizawnaah hian thingtlang lamah te pawh sangha dil siama eizawng an la tam hle a, NLUP bikah hian sangha dila eizawn thlang an tam nge tam lo ka hre miah lova. Amaherawhchu, sangha dil chungchang thua hian Planning Department lam atangte alo ni emaw, Sorkar thuneitu hrim hrimin keimahni Mara Autonomous District Council chhunga sangha dil min enkawl dan hi a chi pekna tur sum an dah teuh a, mahse a chi hi chu a tak tak chuan cheng nuai 50 man pawisa dah anih chuan nuai 5 man vel sangha chi hi kan hmu emaw tih mai tur a ni. Tin, nuai 50 man em em sangha chi kan mamawh pawhin a lang lo bawk a. Chuvang chuan sangha dil hmanga eizawna chungchang pawh hi uluk lehzuang ngaihtuah atan a tha hlein ka hria a, ka tarlang duh bawk a ni. Pu Dy. Speaker ka lawm e.

**DEPUTY SPEAKER** : Tunah chuan Pu Lal Thanzara ilo sawm ang.

**Pu LAL THANZARA** : Pu Dy. Speaker, ka lawm e. Hei Governor thusawi, member zahawmtakin Motion of Thanks a rawn putluh hi tawi tea han thlawp ve ka duh a. A hmasa berin ram ralmuang kan nihna anga kan ram chhunga dan leh thupek kenkawhna tha tak kalpui chhoh a nihna a rawn tarlan te hi a lawmawmin ka hria a. Tin, chumi piah lampangah hei heta a ziah ang hianin Mizoram hi Crime & Criminal Tracking and Network System Project hi ram chhungah (India ramah) a han tipuitling hmasa pawl kan lo nite hi a lawmawmin ka hria a. Tin, chumi piah lampangah chuan chanchinbuahte kan hmuh thin angin, Anti- Human Trafficking, hemi Human Trafficking chungchangah te inbumna avanga nawhchi inzawrhitrna lampang kawnga hmalakna awm thinah te pawh, keini Mizo hoin kan lo tawn hriat chhoh veah te pawh kan police-ten Mumbai khawpui atangten, Pune khawpui atangte a, hetiang lampanga hma la tute an zuk thur chhuak nalh nalh thei a, an zuk man chhuak zung zung thei te hi a ropuiin kan Mizo nula te, buma awmte an han chhan chhuak zung zung thei te hi a lawmawm ka ti a.

Tin, hei Land Use chungchang hi sawi a tam a, uluk zawka sem tum a nih vanga sem har deuhin, i vei lama mite khan in va sem har ve an ti a, kan han sem uar deuhin in sem dur dur si, an han ti leh a, tiang khanin NLUP chungchangah hi chuanin, a that em avangin i veilama mite kha chuanin a sawimawi lampang hi chu an tih loh tur hrim hrim niah an dah ni khan ka hria a. Tin, helaia han ziah sual te pawh hi, sing hnih, an tih te pawh hi ziah sual rau rauah chuan singli leh sang nga lo ni zawk ta ang te kha chu a lawmawm thlawt a ni lawm maw ni le, tih te ka ngaihtuah a, ziah sual alo nihna vanga sawrkar han dem chiamna tur pawh hi a awm lem em maw ni le, tih te ka ngaihtuah a.

Tin, hei Mizoramin kan chhiatpui ber, hawpkhawp kan thlawhchhuah phah chuang silova, kumtin maia Lo kan vat a, kan hal chhe thin te tihtawp a lo nihna tura Horticulture Department-in hma an lak chhohna leh NLUP Scheme hnuaiia tiang anga kal mekte hi thil ro tling, Mizoramah he sawrkar hianin hmalakna a siam a ni tihte a tarlang Chiang hlein ka hria a, churang chuan helaia Governor thusawite hi lawmawm ka ti em em a ni.

Tin, Fishery lampangah te, heta kan hmuh ang hian NLUP hnuaiiah chhungkua 1445 te an khuh dawn a, chumi piah lampangah chuanin Metric tone 2373 sangha leh Metric tone 60, kaikuang thar chhuak tura hmalakna awm mekte hi ha hipa sawi tham niin ka hria a, a lawmawm takzet zetin ka hria a ni.

Tin, infiamna lamah chuan tiang khawp hian vawiinah kan sawrkar, kan Chief Minister leh kan Sports Minister-te hmalaknain nasa takin thalaite tan infiamna lamah kawng a hawng chho mek zel a. Hmanni lawk khan All India Football Federation-in meeting an ko a, chutah chuan Mizoram Football Association-a kan Hon'ble Secretary a zu tel ve a, chuta an meeting-naah chuanin Mizoram chuanin artificial grass hmun thumah kan phah tawh asin, tiin a zu sawi a. All India Football Federation-a hotute hianin chumi an hriat chuan mak an ti em em a, chutiang a nih chuan, All India Football Tournament-te pawh in thlen ve dan tur ngaihtuah tur anih chu, tiin an lo sawipui nghe nghe a ni. Tin, AIFF President Pi Prafula Patel-in "Thalaite zawk, naupang zawkte hi football lamah hianin hmasawna tur kawngah chher chhoh kan tum dawn a ni" a ti a. Chumi awmzia chu vawiinah kan Sport Department-ten 'Catch them Young' tia hma an lo lakna hi kan chhawr chho dawnin tunah hian a tak ram a chang chho dawn mek niin ka hria. Federation of International Football Association (FIFA) hnuaiiah hianin Grassroot Project Mizoramah hianin an rawn din dawn a, chumi chuanin naupang kum 14 chin hnuai lam pang leh an aia naupang zawkte training an rawn pe

dawn a ni. Chuangte chu vawiinah Sport lamin hma nasa taka a lakna zar zel a niin a lang a, a lawmawm takzet zet a ni.

Tin, mitinin kan mamawh leh chanchinbuahte pawh kan ziah tam em em Power chungchangte pawh he Sorkarin a hmalakna chu chiang kuang takin kan Governor hianin a rawn tarlang a, Tuivai Megawatt 210 pechhuak thei tur chungchangah te pawh hian vawiinah chuanin Ministry of Finance-in tih tura kan State te a rawn tih zawng zawngte chu tih zawh a ni tawh a. Tichuan Farm 7 ten tender an rawn chhang tawh a ni. Tunah hianin Department of Economic Affairs, Ministry of Finance hnuaiyah henga thil tul zawng zawng hi naktuk naktip maiah kan Engineer-in-Chief-in a keng thla dawn a, tun atanga reiloteah hemi hnathawktu tur hi thlan fel mai theihin hna hi tan mai turin hmalak mek a ni.

Tin, East Tuipui bialtu kha lawmthu sawi mai tur emaw ka tih laiin, a vuithu a la sawi zawk mah kha a mak ka ti angreng a. A chhan chu a ma bial chhung Khawbungah vawiinah hian Power Department-ten inbun tumin EE Office te, Office dang dang SDO te leh an Quarter turte kan sa zo deuhthaw tawh a, tun atanga reiloteah hian hawn mai theihin a awm dawn a ni. A chhan chu Tlawva Hydel Project Megawatt 5 pechhuak thei khilayah khian bul kan tan dawn a. Contractor turte pawh thlanfel a ni tawh a ni. Chutiang chuan vawiinah hian chak takin Power lampangah te hma kan lak lai hianin a concerned, a bialtu MLA te hi chaunin lawmthu an sawi mai dawn emaw kan tih laiin hlauhthawnnain a la khat a, hengte hi kan tipuitling tak tak dawn a ni. “Lamsial kan abandon tawh a”, te a rawn ti a, Lamsial hi vawiinah hian abandon tumna (tinsan tumna) a awm lo a ni. Thal lai a ni a, churang chuan tui duh angin a tam tawh lova, churang chuan vawiinah hian he project run theih a ni lova. Tin, an bialtu MLA khanin SDO te pawh sawn chhuah tumna a awm nia a hriatte kha a hresual anih ka ring a. Vawiinah hian Farkawn hmuna kan Power SDO te sawn chhuah tumna a awmlo a ni tih kha ka’n sawi duh a. Niminpiyah vel lawk maiah khanin Lungreng, megawatt 815 leh Chhimtuipui megawatt 635 pechhuak thei tur hemi project chungchang hi Ministry of External Affairs leh Burma sorkar leh NEEPCO ten engtinng hmalak anih ang tih ngaihtuahnate an sawiho tawh a. Vawiinah chuan an inkawmkhawmna minute kan nghak mek a, hemi lampangah te pawh hianin chak taka hmalak chhoh mek zel a ni.

Tin, chanchinbuahte hian kan tarlang tam hle tak na a, current chungchangte pawh hi Loktak Project neitu Manipur te leh Meghalaya khulaia Project lianpui neitute khuan an khawpuiah khuan henga chanchinbua ziak peih deuh deuh te hi han kal ve sela, Aizawl khawpui ai hian current (power) hi an nei tha biklo a ni tih hi an hmuh ve mai ka ring. Tunah hian Serlui B atang hian megawatt 7 vel kan hmu a, chumi tih loh chu kan ram atang hian thal lai anih avang hian Power siamchhuah kan nei lo a ni. Chuti chung chuan vawiinah hian Meghalaya khawpuite, Imphal khawpuite ai chuan Mizoram khawpui leh Mizoram pumpuiah hian eng (current) hi kan nei tha zawk em em a ni.

Tin, kawng chungchangah pawh ka Pu, PWD hmalak hi vawiinah chiangkuang takin ziakin tarlan a ni a, a copy kan nei theuh a, ka chhiar tawh lo ang a. Vawiinah hian Sumo khalh thin Driver-te hi Aizawl tangin Guwahati-ah te an kal a, chutiang zelin Assam te, Meghalaya te an paltlang a ni. A khalhtute leh passenger-te hian sawi duh nisela chuan, Mizoram khaw chhung aia kawng tha hi State dangah hian khawiahmah hmuh tur a awm lova. Imphal khawpuiah te phei chuan han kal selangin kan rama kawng sawiselute hianin an sim hlauh ka ring a ni. Chutiang khawp chuanin kan ram kawng hi duhthusam nilo mahsela kan chhehvel India hmarchhak kawngte ai chuan kan ram kawngte hi nasa fein a tha zawk a ni tih kha ka’n sawi duh

a. Chuvangin vawiina Governor thusawi lawmawm taka lawmthu sawina Motion an rawn chhawp chhuah hi lawm takin ka thlawp a ni, ka lawm e, Pu Deputy Speaker.

**DEPUTY SPEAKER** : Phar hmasak dan indawtin aw, Pu R. Lalzirliana.

**Pu R. LALZIRLIANA, MINISTER** : Ka lawm e, Pu Deputy Speaker. Hei, kan Governor thusawi sawihona kan han nei a, a bengvar thlak khawp mai a, Governor hi Politician a ni a, tawi tek tawk, zahawm tawk, keini ang mutthluk san lohna khawp vel a rawn sawi a, a thu erawh hi chu a tha hlein ka hria a. Tam tak sawi duh pawh ka nei lova, tamtak sawi ngai pawh ka ti lova, kan Member-ten an la sawi zel ang a.

Hei, kan MLA zahawmtak Pu Thlenga'n nichina a sawi kha ni 100 inhlawhna turah ni 86 chauh inhlawh a ni, ni 14 inhlawhna hi khawiah nge tih kha sanction kan hmu chiah a. Chuvangin, ni 14 hi chu kan inhlawh leh mai dawn a ni tih kha ka'n hrilh duh a.

Tichuan, han din takah chuan kum 10 zet power holiday kan nei a, power siam lamah holiday kan hman tawh a Sorkar kha. Chuvangin, vawinah hian kan hotuten Pu Lal Thanhawla, kan House Leader chakna zarah Tuirialte kan han chhonzawm leh tawh a ni a, nitina en tur hian kal an chak tawh a. Chutiang piaphlamah chuan nichinah khan kan hria a, hun engemaw an kal leh hlek ang a, tunah chuan power tam tak vaibelchhe 500/600 revenue kan lak leh theihna mai tur hi kan hma-ah hian a awm reng tawh a ni tih hi a lang a, chung hun thlen hunah chuan Education atangin hlawh kan nei lo a ni tihte, eng eng emaw kan phunchiarna hi min lo puhruk ve theih tawh kan ngai a, chung hun thlen hun chu a nghahhlelawm hlein ka hria a, chulai te chu ka'n sawi ve duh zawk a.

Tin, NLUP te leh thildang kan Sorkar hmalakna Agriculture te, Horticulture te hmalakna atangin kan lo neih, kum tina lo kan vah thin 42% laia a lo tlahniam ta hi achievement ropui tak niin ka hria a, hei hi kan rama thing leh mau, ngaw, hnim hring tam zawk kan lo neih leh theihna tur atan te leh tuihna tha zawk kan lo neih leh theihna tur atan heng hi thil pawimawh tak niin ka hria a, a lawmawm ka ti a, lawmthu sawi loh theih loh niin ka hria a, Governor thusawi atang hian.

Tin, chumi azarah chuan 42% lai kumtin lo vah a lo tlakhniam tak bakah kuminah hian kan Thlawhna te pawh hi lo hal khu avangin a lo thlawk thei lova a tum thei lo tihte pawh kum dang anglo tak maiin kan han hre ta lo te hi hmasawna ropui tak niin ka hria a, a lawmawm kan ti takzet zet a ni.

Sorkar hmasa lamah khan, 'Missionary nuai 1 kan thawn chhuak ang', tih te, 'Contractor sing 1 kan mamawh belh dawn a ni' tih te kha kan hria a, a lawmawm khawp mai a. Christian ram, Pathian zawn chhuah ram kan ni a, Missionary nuai 1 thawn chhuahte hi kan tihtur reng a ni a, an tum pawh kha a lawmawm pawh ka ti a, tha pawh ka ti a. Amaherawhchu, chutiang thawn chhuak tur chuan kut dawh sorkar emaw intodelh lo chhungkua emaw atang chuan a harsa a ni tih he sorkar hi chuan a hria a, chuvangin chutiang ang tih theihna tur chuan NLUP te mitin intodelhna tur atana hma kan sorkarin a la chho hi ropui ka ti a. NLUP ti tak taktute chu an lo

intodelh chho ang a, asset an tu leh fate tan an lo siam ang a, chuta tang chuan kuminah ringawt pawh hian NLUP atanga hmunphiah heti zat quintal tam tak kan han thawm chhuak thei ta hrim hrim pawh hi ropui ka ti a, chung atang chuan sorkar hmasain an lo duhthusam, an lo tum, missionary nuai khat kan thawm chhuak ang a tih te pawh kha a tihpuitlinna chu he sorkar kutah hian a awm chho ni te pawn ka hria a, a lawmawm te pawh ka ti khawp mai a, an lo tum ve te pawh kha kan hotuten sorkar hmasa thil tumte tihlawhtling tura hma an la chho te pawh hi a ropui ka ti a.

Tin, chu lo ka sawi leh duh chu, thangtharte tana vawiina kan sorkar Pu Lal Thanhawla kaihhruai leh kan Sport Minister nen a ngaihna hriain thangtharte tana vawiina hma an han la chho hi ropui ka ti takzet a. Nimpiniah lawk khan Hawla Stadium, Pitarte tlang ami, khu aia in lian khu kan nei angem aw, Mizoramah hian ka hre lova, chutiang ang khawpa tha leh rintlak chu kan han hawng thei ta te kha ropui ka ti a, khu khuan kan thalaite nasa takin a build up chho dawn a, taksa lama changkanna chauh nilovin rilru lama changkanna te, YMA thu vawn “Hun awl hman that” tih te khungah khuanin kan han zir chho dawn a ni a. Kan taksa a lo hrisel ang a, kan rilru a lo hrisel bawk ang a, a tawpah chuan sum hmuh nan kan thalaiten an hmang chho dawn a ni tih a lang reng mai a, ropui ka ti a. Chutiang ang tiat zet tur chu sawlaih nimin lawk khan a lungphum phumin kan Chief Minister-in Mualpuiah hun a va hmang lehngal a, chutiang ang kan neih hunah phei chuan tuna Mualpuia police ram kan han pek tak Stadium-te kan han peih zawh hun chuan National Sports te pawh hi kan thleng thei dawn ni te pawhin alang a, a nghahhlehawm tawh hle a ni. Chutiang ang chuan artificial turf tunah hian Thuamluaia Mual, Lungleiah phah zawh tawh a ni a, tin, hockey field te nen lehzel Kawnpuiiah kan han nei thei ta te hi a vanneih thlak ka ti a. Rajiv Gandhi Stadium niminah kan Pu in North East Games hawna neih pahin sawlai phul phahte hawna an va nei chho zel bawk a, chutiang ang chuanin cricket stadium Sihhmuiah zau tak mai an han thawk mup mup te khu a ropui ka ti takzet a. Hetiang ang North East Games kan thleng ve thei tawh te a lawmawm tehluul nen chutiang ang laia party thenkhatten a tihbuaina zawng ni awm taka kawng kan han zawh kher kherte kha chu an ti fuh lo mang e, thalaite vote hi an chan mai ang tih te pawh kha ka lo hlauhpuh hle tih te pawh kha ka han sawi duh a.

Sawi tur tam tak ala awm a, hei, cash award, cheng nuai sawmhnih leh pahnih leh sing hnih sanghnih leh zahnih sawmnga, mi zathum pahnih te hnena kumina kan han pe thei ringawt mai te hi thalaite tan a ropui ka tiin lawmawm ka ti takzet a ni. Ka lawm e.

**DEPUTY SPEAKER** : Dar li khi kan ban hun a ni a, tin, chumi rualin a mover te pawh khanin sawi turte pawh kha an la nei dawn a, tlemin hun kan hmang thiam deuh dawn nia. Pu S. Laldingliana ilo sawm ang.

**Pu S. LALDINGLIANA** : Pu Dy. Speaker, ka lawm e. Kan Governor lawmthu sawite thlawp pahin ka ngaihpaawimawh zualte ka han tarlang ve duh a. Pakhatnaa ka sawi duh chu, a thusawi point pahnihnaa a rawn tarlan “ My Government is committed to providing good governance and administration which is clean, responsive, accountable and target oriented” tih laia a tawp ber “target oriented” tih lai kha. A chhan chu he sorkar hi target neiin a kal a, hei zawng a lawmawm zualin ka hria.

Kan sorkar hi kan hriat angin a khat tawkin PRISM kan tih te, SOSA te hian an lipse reng a, enge tihsual an neih tiin, mahse vawiin thleng hian tihsual an



neih hi sawi tur an la hre lova. Chumai bakah chuan election manifesto, mipui hmaa kan lo intiam tawh tihhlawhtlin hi an sawi zat zat thei a, hei hi a lawmawm hlein ka hria. Tin Pu Ramhluna khan Impartiality tih hi belh nise an ti leh kher a, mahse belh a tulin ka hre lo a ni, Pu Deputy Speaker. A chhan chu he sorkar hian hna tam tak a la tawh a, heng zawng zawngah hian Partiality hi a awm lo hrim hrim a, impartial niin, merit-in a kal a, hei tunah pawh Nurse result a chhuak leh tep a, hengah te pawh hian duhsak theih a ni lo, a thiam a kha chu an thiam a ni mai a ni. Chuvangin he sorkarah hian impartial belh a ngai lo a ni tih kha ka'n sawilang duh hrim hrim a ni.

Tin, member zahawmtak, Pu Thlenga khan “Sorkar hmasa hmalak tawhnate min chhonzawm saka lawmthu ka sawi e”, tih rual khan Pu Deputy Speaker, Zoram mipui hnenah pawh hian he House kaltlang hian Zoram mipuite hnenah ngaihdam an dil tur niin ka ngai a ni. A chhan chu kan ram tana rotling an tihchhiat hi a uiawm lutuk a ni. Tuirial Hydrel Project tluang takin lokal ta nise kum 2004 a commission theih tawh mai tur leh vawiina power-a kan harsatna ziaawm hle tawh tur, compensation vanga an tichhe vek mai te hi zoram mipuite hnenah hian ngaihdam an dil turah ka ngai tlat a ni. Compensation dawng theitu turte hi chhungkaw 40 awrh an ni a, mahse chhungkaw 1000 chuang boruaka LSC siama a pawisa zawng zawng mai Lal lal lai hun atanga ram neitu compensation dik takte hi compensation component tan hman a ngai ta, a zahthlak lutuk a ni. Pu Deputy Speaker, Referral Hospital-te pawh kan hria, Congress hun hmasaah tun kan Chief Minister hova bul lo tan tawh te pawh, a main building sa duh lovin sum siam duhna avangin quarters an han sa a, ti sawn hman hleih theih lovin vawiin thlengin a la awm a, chuvangin ram pawl an khawih a ni. Chuvangin hemi chungchangah pawh hian ngaihdam an dil tur niin ka hria. Lengpui Airport te pawh tihchhiat theih lovin alo awm hman a, chuvang chuan an khawih chhe lo mai a ni. Sum siam duhna avanga ram kan tichhe duh hi sim a hun tawh a ni.

Tin, power chungchangah phekk 12-naa langah sawi tur tam tak a awm he sorkar hmalakna hi Governor speech-ah hian a rawn tarlang a. Amaherawhchu, thil chiang em em ka sawilan duh chu he sorkar hian chak takin power-ah hian hma a la mek a, nikum hmasaa kan Chief Minister zahawmtakin he House-ah ngei hian a sawi a, tluang taka kan kal anih chuan tun atang 6 velah chuan power-ah hian kan intodelh chauh pawh ni lovin, a hralh tur kan nei dawn a ni tih kha vawiinah hian a tak takin a thleng chho tep tawh a, a hmu duh tan chuan hmuh theihin a awm tawh a ni. Nikum kum tawp dawnah khan kan Prime Minister zahawmtak kha Bangladesh-ah a zin a, kan Chief Minister hian a zui a, chutah chuan Bangladesh Prime Minister-in power-a an indaih loh thute a sawi a, chuta Prime Minister chhannaah khan he sorkar hian power lama hma a lakna kha a tichiang thlawtin ka hria a. “Hei ka bulah hian Pu Lal Thanhawla a awm a lawm, tunah hian Mizoram lui zawm zawng zawng a khuap mek a, tun atanga reiloteah a hnen atang hian i lei dawn nia”, a tih kha National paper-ah a chhuak chuai chuai a ni. Chuvangin he sorkar hian power-ah hian hma a la a ni tih hi ka sawi duh a ni.

Tin, NLUP chungchang hi kan sawi tam tawh a, vawiinah khan Pu Thlenga khan nawmsit bawl nana NLUP hmanga he sorkar a puh kha chu a zahthlak hlein ka hria. NLUP mi harsa zawkte khai chhuahna tur atana programme siam a ni a, Central sorkar pawhin min pawmpui a, heti zat min pe a ni. Pu Speaker, a thu hrim hrimin NLUP sum hi thildang atana pawhpen theih hi a ni lo hrim hrim,

pawhpen theih pawh nise he sorkar hian he sum hi nawmsitbawl nan a hmang dawn lo hrim hrim tih hi Zoram mipui hnenah he House kal tlang hian ka sawi duh a ni. Tin, nikuma kan budget session lai khan kan Chief Minister zahawmtak, kan House leader ni baww khan engtin nge a sawi kha, kei leh ka naute hi chu kut tling lova, sum lakluhna kawngah hi chuan kan fihlim a ni a tih dap dap ngam kha. Khamiina a tihchian chu he sorkar hi kan Governor-in a rawn sawi ang chiah hian corruption-a fihlim sorkarin a tih kha a tichiang em em a ni.

Tin, chubakah chuan, V/C leh Local Council inthlanna Congress vote duh lote kha chu NLUP dawn chhonzawm tir lo tura hmalak a ni tih te kha chu thu tlinglo a ni. Pu Speaker, khatiang khan hmalakna a awm lo hrim hrim. Tin, he sorkar hian ze mak tak leh ze mawi tak a neih chu, NLUP chungchang thuah pawh inthliarna a awm lo. Ka bial chhungah pawh Congress nilo dawng tam tak ka hria a ni, vawiinah hian. An dawn avang erawh chuan he sorkara rawn lut hi tam tak an awm a ni, Pu Speaker. NLUP chauh hi a ni lova, thil ho te te ka'n ti teh ang, Silpauline te, IAY sem chungchang thuah te pawh hian he sorkar hian tu party mah hi a thliar lo. A mamawhtu, mi harsa leh retheite phenah hian a ding mai a ni tih hi ka tarlang duh tlat a ni.

Tin, hei Health & Family Welfare Department chungchangah hian tlem ka sawi tawh a, hei tunah pawh hian Referral Hospital a pangngai ang hian chhonzawm chu ni se, vawiina kan harsatna em em Aizawl khawpui laili ber mai a bawlhhlawh bawm lianpui pui, Hospital lianpui kan la dah te hi kan sawn thei tawh tur a ni, henge pawh hi sawn thei turin vawiinah hian kan Minister chak tak hian nasa takin hma a la mek a. Hmanni lawk, kum tawp dawnah te pawh DoNER Minister-te sawm chhuakin a hmunah ngei kan Minister-in min ensak tawh a. Tunah hian Referral Hospital hi tihputlin tumin Aizawl-a Hospital, helaia traffic concession ti nasa lutuk te pawh hi zawi zawia seng pheih turin tunah hian hma chak taka lak mek a ni tih te kha ka'n sawi duh a.

Tin, chubakah chuan, Mizoram College of Nursing, 2005 daih tawha recognize nei tawh si kha vawiin thlenga building kan nei lo te pawh hi building kan neih theihna turin tunah hian chak takin he sorkar hian hma a la mek a ni. Tin, vanduaithlak takin Chhim lampangah Saiha leh a chhehvelah te infant mortality rate a sang lutuk a, hei hian nasa takin kan Health index a pawthniam a, chu chuan kan plan fund thlenga a khawih hniam avangin tunah hian he sorkar chak tak hian infant mortality rate te, National mortality rate-te tihnam turin tunah hian 3<sup>rd</sup> Finance Commission sum hmang turin PHC awm lohnaah te sa mekin, Health Sub-centre awm lohnaah te, Sub-centre thar te sain a thuum that ngai zawng zawngte thuum thain tunah hian a thuum tha chho mek a ni.

Tin, PHE hmalakna kha tarlan a ni nain chipchiar taka tarlan a ni lem lova, speech-ah khanin. Hei kum 2008-2009 chhungah hianin khaw 56-ah tui thianghlim in tur pek an ni a. Tin, 2009-2010 ah hianin khaw 124-ah tui thianghlim in tur pek an ni a. Tin, 2010-2011 ah hian khaw 121-ah pek an ni a, 2011-2012 ah hian khaw 128-ah tui thianghlim in tur pek an ni tawh a ni.

Tin, Pu Speaker, hemi paha ka'n sawilan duh chu ka bial chhung ka'n ti teh ang, thingtlang bialtu ka ni a. Heng Vaisamah te, Mautlangah te, Lungrangah te, Upper Lungrangahte tui a harsa em em a, hengah te hian tuizem lian mangkheng kan

siam tawh a. Hengte hi a tlanu turte pawh an lawm em em a ni tih te pawh kha ka'n tarlang duh hrim hrim bawk a ni.

Tin, UD& PA chungchang thuah hian hei sawitur tam tak a awm a, infrastructure lian tak tak kan nei a, chhim leh hmar chhak leh thlangah, kan sawi seng vek dawn lova. Ka'n tarlan chak em em chu EWS Scheme te leh scheme dang hmangin khawpui chhungah te khawpui pawnah te mi harsa leh mirethei chenna In kan han sak sak thei te hi a lawmawm tak takin ka hria a. Nikumah khan kan Minister zahawmtak, Pu Zodintluanga tawiaamin Kolasib-ah EWS scheme hmanga In sak te, sak mek te, kan zuk tlawh a, chuta hmeithai pakhat tawngkam vawiin thlenga ka thinlunga thi thei lo chu, ka banah hian a chelh a, ka pu lokal teh a ti a, min kai chho a, an khum kha min kawhmmuh a ni. In chu sak zawh tawh a ni a, an lo luah tawh a. Hei kan puanthuah hi han en la, ruah a sur dawn a piang hian a far lohna laiah hian kan hnuk sawn a, kan hnuk kual kan hnuk kual thin a. Keini ang hmeithai rethei hian hetiang ang In a chung rangva, a bang tile-ah hian kan awm ve ang, kan mu ve ang tih hi kan lo ngaihtuah pha ngai reng reng lova, ama tawngkam takin, Pathian leh Congress hi an lo va tha tak em ! tiin mittui tla zawih zawihin lawmthu a sawi a ni Pu Speaker. Chuvang chuan he sorkar hi Pu Speaker, nichina thuhma ka'n sawi tak ang khan 2<sup>nd</sup> para-ah khan chiang takin a sawi a. Especially the poor and marginalised an tih kha mirethei lam hawi, mirethei lam tang tlat a nih avang hian vawiin thleng hian Pathian pawh hian a hruai a, keimahni ho zingah pawh hian a nihna takah chuan thawhhona tha tak mai kan nei a. Vawiinah hian kan Governor thusawi hi a vaiin sawi thei lo mah ila lawmthu sawina tur hlir a ni. I vei lama mi thenkhatten lawmthu sawi tur zaa sawmnga chu a awm ve e an han tih te kha, zaa sawmnga ni lovin zaa zain lawmthu sawi tur hlir a ni tiin he motion of thanks hi ka rawn support a ni, Pu Speaker ka lawm e.

**S P E A K E R** : Hun a hman thiam hle mai a lawmawm e. Tunah tunge sawi leh dawn le ? Hun kan ngah tawh lova, reilote ngaihnam deuhvin han sawi leh ru le.

**Pu NIRUPAM CHAKMA** : Pu Speaker, tlemin hot deuh ila, a reh lutuk a, a nuam lo alawm. Pu Speaker, Governor thusawi Pu R. Selthum, Member zahawmtakin Motion of Thanks a putluh hi support ka duh a. Thusawi tur tam tak a awm a, Governor Speech kan chhiarah hian paragraph tam tak 32 zet a awm a. Kan hriat ang khan kum 1 kalta chhungah Sorkar achievement, a tlangpuiin a tarlang tihna a ni a. Hemi Governor Speech kan chhiar zel chuan Sorkar hmalakna hi a tlangpui a zia nain ziahloh tam tak a awm tih kha kan hriat tur a ni a. Tlema a tlangpui ziahnaah pawh sawi tur, lawmna tur tam tak a awm a ni.

Pakhatnaah chuan Pu Speaker, paragraph 6-naah khan 'My Government is committed to have an efficient, transparent, responsive and corruption free administration', a ti a. Hei hi Governor hmasate pawn House-a thusawinaah khan an sawi thin a ni a. Kan sorkar hian Guiding principle hmangin a kal ve a ni a. Hei hi a dik zia chu 'Towards this end, the State Module of Centralized Public Grievances Redressal and Monitoring System (CPGRAMS) – 'Mipui Aw' was successfully launched by the Chief Minister on 29<sup>th</sup> February, 2012' tih kha chu Mizoram mipui hian theihngihl lo se a tha a ni. Transparent, responsive and corruption free administration awm turah chuan Mizoram mipui chu about 10 lakhs kan ni tawh, grievances chu a awm lo thei lo a ni. Mahse Grievances kha khawiahnge an address ang, forum kha a awm a ngai a ni. Tunhmaa awmlo, tuna awm ta hi lawmawm tak a ni, Pu Speaker. Chutianga forum siam thiam tak kan Chief Minister

zahawmtak hi fak ka duh a. Tin, grievances awm reng reng hi a rang thei ang bera address dan ngaihtuah a ngai a ni. Awm ringawt pawh a tawk lo, address kha a ngai a ni. Chuvang chuan he Sorkarah emaw, Department-ah emaw, District leh Block-ah emaw khawiah pawh Government machinery functioning danah kan grievances a awm chuan mipui hian, kha 'Mipui Aw' forum hmangin an grievances chu sorkarah an thlen thei a. Chu chu chhanin a awm ang a, solve-in a awm ang a, hei hi kan sorkar hian a siam ngam hi a danglamna tak a ni a.

Pu Speaker, thil kal tawh pakhat sawi ka duh a, keini Congress Member 6 chauh awm laiin kan bialah BADP-ah pakhat nuaili man thawk a awm a, MNF Sorkar lai khan Aizawl atangin contractor pakhat an appoint a , saw ti lamah kan bial lamah a kal a, Sub-contract a pe ta a ni. Rs.10000/- in nuai li man kha sub-contract neitute hi a tak takah chuan sub-contract leh a ni Rs.2000/-in. House-ah kan sawi a, khatih laiin Speaker hnenah pawh enquiry min siam sak rawh ka ti a ni. Bialtu MLA ka ni a, ka hre chiang em em a ni. House-ah nasa takin ka theih ang tawkin Enquiry Committee din turin ka ngen chungin engmah min tih sak lova, grievances redressal chu sawiloh Member-ten thudik House-a kan sawi chhuah pawh chhui ngamlo Sorkar, MNF Sorkar mipuiin kan paih loh chuan tuin nge paih ang? Hei hi a ni MNF leh Congress Sorkar danglamna chu, chuvang chuan he Sorkarah he thil ropui tak hi mipuiin chhawr tam thei ila.Tin, puanzarte pawh a tharin zar i la, Information and Public Relation Department Minister zahawmtak hnenah hei hi ngen ka duh a, he forum hi mipuih nasa takin puanin awm se a tha khawp ang.

Tin, NLUP chungchangah sawi a tam a, Pu Speaker, tih tur nilo kan sawi kan sawi hi engnge a awmzia, NLUP kan implement tawh a, Project pawh a awm tawh a, Project siamah pawh kum 2 bawr vel a ngai, kha hun chu kan pel tawh a ni. Kan hriat theuh angin vawi tam tak sawi chhuah a ni tawh a House ah, he Project hnuaiah family 120000-in tanpuina an dawng dawn a ni. Chumi pianlamah infrastructure double atan te, kalkawng siam nan te, NLUP kalkawngte nakinah, Market-te pawh siam a ngai dawn a, infrastructure tam tak godown-te thlengin siam a ngai dawn a, khang kha chu luxuries a ni lo a ni, requirement a ni, Project-in a ken tel a ni. 2874 crores vel hman a ni tawh a, tin, implement dan tur pawh Pu Speaker, NLUP implement chungchangah central-in manual fel tak a siam a, Work Calendar-te siam a ni a, mipuiin an pawisa dawn tur zat pawh a bithliah tawh a ni. Chuvangin khawngaihtakin Pu Speaker, vawinah ka ngen duh chu, Member a bik takin i veilama opposition Member-te chu, hei NLUP manual te, Work Calender-te khawngaihin lo sem thei ila lo hre rawh se, pawisa dawn turte pawh chuvangin Rs.100000/- kan pe ang che u, chuti, khati tih kha chu a thleng tawh alawm, khami hun kha chu a tawp tawh a, implement-in a awm tawh a, chuvangin mipuih tha deuha zirtirna hi kan bat a ni.

Pu Speaker, kan bial lamah kan opposition MNF-ten organization campaign-in Parva thlengin an zin a, an zirtirna chu NLUP sawi chhiat a ni, Congress Party hian an bum che u a nia, 1<sup>st</sup> installment in lak bak chu in hmu kher lovang, khati zat zat khawi atangin nge pawisa an hmuh ang tih te. Mahse, an lo hawng a, kar hnih hnua Agriculture Department hian chungkua 800 chuang hnenah pawisa kan pe tawh a ni, at the rate of 45 thousand each family, WRC 2 te chu terrace cultivator-te tan chuan 44 thousand something a ni a, keima ngaihtuahnaah chuan Pu Speaker, NLUP hlawhtling tur kha chu an thlen a ni. Mipui an lawm ang a, Congress an vote zel ang. Chuvang chuan rilru chhia pu lo ila, hun hmasa ka ngaihtuah chuan Pu Speaker, during 10 years if I looked back I was also member in this House during MNF Govt. kum 5 ka awm tawh a, khatih laia Congress mipuite min en dan chu Pu Speaker, hlawhfa atan pawh min duh lo a ni, kan hre vek. Chutiang hun chu kan tawng tawh a, chungte ka ngaihtuah chuan MNF hi pakhatmah pek ka

duh lo. Mahse, kan bialah chutiang rilru chu kan pu lo, MNF-te pawh kan pe zel, Party dang pawh kan pe. Kan bial chhung Saizawh khuaah chuan eligible family zawng zawng kan pe a, kuminah a thar kan thlanga Parva - III Bru khuaah family awm zawng zawng kan thlang a ni. Pu Speaker, sawitur tam tak a awm, nuaikhat pek pawh kan nei, Auto Rickshaw leina te, churang chuan an Trade azirin nuaikhat pawh, a aia tam pawh kan pe leh mai ang; mahse a scheme azirin. Mipui tullo zirtir hi hlawkna a awm lo, an duh leh kawng pawh zawh rawh se. Pu Speaker, ka lawm e.

**S P E A K E R** : Pu H. Liansailova ilo sawm ang.

**Pu. H. LIANSILOVA, MINISTER** : Pu Speaker, hun hman rei loh ka'n tum ang a, a hmasa ber chuan kan Governnor-in House zahzawmtak a rawn Adress-na hmasa ber a ni a. Hei, ani hi a vanduai hle mai a, Mizoram a rawn chhuah hnu rei vak lovah a fapa upa ber a ni awm e a chan a, lusunin a awm a, amaherawhchu, State hotu ber a nihna angin a tih tur a rawn tlak a, kan ngaihthlak tak ang khan a thu han sawite pawh a tha hlawn hle mai a. Kan Member zahawmtak Pu R. Selthuama'n lawmthu sawina Motion a rawn putlul pawh hi tihawm tak leh lawmthu sawina awm tak pawh niin ka hria.

Ka sawi duh hmasak chu paragraph pakhatnaah House-in zahawm tak leh mawhphurhna thuk tak pawm chunga rorelna chungchang a sawi kha, kan House hi Pathian leh Mipui/kan hotute duh sakna avangin kum engemaw zat ka lo thu ve ta a. Kan rorelte a zahawmin a chhuanawm hle thin mai a. Chutiang chuan vawiin thlengin ro kan rel a, hei hi State dang Asembly, Parliament thleng pawhin TV-ah te kan hmu thin a, min tluk lo hlein ka hria a, a chhuanawm a. Churang chuan kan Governnor-in a han sawi chhuah ang hian kan House hi a zahawm a, tin, kan debate leh kan thil han sawi chhuah reng rengte pawh hi zahawm takin, fel takin kan kalpui zel a. Churang chuan, hei hi kan chhawm nun chhoh zel leh nakin zelah mithar lo awm zel turah pawh kan ram hian a bik nihna pawh a ken zel hi a duhawm hlein ka hria a ni.

Tin, tawite tein ka'n sawi mai ang a. Thenkhat kha chu kan member zahawmtak takte khan an rawn sawi tawh hlawn a. Ka'n sawi leh duh chu hemi inthlanna Local Council leh Village Council kan neih takah khan kan inthlanna, tunhma zawng zawngah heng Local Council chu kan vawikhatna a ni a, Village Council inthlan kan neihahte khan vote inleisak leh engemaw system fello sawi thin leh inpuhmawhna a nasa thin hle a. Tun tumah chuan khatianga inpuhmawh theih loh tur khan kan Sorkar State Election Commission-in kalpui turin a rawn ruahman kha a lawmawm hlein ka hria a, lawmthu sawina tlak pawh niin ka hria a. A tling a te tan pawh thianghlim taka tling tia han sawi theih niin a lang a. Tin, mipuiin inthlan kan ngaihpawimawh danah pawh democratic spirit kan ramah hian a la nung tha hle a ni tih kan tarlang kha, Sorkar leh mipui tan leh a thlan tlinte tan pawh thil lawmawm niin ka hria a, chu chu ka'n tarlang duh a. Kan State Election Commission-te hmalakna leh Department, anmahni puibawmtute pawh an fakawm hlein ka hria a ni.

Tin, chu lovah chuan Law & Order chungchangah hian kan police-te hi fak an phu hlein ka hria a, engemaw incident Police force neih that avanga han dan theih loh thil duhawmlo thleng, personal deuh thlengte a awm nual na a, inpuhmawh hleihtheih loh chin hi a awm a. Amaherawhchu, chutiang piah lamah chuan a tlangpuiin police lamin mawhphurhna an neih ang heng kan ngaihthlak tawh ang khan Crime leh Criminal Tracking and System Project hi India ram chhungah a nei hmasa

ber zing ami kan han ni thei ngat pawh hi a chhuanawm a. Tin, Human trafficking lama hmalakna pawh hi chhuanawm tham niin ka hria a, kan mite an la tlem viau na a, helamah hian kan lo tawng hman nual tawh a. Chutiang chhanchhuah hna an thawhna leh an hmalakna hi fakawm/fak tlak a ni a, kan Governor pawhin a rawn sawi chhuak hi thil sawichhuah awm tak niin ka hre nghe nghe a ni.

Tin, chu lovah chuan, kan ngaihthlak tak ang khan Sorkarin mipui a enkawlnaah Administrative Reforms-te hi a ngaih pawimawhawm thin a. Kan party hian kan Sorkar hma khan hei hi a ngaipawimawh a. Sorkar mumal lo deuh leh inkaihhruaina tha lo deuhah hi chuan hmasawmna pawh a awm thei lova, chuvang chuan Administrative Reforms Commission kan din ang, kan siam ang, tiin mipuiawh pawh kan tlangzarh a, manifesto-ah. Amaherawhchu, kan lo Sorkar takah hian kan han enchiang a, India ramah hian 2<sup>nd</sup> Administrative Reforms Commission an din khan report fel tak an lo pelut tawh a. Chungte chu han zir chianin uluk takin report thehluh a nih bakah Central atang pawhin kalpui tur chin min rawn pe reng a, module 15 lai mai siam a ni a, all aspect of administrative, reforms tul a kha an lo cover tawh avangin kan Sorkar pawh hian manifesto a lo dah tawh te ngaipawimawh hle mah ila, helai thuah hi chuan kan mamawhte zir chian a, a tul a nih chuan mipui hmaa kan intiam ang hi tihhlawhtlin tur zawngin hma la lak zel a ni a, heti hian han kalpui phawt pawh a tha rih nia ngaihtuahna a awm a. Tuna kan ngaihthlak tawh ang khan Centralized Public Grievances Redressal and Monitoring System pawh Mizo tawngin 'Mipui Aw' tih a ni a. Kan Chief Minister zahawmtakin February ni 29 khan min hawsak a. Miin lungawilohna leh harsatna an neih, hemi hmang hian a tihrehna tur leh a umzui dan tur pawh kha a tih theih dawn a ni.

Tin, Pension chungchangah hian paragraph 21-naah khan a rawn tarlang zuai a, hei hi thil thar, thil lawmawm tak niin ka hria a. Sorkar hnathawk piah lamah hian un-organised sector leh heng Non-Govt. School-a deficit zirtirtu kan tih angte pawh pension nei lova harsatna kan tawh avangin engemaw lai phei kha chuan kan buai viau kha a ni a. Mahse heng zawng zawngte tanah pawh pension scheme thar sorkarin siam sakna turin hma a la a. Kan Chief Minister zahawmtak kaihhruaina hnuaiyah hian tunah chuan hengte pawh hi notified-in, a mipui lama hmangtu tur leh a hmang thei turte pawh zirtirna pek an ni a. June ni 8 ah khan he New Pension Scheme (NPS-LITE scheme) 2010 hi notified a ni a, hman dan tur pawh inzirtir a ni a, hman theih tura kalpui mek a ni.

Tin, chutih rual chuan Pu Speaker, Labour lamah pawh hian, kan Labour Minister zahawm tak hian a la rawn sawi chiang hman anih pawhin a tha ang a. An tan pawh hian pension tun hnaiah mai khan Central Sponsored Scheme lamah zu ngaituah chhuakin, notification an chhuah tawh a. Chuvang chuan inhlawhfate leh hemi sorkar pension han la thei lote tan pawh kan sorkar thar hian pension scheme thar a rawn duang chhuak a ni tih ka'n tarlang duh a. Hengte hi thil lawmawm tak a rawn sawi chhuah a niin ka hria a.

Tin, New Land Use Policy chungchang paragraph 7-na a kan Governor thu han sawiah khan, kan member-ten an han sawi thliah thliah tawh a, khalaiyah khan tihsual palh tiha ngaih theih, amaherawhchu, kha information kha a up-to-date tawk lo, helaiyah hian an lo dah avangin, a diklo anga zu sawi theih mai angin a lang a. Nikum Budget Session-ah khan he figure hi Planning Commission atanga kan zu kalpui leh Department anga zu kalpui leh Budget kan nghah meka vote on account a

nih lai data kha a ni a. Khatih lai huna kan information pek kha a speech buatsaihtu kan GAD lam atang hian kha kha la dik zelah ngaiin an lo la kalpui a, a dik lo deuh ta a, a hnuah thil inthlak thleng a awm avangin up-to-date information chu kan hre tlang theuh a. NLUP atan hian beneficiary component baka Central Sponsored Scheme tel a, convergence theih tura beisei a tel a, figure-te dah luh a ni a. NLUP component tan bikah hi chuan vaibelchhe 234 a ni a. Tin, hemi hi Apex Board-in ngun takin a ngaihtuahin 20,000/- beneficiary hi tawk lo a ti a, 45,000/- beneficiaries thlan fela kalpui a ni a. Chulai chu ka'n sawifiah hlek duh a. Hemi ka'n sawi rual hian Pu Speaker, tlemte minute 3.

**S P E A K E R** : I hun chu a tawp ta a, tlemte thu hla ni lovin kan working hour hi tlai dar 4 thleng a ni a, chu chu House rawn a ngai a. Kan chhunzawm zel dawn em ni? Naktukah kha chuan kan chawl leh maiin a rinawm a, nimin kan chawl leh tawh bawk a. Vawiin lam chu bawk deuh tawk a tul pawhin kan inhuam nge ni? kan tui viau mai a. Ka beisei aiin kan tui a, a lawmawm a, hetah hian House rawn a ngai. Kan chhunzawm zel dawn em ni? Minute khat lek emaw chuan han bawk leh ta che.

**Pu H. LIANSILOVA, MINISTER** : Pu Speaker, ka lawm e. Tichuan helai kan Governor thusawia NLUP sum chungchang leh beneficiary lo lang, a information hi a up-to-date tawh lo zawk kha hman a ni, ka'n tih kha member-ten kan pawmpui thiam kha a thain ka hria a, chu chu ka'n dil ni pah bawkin ka'n sawifiah nisela. Hetah hian han sawi hlek tur tam tak chu awm mahse, ka sawi duh zawk tak chu uluk takin kan ti a, kan theih tawp kan chhuah a, keimahni kan infakna mai nilo hian Planning Commission atangin Planning Commission Secretary te, tin, Planning Commission Adviser (NE) te an lokal a. Planning Commission member aiawh ngei ngei pawh, thingtlang khua an fang a. Kan pawisa pek chhuah dan, Bank through leh B/A hmanga kan pek chhuah te a hmunah khaw thenkhat an en a, an hmuhin ralkhata rin ang mai hi a lo nilo anih hi tiin an fak ve a, keimah ngei pawh telephone-in an ram kal hawngin min rawn phone nghe nghe a, fakterna satliah maiah ka ngai lo a. Chuvang chuan engemaw khawilaiah fel tawklo awm thei mahse kan theihtawpa kan hotuten hma an lakna hi a tha thawkhat viau a ni tih ka rilruah nget takin a awm a. Chutih rual rual chuan a fello lai leh a thalo lai engemaw kan Member zahawmtak te, abik takin opposition lama awmte pawhin inlo hria anih chuan hetia auchhuahpui mai lo deuh hian kan hnenah te, kan hotu dang dang te hnenah pawh han thlen ulangin, a chhia leh a thalo hi kan duh lova siamthat kan duh ngawih ngawih a, hlawhtlin kan duh avangin a chhe lai hetia vangtlanga inphawrh hma hian lo enchian deuh te pawh kan duh a ni. Tin, nichinah kan Member zahawmtak Pu K. Liantlinga khan Horticulture Mission hnuai hna chungchang a han sawi pawh kha, khatiang thil kha kan lo la hre hauhlo mai a, kan Parliamentary Secretary min kaihruiatu pawh khian a hre bik lo anih ka ring a, engemaw thil fello lakah hian kan fimkhur khawp a, amaherawhchu, thil fello palh te a lo awm thei a, Official lamte an fimkhur khawp a, amaherawhchu, khatiang a thil fello a lo awm tak tak anih chuan siamthat kan duh reng a; englai pawhin siamthat hna thawk turin kan in open e, tih kha ka'n sawilang duh a.

Tin, chulovah chuan monitoring hi NLUP-ah hian kan fimkhur hle a. Tun tumah pawh hian hei inthlan hnai leh zawhhlum te a ni a, inthlan avang khan a sem lam pawh min chawhltir leh si a, Monitoring hi a kalkawp zel a, 1<sup>st</sup> instalment emaw lo dawng tawh pawh ni sela hnathawk thalo kha chu pek loh tur anih avangin, lo hmukal mek hmulo tur kha

an awm thei dawn a ni tih min lo hriat sak ula a thain ka ring. Vuipui mai lo deuh kha ni sela hna an thawh ngei leh ngei loh te pawh min chianpui ula, hei ruling lamah pawh hian neitu chan han chang deuh hleka thawk manglo, dawn tumte kha an lo awm a, inthlan hma pawhin khilai Darlawn khaw bul vela kan thubuai deuh a kha khatiang thil kha a ni. Sangha dil lo nei sa khan ka ring mai dawn e, hmunphiah hmunah tihte kha hotu nihna avang khan tih theih turah/innamnul theih turah an ngai a, a theih bik si lova. Khatiang kha awm thei anih avangin tunah hian Monitoring hi an ti mek a, khalai atanga an han thlir tlinglo kha chu kan MLA hote pawn anmahni bial an han enpui leh deuh ang a, hmuzui thei lo te pawh an lo awm pawhin pawn lama invuipui mai lovin, a lo nih tak hi mawle, han intihpui theih tur deuh hlekte pawh, ngaihtuahna zau deuh kan neih sa a ngaiin ka ring a.

Tin, Pu Speaker, a tawpna atan, kan sorkar han kalah hian induhthawhna nasa hle mahse Central lam atanga min thlirna pawh tuna ka rawn sawi ang kha a ni a, mipui lamah pawh hian min hmuh dan kan hotuten in hre zel ang a. Health sector lamah pawh hian, Health Key Sector atanga an enin India ramah hian titha ber zinga mi an nih avang hian kan Health Minister hian kan Chief Minister lawman, Award lak tur pawh a zu la nghe nghe a, chutihruah chuan Agriculture-ah pawh Most Improved State-ah min puang a. Tin, Horticulture-ah pawh hian Horticulture infrastructure-ah titha ber award kan hmu bawk a, chutiang chuan Sports lamah pawh dik tak chuan, tuna kan Sport Infrastructure han neihte hi chu State pakhatin kumthum chhunga hetiang neih hi a awm zen zen pawhin ka ring lova. Chuvang chuan a Minister concerned leh kan Chief Minister-te pawh hengah hian chawimai tlak an ni ve ve hlein ka hria. Kan Governor-in a rawn sawi chhuah Sport lama hma kan sawn a kan thang a rawn tarlan rual hian, lawmthusawina tur lian tak tak ni ve ngeiin ka hria a, chungte chu hun chep tak karah ka rawn sawi ve a ni. Kalawm e.

**S P E A K E R** : Pu P.C Lalthanliana i lo ko ang.

**Pu P.C. LALTHANLIANA, MINISTER** : Pu Speaker, ka lawm e. Vawiinah kan Governor thusawi, lawmthu sawina motion support-a lawmthu han sawi ve ka duh a. Tin, a ziaak loh phena thil tam tak awmte pawh vawiinah hian sawi ka duh a ni. Pu Speaker, kan hriat angin kan sorkar hi kum thum vel a ni chauh a. Sorkar hmasa nena han khaikhin phei kha chuan sorkar hmasaa kan Chief Minister phei kha chuan kum 2 kum 3 velah kha chuan an sorkar financial kha a airlock a tih kha a ni a. A airlock an siamthat hun lai vel ang kha a ni a. Chuti chung chuan vawiinah kum 3 chhunga kan Governor thusawi atang te, a sawi loh atangtein kan rama hmasawinna nasa tak mai hi vawiinah hian han sawi dawn ila, sawisen theih a niin ka hre lova. A hun thuah leh a niah te development thil ropui tak tih dawn chuan hun hi a ngai em em a ni tih a hre tute kan ni theuh a. Kan Chief Minister hmasa pawh khan kum 10 a sorkar term tawpah khan zawhna a chhannaah chuan ‘buh hmawr bak hmin ala hun love’ a ti kha a ni chauh a, kum 10 an sorkar pawhin. Tin, hmanni news ka enah phei chuan kum 10 chhunga kan ram intodelhna tura an tuipui ber, Mau amah pawhina, ‘Bamboo Chief Minister min tih hialna’ a tihna Zoram mipuite intodelhna tura min zirtir, mauah pawh khan a chi tha pawh kha kum 10 chhungin an lo hmu lo reng reng kha a ni a.

Hmanni lawkah Kerela-ah a chi kha an hmuchhuak chauh tih kha news atangtein ka lo hre ve a. Chutiang chuan thil tak tak leh thil ropui tak ti tur hian hun hi a duh hle a ni tih hi a taka hre tute Pu Speaker, kan niin ka hria a. Chuti chung a Pu Speaker, kan sorkar kum 3 kan sorkara kan Finance Minister te, kan Chief Minister zahawmtakten he ram an kaihhruainaah hian Zoram mipuiin kan duhthusam hmu lo mah ila, kum 3 kan hun



ngaihtuaha an thiltih an hnathawh kan sorkarin a tihah hian a lungawi thlak hlein ka hria a ni. Sorkar hmasaah khan dik tak chuan sum lamah chuan Zoram mipui kan beng a tlai khawp mai. Delhi tlang atangin an hawn apiangin a vaibelchhe tel an hawn thin a ni. Kan Chief Minister hmasa tawngkam takah pawh nem muka liam zawih zawih a ni a. Amaherawhchu, a taka Zoram mipuiten chu zar chu kan zona sawitur kan nei em ?. An thutiam ngei, kum 10 chhunga MIP atanga Rs.50000 kuthnathawktute pek an tiamah Rs.3950 te, Rs.4500 te in Zoram mipui an pe a, kum 10 chhungin mahse kan ram hruaitute tawngkamah chuan nem muka liam zawih zawih sum leh pai a awm e, kha sorkarah khanin an ti a. Sorkar hnathawk hlawn san turin an pe thei bawk lo a ni.

Amaherawhchu, Pu Speaker, hei kan sorkar alo kal a. 2008 inthlanah sorkar kan nei a. Kan Chief Minister chak tak te, kan Finance Minister chak tak te sum leh pai enkawl thiamna a zarah vawiinah he sorkar hian Mizorama sorkar hnathawk zawng zawng M.R atangin an hlawn vawiinah a san vek a ni. kumkhatah cheng vaibelchhe 226 sorkar hmasaa sen ngai miah lo kha vawiinah chuan sen alo ngai ta a. Tin, a thutiam ding, Party sorkar alo ni a. NLUP ah cheng a nuai sing tel a nuaihkhath thleng pawhin lo neitute leh kuthnathawktute kan tanpui dawn a ni tiin an thutiamah an dinga. Kan sorkarin vawiinah mi 45000 te a sing tel an pe a. Vawiinah dawng leh mai turin mi 45000 thlan chhuah an ni tawh a ni. Sorkar hmasaa Minister pakhatin ka bial khaw pakhatah sawn thu a sawi a, an sorkar lai khan “ka pu, MIP ah Rs.50000 min tiamah kan va la har ve ?” an ti a. Chuta an Minister chuan heti hian a sawi a, “In khawtlang hian ruaitheh ula, sa bel 10 chhuang ula, fatuin sabel 7 eizo vek sela, sabel 3 chu in khawtlang tan dah sela, chutiang chu kan sorkar hi a ni” a ti a ni. Mahse vawiinah chuan Pu Speaker, a fatu leh hnathawktu, a sorkar hnathawk zawng zawng, a vaibelchhe 226 chuang kum khata sen belh ngaiyah he kan Sorkar hian vawiinah Zoram a enkawl a. Sorkar hnathawk ve lo chhungkua zawng zawng te, vawiinah a sing telin he sorkar hian a tanpui a. A then phei chu WRC I ah leh II ah chuan Rs. 65,000/- an dawng tawh a. Nuai khat kan tiam laiin a then chu nuaihkhath chuangin an operate sak, Trade-ah an dawng tawh bawk a ni. Heng bak sorkar hi vawiinah Zoram hian khawiah nge kan hmuh chuan? tih hi kei chu ka ngaihdan a ni.

NLUP-ah hian induhsakna a awm. Chumi, khami, party dang tan hmun a awm lo, kan ti a. Lehlamah chuan ka bialah chuan vawiina VC candidate-ah te theihtawpa min bei ngat ngat tute pawh kan pek te an ni. Khaw pahnihah phei chuan an zavaiin an dawng vek a ni. Tin, Pu Speaker, MNF hlei hlei hi an lawmin ka hria. An hotute hian an hrechiang lo a ni. Ka biala khaw pakhatah chuan mi pakhatin, ‘Pu Mathan, MNF Party-ah rinawm takin in sorkar hmasak kum 10 chhungin rinawm takin Oppositionah kan awm a. Kan party tan em em an lo sorkar ve a, kum 10 zet, kan inchungah cheng Singkhat pawh hi a lut lova. Vawiinah Congress in sorkar a, Congress-ah pawh ka inpek hma hauhin a sing tel ka dawng hi tunge lawm lo thei awm ang? Tunge Congress hi vote lo thei ang?’ a ti mai a ni. MNF hlei hlei hi a lawm an ni, Pu Speaker, vawiinah hian. An hotute hian an hrechiang lo a ni, tih hi vawiinah ka sawi duh a.

Tin, hei kan Sorkarah chuan fatu hlui bikah a kawchhung mai hi sem a ni lo. Kan veng Kohhran ruai theh ang deuhin a kawchhung mipui hluiyah pawh vawiina kan Sorkar chuan a sem vek a ni. Chutiang chuan kan chanvo a awm a ni tih hi ka’n sawi duh a.

Tin, Pu Speaker, a tawp bera ka’n sawi leh duh chu, Village Council Inthlan kan nei a. Invauna te, NLUP avanga in vote loh chuan tih invauna te a awm a ni tih Member thenkhatte khan an han sawi a. Village Council hi khawtin a bil anga roreltu kan inthlanna a ni. Khaw thenkhatah chuan a engemaw deuh pawh a lo awm ang, a awm maithei, a sawi

theih loh. Amaherawhchu, vawiinah Zoram mipuiin kan hriat chu hei hi a ni. Sorkar hmasaah khan kan ram hruaitu lu ber, kan Chief Minister-in Village Council kan thlan dawna a thuchah chu, 'ruling party ni lo, opposition party in thlan tlin chuan baltin mawngpawp a tui dawh ang in ni ang,' tiin Zoram mipui min vau a ni. Chumi hnuaiiah chuan Sorkar hmasaah Village Council kan inthlang a ni. Vawiinah Congress a sorkar, kan Chief Minister-in engnge a sawi? Pu Speaker, 'Opposition leh Ruling kan en hrang dawn lo. Ram roreltu dik khawtinten in thlang chhuak tur a ni.' tiin kan Chief Minister-in thuchah a sawi a ni. Chu lo chu thuchah dang, sorkar angin kan ram Sorkarin a nei lo. Kei ngei pawh hi ka bialah Pu Speaker, min hek a. MNF Sub-headquarters General Secretary pakhatin a hmingin State Electionah a thehluat a ni. Amaherawhchu, an han finfiah chuan an MNF min hekna thuhretua an hmante zawng zawng kha ka lam tang vek an ni a. Hmun khatah phei chuan local channel-ah ngaihdam dilin a sawi hial a ni. Dawta kan inpuh thinna hi kan sim a hun khawp mai. Sekhumah chuan uncontest-in Congress kan tlinnaah chuan chutiang khatiang avanga uncontest a tling a ni e, a thenin min ti a. MNF Sorkarah khan saw khuaah sawn uncontest a MNF VC siam an duh avangin Congress Unit Vice President Rintluanga leh Treasurer Chuaukunga kha Rs. 2 pek luh tirin uncontest in MNF ah an luh tir a ni. Chutih hun lai chuan kan sawi kan sawi lo. Chuvang chuan vawiinah hian khaw thenkhatah tawngkam engemaw deuh lo inhmanna chu a awm thei. Amaherawhchu, a Sorkar anga kan ram hruaituten he Inthlannaah hian thianghlim tak leh felfai taka kan neih hi an duh ber, an kalpui dan a ni tih hi a hrechiantu ni vein ka inhria a. Chuvang chuan Pu Speaker, vawiinah kan Governor thusawi atanga kan rama kum thum lek kan Congress sorkar kal mekah hian lawmna tur tam tak a awm a. Amaherawhchu, tih tur tam tak leh la hmabak erawh chu Zoram mipui tan hian he sorkar hian a nei a ni, tih erawh chu hre chungin he motion hi karawn support a ni.

**Pu LALDUHOMA** : Pu Speaker, tunhnaiah kan ramah vanduinah rapthlak tak tak mai a lo thleng a, Saihaah te, Aizawl Bazar-ah leh hmundangah kangmei te a chhuak a, accident-te a awm bawka, chuti chung chuan kan Governor-in a rawn sawilang miahlo mai hi chu a hmaih lian mange aw, ka ti deuh a. Heng vanduinah tawkte sorkarin a enkawl dan leh a chhawmdawl dan hi hriat a chakawm ka ti a. Aizawl Bazar kangte pawh khan chhawmdawl na engmah vawiin thleng hian an la dawng lo niin ka hria a.

Tin, Darlawn bulah accident rapthlak tak a awm a, bialtu MLA zahawmtakin tukinah special motion-in a rawn pulut a, thi leh hliamten chhenfakawm tham chhawmdawl na an dawn tur lam hawi engmah a sawi lo kha a vanduaithlak ka ti bawka. Ka hriatdan chuan nimirah Officer-ten mitthi chhungte kha Rs. 50,000/- an pe hlawn a, chu chu rulh leh tur an ti a ni. Tlangval pakhat thi ve, chumi pain min rawn phone dan chuan lawmthu pawh ka sawi thei miah lo, ka haw nghal a ti. Chutiang chu a ni a, khatiang ang vanduinah a lo thlen khan kan chhawmdawl thei anih chuan chhawmdawl ila, rulh leh tur pawisa inpuh tir hi ka la hriat ngai miah loh a ni. Hetiang sorkar hi ka la hre ngai lo, a paw hle a, sorkarin ngaihsak tha se ka ti a. Officer thenkhat sawidan chuan khing anga court-ah in chak chuan chuta sum chuan inrul ang an ti, te an ti a. A nih leh kan vaiin Ukil pakhat kan ruai dawn nge, a mal te tein kan ruai dawn kan ti a, ka hre bik lo tiin min chhang a, tih te an sawi a, heng hi ka lo dawnsawn dan a ni.

Tin, kan Governor thusawi para 23-na Food Security hi kan sorkar priority a ni ang, tih hi lawmawm ka ti a. Tunkar kalta khan Phuauibuang, Khawlian,

N.E. Tlangnuam leh Daido thlengin ka han kal a, Khawlian leh Phuaibuang kudam ka en a, vawikhat sem ve ve chiah an nei a ni. Bialtu MLA-in kan dahkhawl dawn tawh lo, a tlachawpin kan sem dawn a ti e, an ti a, an zam hle mai a. A chhan chu Tuivai lei khi sorkar hmasain a hmanrua a chhawp sa vek tawh a, tun sorkar hian hmanraw awmsain a dawh a, a la puitlin lo a ni. Thawkkhat lai khan kan House Leader zahawmtak hian Tuivai lei dawh zawh tawh a ni, tiin a sawi ngei a ni tih an sawi nghe nghe a, a zia lo hle a ni. Tunah khian siamchawpin motor a kal thei tawk tawk a, khi khi fur ruahtui tlak hmaa an dawh zawh an ring lo a ni. Chuti anih si chuan a kawng khi kal ngaihna a awm tawh lova, leiah khian motor full load a kal ngam dawn miah tawh lova, chuti a lo nih a, stock a awm miah bawk si lova, thal laia dahkhawl anih bawk si loh chuan khitalai bial khi an tam dawn a ni. Kudam pahnih khaw 4-in an ineitawm a ni a. Heng hi sorkar top priority a ni takzet anih chuan, Tuivai lei an dawh zo hman dawn anih chuan a pawl vak love, an dawh zo hman dawn lo anih chuan thal lai ngeia heng harsa zual bialah hian sorkarin buhfai a dah hi a tul hlein ka hria a.

Tin, kan Governor-in ‘efficient, transparent, responsive and corruption free administration’ tia huai tak maia a han sawi ngam hi a lawmawm ka ti a. He sorkar rorelnaah hian corruption chhuah zalen a ni dawn a, zalen takin corruption a awm dawn a ni, a ti a ni, corruption free a ti a, a chiang khawp mai. Kan Governor hi a fakawm ka ti a. “Corruption a zalen hle ang a, chutah chuan mawh an phur ang a, ualau takin/transparent takin an ti ang a, a tihdan an thiam hle ang, an efficient hle ang”, a rawn ti a nih hi. Chuvangin, sorkar bul an tan pawh khan sorkar hmasa MIP sum sem bang kha Congress worker hnenah vawk vulh nan an sem chiam a, kha kha an bultan dan anih reng kha. Tiang chu a ni a, nimin lawkah eirukna avangtea kawngzawh a awm a. Vawiin chawhma dar 11 khan New Secretariat-a canteen-ah lal chhungkaw zinga mi pakhat chu hna a zuar lai man a ni. A hming chu ka sawi lovang, Surveyor hna a zuar a, cheng singriatin. An inpe lai ACB leh PRISM tangkawpin an man a, tunah Police custody-ah a awm mek a ni. Chuvang chuan, he sorkarah hian corruption chu a free takmeuh a ang khawpin ka hria a. Khalampang hawi kha sawi tur tam tak sawi duh ila ka hria a ni.

Tichuan, kan mamawh chu mifel, miropui, mithiam aiin roreltu corrupt lo hi Zoram hian a mamawhin ka hria. Tupawh sorkar se corruption thu hi a awm reng a. PC sorkar lai khan ‘Corruption leh Mizoram Rorelkhawl’ tih lehkhabu leh ‘Corruption Kawngkhar Vengtu’ tih bu, a bu tawpin a lo chhuak a. Congress sorkar hmasak kum 10 zet an sorkar chhung khan lehkhabu hrang hrang – ‘Sualna Khurpui’ tih te, ‘Chhuanmang Rorel’ tih te, ‘Danbawchhepa Lalthutthleng’ tih te, ‘Mizorama Eirukna Thubuai Lian Ber’ tih te, ‘Thupsen Loh Sulhnu’ tih te a lo chhuak a. A bu hming pawh a turu em em hlawm a ni. Kum sawm zet MNF a sorkar chhunga lehkhabu lo chhuak kan en leh chuan, ‘A Phek Lehlam’ tih te, ‘Puanhnuai Thil’ tih te, ‘Thudik Hailanna’ tih te, ‘MNF Sorkarin a Ngaihna An Lo Hre Lo’ tih te, ‘Hei Le, MNF Sorkar Kihhnawkte Chu’ tih te a lo chhuak leh a. Pu Speaker, an eiru, an eiru lo tih ka sawi lo. Mizorama sorkar kan hrawn tawh zawng zawngtena an rorel chhung hian lal chhungkua atanga hlemhletna awm hi a buin a chhuak vek a. Court-a an khin kan hre lova, an sawifiah pawh kan hre ngai lo. Chuvangin, a pawl khawpin ka hria, hei hi kan ram mutan a ni.

Tin, kawng engkim maia inpuhtawn vek maia kal te hi kan sim a tha. Vawiinah hian party pahnihte hian Zoram mipui kan lu an tihai lutuk. ‘Mobile Van hlui an la’ an ti a, sorkar hmasa lamah, a titute ngei an lo sorkar a, a hlui leh hlui loh an sawi

chiang thei lo reng reng he House-ah hian, wawi engemaw zat kan sawi tawh. Kei pawh ka chiang lo, a hlui ngei a nih leh nih loh hi ka hre thei lo reng reng. A puhtute ngei an sorkar tawh. “Hospital chhawng a bo an ti a”, a bo leh bo loh hi he House-ah hian chiang takin sawi theih a la ni miah lo tun thleng hian. Suangpuilawn kidnap lem case chungchangte pawh kan la fiah thei chuang lo. Chutiingin, Rev. Chanchinmawia thih chungchang pawh thuin, chhuichhuak duhtu nia inchhal tunah hian an sorkar a, an chhuichhuah kan hre lo. Hmanah Bilkhawthlir bialah Congress MLA candidate campaigner Pu S. Lianzuala a thi a, a taksa chu sawisakna hnu hlin a khat a. Chuta lo sorkar zui chu MNF sorkar a ni a. Chu MNF sorkar chuan khatih laia Congress campaigner-te man mai awm ni chung a dimdawi taka ro a lo rel tawhna kha Rev. Chanchinmawia thih chhui thu in tinung leh a nih chuan, kha kha kan sawi ve leh ang an inti deuh ni te pawhin kan hria a ni. Chuvang chuan (SPEAKER : Group Leader i ni bawka, tun atangin minute 5 nei leh mai rawh aw.) Ka lawm e, Pu Speaker.

PMGSY sorkar hmasa hun laia kawng tlang vek tawh, kawng thar anga an laih a, an bill chungchang SOSA-in Guwahati High Court-a a khin pawh CBI an chhui tir tawh a, thutak a tling a, case-a lak tlak a ni an tih pawh Supreme Court-a chhana tihtawp saktu chu he sorkar hi a ni. Chuvangin, suankual ang an ni ka ti a ni, Pu Speaker. A inhlatna laiah inhlat viauin inbei viau mah sela, high level-a eirukna chungchangah hian inzawmna lai, inhriatthiamna lai, inhlathlemna lai hi, sam inphiarzawmna lai hi he party pahnih hian an neiin ka hre tlat a ni. Venus Bamboo-te pawh, “Congress a sorkar chuan an va chawh dawn”, kan lo ti a. Vawinah hian an nihlawh khawp leh tawh, khati zel kha a ni. Chuvangin, thil reng reng ‘a ni’, ‘a ni lo’ tia inpuhtawn a, a chianna mipui hrilh si lova an awm reng mai hian kan ram mipui min tichiai a ni heng party pahnih te hian.

Zirtirtu lak chungchangah te, School upgrade chungchangah te, Finance approval a awm a ni tih leh a awm lo, tih pawh House chungah leh House pawnah an inhnial a, kan chiang thei lova. SSA uniform leina sum a lapse a ni tih leh a lapse lo a ni tihah hian Zoram mipui kan chiang thei chuang lova an inpuh tawn vek a, mipui min tibuai a, ISPAT ram pek chungchangah pawh Industry Director hi guarantor-ah a tang a ni tih leh tang loa hriatpuitu mai mai a ni tih hi tuna mipuia an thu vawrh dan a ni a, a document ka hmuh ve hma chu a dik zawk ka hre thei dawn lova. Chuvangin Pu Speaker, Unstarred question-ah khan khawng zawng zawng kha ka rawn ngen a. A dik hi kan hrechiang ang a, a dik hi ZNP hian mipui kan hrilh dawn a ni. Hetiang ringawt maia ram hruaitu inti te ‘a ni’, ‘a nilo’ inti, a dik zawk hriat theih lek lova mipui min tichiai hi sim tawh se, ka duh takzet zet mai a.

Lottery chungchangah pawh chutiang tho chu a ni. Corruption kan sawi dawn chuan hmana MNF sorkar laia chutihlaia Vairengtea kan party Block President Pu K.T. Siam inhnuaia cigarette siamna khawl, chhiah chawi lova an lo siam tir, a hnuah an khar leh tak, a khawl zawng zawng a chawisawn theih silova, Pu K.T. Siam mangangin a nam lir zo silova, khawng zawng zawngte pawh kha sawi tur a awm. Chuvangin kan thil sawi duhdan te hi, nimin kawngzawh te pawh CID report-ah chuan a zat chu kan hria a, mahse 6000 velin kan han puan tir a, tiang mai maia game mawl lutuk hian Zoram mipui hi i chhiah kual i chhiah kual lovang u, thudik chu thudik a nia sawi mai tur a ni. Chuvangin Pu Speaker, ZNP hian thudik kan duh a, thil tha an tih chuan kan thlawp vek tute pawh hi, thil tha an tih loh chuan tumah kan thlawp thei lo, kan do zel dawn. Amaherawhchu, theihtawpin kan bei ang a, mipui hnenah thudik kan puang zel ang, chuvangin Zoram mipuite pawh lo chia lo sela, heng inhnial buaina karah hian thudik puanchhuah sak zel kan tum a ni, tih ka sawi duh a.

Tin, NLUP chungchang hi kan sawi kan sawi a, vawiinah khan ka Unstarred question-a sorkar min chhanna kha kan vaiin kan dawn ka ring a, nikum hmasa 2010-a NLUP sum kha vaibelchhe 116 hman ban tunah hian a la awm a, nikum 2011 ami hi nuai 992 a la awm baw k a, vaibelchhe 90 zet. Tichuan tun financial year ral tur ami leh a kum hmasa financial year ral tawha NLUP sum heta kan sanction, heta kan vote vek, kan passed vek tawh, Budget Session-a kan passed diam tawh kha vaibelchhe 200 vel la hman theih loh he sorkar hian a nei a, nakumah kan inthlang dawn a, nuai 1 theuha min pek theih hi ka ring miah lo, hunin a daih lo, hmana in sorkar hmasak khan cheng singthum theuh em ni min tiam kha, kum 10 chhungin BDO bial tam takah cheng khatmah an sem hman tawh lo a ni, kha tho te kha an ni. Tin, tunah MNF hun chhungin MIP-ah kum 10 chhungin singnga min tiam a, sing dawng pawh an awm mang lo, hetiang reng renga sorkarina mipui min chaw k min chaw k hi a huatthlala ka ti a. Chuvangin, he Session-in kan lo passed diam tawh pawh hmang thei lo khan nikum ami te, nikum hmasa amite pawh la hmang zo lo teuh khan naktuk lawkah hian engemaw zat kan han passed thar leh dawn a ni a, heng sum zozai hi engtika hman atan nge in tih a, engtikah nge in hman ang? Cheng engemaw zat in dawng tawh a, a bak zawng hi kan ba rih ang a, kan sorkar leh a ngai a ni, tia mipui bum leh nana hman em ni kan tum tih hi ka zawt duh a ni. Sorkar chak tak te hi kan han ti a, a chak thlawt lo anih hi, NLUP Calendar of works an siam te hi behind lutuk, a hnung lutukah sorkar a kal mek a ni a, heng zawng zawng hi kan ngaihtuah a tha ka ti. Sorkar hmasain computer zirna tura Company ruai a, cheng tam tak sum a lo pe thin kha vawiina kan sorkar hian a chhunzawm leh a, engnge a danglamna.

Tichuan, Leitha, Horticulture amite pawh kha a supply-tu dik takin Rs 690/- vela an supply theih laia Rs 1300/- a a siamtu pawh nilo, a supply theitu pawh ni miah lovin an lo supply-te kha ava mak ve! Vawiin thlenga Minister-ten kan hre lo an ti anih chuan Minister ni tlak an ni angem? Thiak te pawh saw ka hriat dan chuan Technical Mission atangin hei hi Nuai sawm man an ti a, technical mission ho an lo kal chuan chu chu an kawh hmuh a, chumi vekah chuan nuai sawm a amount chu engpawh nise, Mizoram sum atangin tah tho chuan chuti zat chu an hmang a, Mizoram sawrkar hnuai ami an va kal lahin chu chu an kawh hmuh leh mai a, double expenditure tam tak a awm a ni an ti a ni.

Thermal plan-te pawh Mizoram pawna din turin tunah hian a awm a, Mizoram hian tunah hian a hre lova. Mizoram mipui hi min thlim a, Mizoram pawna kan lungalhthei quota tute emaw duhsakna avanga Thermal plan dah tumna te hi a dik thlawt lo. Chuvangin heng zawng zawng hi thil fello niin ka hria a, heng zawng zawng ti lo tur hian, tiang tih ching lo Mizoram hian a mamawh tih hi ka sawi duh a, thil tam takah Sport-ah leh thil dangah te Governor thusawiah hian lawmna tur ka hmu tho , lawmawm lo vek ka ti lo. Amaherawhchu, heng thil hi kan hmaih thelh tur a ni lo, tih chu ka'n sawi ve dan a ni e. Ka lawm e.

**S P E A K E R** : Dr. R. Lalthangliana, hemi dawtah hi chuan Pu Chawnga chu a sawi thei tawh lovang, Pu Ramsanga kha, chumi sawifiah chauh chu ka phal ang che u nakinah, mahse a fiah chuang lovang, kan ngaihthlak ang khan lehlam pang atana fiah kha lehlam tan a fiah chuang lo, mahse in sawina hun chu ka siam sak ang che u. Dr R. Lalthangliana i lo ko ang.

**Dr. R. LALTHANGLIANA** : Pu Speaker, ka lawm e. Ka veilama ka thawhpui hi lawm viauin ka hria a, lehlam pang kha a sawi a, lehlam pang ati bawk a, ni pawh hi a chhuak sang sawt viau a nia. Kan Governor thusawi hi Pu Speaker, tha lo pawh ka ti lova, amaherawhchu, lawmthu sawi nana hun kan hman vak chuan kawng lehlamah kan ngaihpawimawh zawng kan sawi hman lo ang tih ka hlau deuh hleka, chuvang chuan lawmthu sawina lai kha chu kan lawm lo tihna nilovin ka sawi tam lutuk lo ang a.

Hei, kan term hi kan ngaihtuah vekin ka ring a, tin, kan budget session hi keini helaia thu ho hi chuan kan budget hnuhnung ber dawttu a lo ni ta reng mai a, tuna kan budget pass tur hi 2013, March ni 31 thlenga hman tur kan pass dawn niawm tak a ni a, vote on account mah ni sela, chuti anih chuan nakuma kan session leh chuan 2014 March ni 31 kan hawlh dawn tawh a, inthlan kum a lo ni dawn nen, chuvangin ruling tan pawh sessiona discussion kan han neih te pawh duham deuh hlek te pawh kan awm anih pawhin thil awm tak niah ka ngai a, chuvang chuan kan hun neih a tlem tawh a, kan Governor thusawi hi ka chik ka chik a tun term bika kan Governor hmasa berin a sawi, hman zanah ka keu a, chuta a sawi kha hengah hian a lang tawh mang lo. Entirnan - Zobawkah chuan Sports Complex atan vaibelchhe 34 sorkar hmasain a dah kha a awm a. Sorkar hmasa tih ang chiah khan chu chu a rawn sawi chhuak a, sanction pawh vaibelchhe 10 a ni a, hmanna ka va kal chu Pu Speaker, engmah tih a la awm lo, a mak ka ti hle mai. Heng lawmthu sawinaah hian kum thum leh a chanve dawn lai chu an sorkar tawh a, han lang ve se chu ka duh hle mai a, ka ti a, ka'n tarlang a ni. Chuvang chuan Pu Speaker, ka ngaihtuah ka ngaihtuah hian kan Governor thusawiah hian, kawng lehlamah chuan a lo ngaithlatu ho T.V-ah live telecast a ni a, min ngaithla thup turah ka ngai a. Mipui hi an lawm tak tak em? Kan sorkar-ah leh Governor thusawiah hian tihte ka rilruah a awm deuh a. Gas harsatna te, buhfai harsatna te, eichawp man sang ta lutuk kan han tih te leh Law & Order chungchangah Village Council tun tuma kan han inthlannaah te, tunhmaa kan inthlan ang lo takin khaw 15 (sawm leh panga) inthlang thei lova Law & Order chungchanga harsatna Peaceful taka inthlang kan nilo thei mai lawm ni? tihte kha, min lo judge-tuten kan thusawi atang khan a lawmawm em tih hi an en turah ka ngai a. Tin, keini Motor nei te hi kan lawm em? Road tax chungchangah kum 15 chhung han pek ngai tawp mai ang chi te hengte hi sub-committee te khanin thutawp an va siam har ve tihte rilruah a awm a, khangte kha han lang tawh se kan Governor Speech-ah hian tihte ngaihtuahna ka nei a.

Tin, ka sawi leh duh chu kan Governor Speech-ah hian a bik takin, kan ruling party-te kan inenfiah pawh a ngai em em mai a. Inthlan dawn, 2008-a kan thutiam-ah khan waviinah hian kan la ding reng em? Kha kan thutiam, kan manifesto ang khan a tak tak hian kan kal em tih laite pawh hi inngaihtuah Chiang Sela a thain ka hria a. Tin, hei lunglei Civil Hospital-ah kan kal lawk ang a. Hmanniah ka va tlawh puat a, tlawh satliah tak takin hmanhmawh takin. Pu Speaker, ka sawi duh chu Subject Committee IV-ah khan kan tel ve a, kan Lunglei High Power-a Vice Chairman, Chairman-na hnuaiah ka tel a, hei vawikhat kan va tlawh a, a rei tawh viau mai a, hei kum 2 dawn a ni tawhin ka hria a. Kan ngaihpawimawh tak tak kan Civil Hospital va tlawh khan kan nei a ni, recommendation-te leh observation-te kan nei a, chung zingah chuan thil tam tak karah electrification mumal lo, tun tuma ka va tlawh pawh khan a ngai te bawk khan a hnawk nuai mai a ni. Kan Health Minister pawn min lo hriatsak se ka duh, a hlauhawm lutuk tlat mai a ni. Tin, Transformer chungchangte pawh kha kan sawi bawk a, chubakah chuan Staff indaih loh chungchang, Aizawl te phei chu khaihin chi a ni lova. Amaherawhchu, a bikin kan Casualty ang te hi chu Casualty anihna ang hian function ve sela, Doctor on duty tena hmun danga lo kal te angin an remchan ang anga vuah chawp loh deuh Casualty te pawh hi kan mamawh ve tawh a ni tihte

kha kan sawi a. Amaherawhchu, ka va kal a, Khang Committee-in ngaih pawimawh kan neih, engmah tih mumal a la awmlo te hi a fello ka ti deuh a.

Hman deuh lawk nikum nita in ka hria a, tukina ka kalin ka rawn haw a, Buarpui/Darlung atangin tihian ka rawn kal chho a, khulai kawngte pawh khu kan ngaipawimawh a Subject Committee-in, Estimate zawk maw kha, khulai kawngte pawh khu kan zuk en thlap a, a bialtu MLA pawh a tel a, tun thal reilo te a ni tawh a, June thla kan kai mai dawn a, khuti em em maia chhe reng mai leh thawk chaklo lutuka kan kal a kha, a thawktu chu tupawh ni rawh se a fello deuhin ka hria. Chu chu thahnemngaihna thilah ka'n sawi chhuak duh a. Kawng chungchangah hian khawthlang lam pangin harsatna kan tawk nasa em em mai a, ka'n sawi duh chu Thenzawl atanga Buarpui inkar a chhe rapthlak lutuk, khawilai pawh hi a chhe vek; kan ruling bialte ngei ngei pawh hi tun V/C inthlan khan loh theihlohin kan tlawh a. Thingsai khawchhung khuk nasat zia te ka va hmu a, South Vanlaiphai khawchhung han khuk nasat zia, a kawng inkalpawhna, khua leh khua inkalpawhna chu kawng dang nisela, a khaw chung em em pawh tui intlak awm theilo khawpa khu lutuk te, kan Buarpui khua nimin maiah YMA Sub-Headquarter-in Conference kan nei a. Khaw danga Conference-ah black topping engemaw a zualpui tal an tih theih laiin khu em em, bumboh em em mai kawngah YMA khawmpui an han thleng te hi rualawh a na ka ti a, hengah hian sorkar hi kan rawn dem ngawih ngawih a nilo. Amaherawhchu, a tak hian mipui an lawmna tur ang chi hian development hi lang sela ka duh khawp mai a. Hengte hi a bik takin kan House Leader hian min hriatsak sela ka duh khawp mai.

Buarpui PHC khu ka sawi zing tawh khawp mai a, hei Ophthalmic kan tih Doctor kan laksak a, Dental Doctor-te waviin thlengin dah leh a la ni miah lova, khulai kan khawthlangah chuan a pawimawh tawpkhawkin ka hria a. Health Supervisor-te male leh female waviin thlenga kan la neilo te, Clerk pakhatmah awm lovin, a thiam awm lovin Hospital an han manage te hi a hahthlak em em mai a. Staff Nurse indaih loh nasat ziate Health Director te ka rawn phone ve rawk rawk a, kan Minister-in a bikin min lo hriatsak se ka duh khawp mai. Chungte chu waviinah hian helaia lawmthu kan sawi e kan tih rual hian thil hi kan ngaihtuahnaah hian kan famkim lo deuh a ni mai awm mange aw, tih kha ka'n tarlang a ni.

Tin, Pu Speaker, Home chungchangah hian lawmthu sawina kan Governor hian eng eng emaw a neih rual hian Police Modernization atanga thil tamtak thumthamna kan tih mek lai hian rilru natna a awm ta zeuh zeuh mai a. Kan Lunglei District-a thing kher kher saw chu Aizawl-ah hian phur tawh lo se ka duh khawp mai, tute emaw mimal ka sawilo. Lunglei District-a kan thing chereu tur khawpa Lungleia kan thing Aizawla kan phur pheih kher kher hi Police Department motor-in, hei hi a fello ka ti, ka hmu Chiang a, finfiah tlak a ni, a tha ka ti lo.

Tin, chubakah Police kan chhawr lo ang, an tih ang chi pawh hi waviinah hian kan mit ngeiin kan hmu ta nual mai, kan thiante pawhin in hmuh ka ring. Ka mit ngei pawhin an chhawr hi ka hmu, zan rei tak tak thlengin Cement an load tir, rora an load tir, Balu an load tir, an chawh tir, a then chu hriselna thalo ve tak takte an ni, heng pawh hi kan enchian a ngai. Kan Minister pawhin tha takin House-ah thu a sawi thin, hemi chungchangah. Amaherawhchu, hemi chungchangah inenchian leh zual a pawimawhin ka hria a.

Tin, NREGS kan tih chungchangah hian hei VC kan inthlang zo chiah a, a tu a te pawh lo Sorkar ila, lai taka kan kal a thain ka hria a. Nimin maia thingtlang

khaw thenkhat ka tlawnah eng eng emaw thu leh hla a awm nual mai. Opposition VC naah chuan Pu Speaker, material component hna reng reng hi ruling VC-in in thawk ang, tih ang chi boruak a leng nasa khawp mai, hei hi tha ka ti lo. Hei, kan Chief Minister hi thil tha duh ni pawhin ka hre ve, a chang chuan khawng deuh deuhin thu a sawi, mahse vawinah hian hei hi a takin kan kalpui ka duh khawp mai. Chuvang chuan, kan VC lohna a nih avanga kan VC te vawinah hian kan palzut hi a tha ka ti lo tih ka sawi duh.

Tin, RMSA hmanga School Building kan sakte pawh hi a chhe lutuk, a fello. Ka bial Buarpuiah Pu Speaker, RMSA hnuai School Building, kan hun laia kan ruahman danah chuan building 1 sak nan cheng nuai 50/60 tel kan siam a ni. Mahse ka zuk en a, nuai 30 a tling em aw, an sanctioned kha, pawisa hmuh hi. Contractor pawh nilo, party worker 7 in an intawm anih chu ! a liang chu ka ban a, kei hi ka pa lian lo hle a, in hria a, ka ban phak deuthaw liang anih chu mawle, a ceiling han siam ta chiah se, pa lian deuh chuan an tawng pha mai awm mang e aw ka ti, Pu Rothuama te ang chuan. Khua a lum si, a tira specification ang nilo lutuka hna kan thawk thin hi a fello, hei lo pawh hi hmun tam takah ka hmu tlat.

Tin, contract hna kher khera tute emaw thawh tir hi a fello. SSA-ah pawh civil works, school building sak chu kan ngah thin, sang tel kan sa, hun hmasah. Worker hian an awt em em, thawh pawh an chak, nuai 4/5 man te alo ni ve a, mahse tunah chuan Village Education Committee, kan hunlaia kan thawh tir ang chi kha thawh tir tawh reng reng lovin worker-in an thawk zel mai a ni, contract hna. Chuvang chuan hei hi Central Guideline-te pawh hi kan enchianta pawh a pawimawhin ka hria a, fello ka tih lai kha ka'n sawi a ni.

Pre-Matric Scholarship-te pawh hi Pu Speaker, kum dangah chuan December thla leh January thlaah an la vek, kumin hi enge ni a chhan pawh ka hre lo, March thla tawp kan thleng tawh, Pre-Matric Scholarship hi tunah hian tumah la an la awm miah lo, a fello lutuk. Mid-day Meal te hi a va mumal lo em, fundamental right of Children a ni, Uniform-te pawh fundamental right of children a ni, khami a hun chhung bik financial year bikah hman ngei ngei ngai kan palzut nasa lutuk. Chuvang chuan, Pu Speaker, lawmthu sawi ngai tamtak a awm rualin heng hi kan sawi lo thei lo a ni.

Hei, vawinah kawngzawhte an awm niten an sawi a, ka hre chiah lova, tlai deuh hlekah kan lo thleng a. Hetia lawmthu kan han sawi rual hian Plan-a hlawh la, la theilo te hi engzatnge ni? Vawina kan dinhmun hi? Lawmthu sawi a harsa khawp mai. CSS Hindi zirtirtu hian engtia rei nge hlawh an lak tawh loh? 2011 nikum October thla atang khan hlawh an la la miah lo Pu Speaker, mi 1305 an niin ka hria a. Chuvang chuan hei hi kan inenfiah a pawimawhin ka hria a ni. Higher & Technical Education lama lecturer-te harsatnate hi sorkar hian an lungawina turin vawinah hian kan dawngsawng em? tih te pawh hi kan inen a ngai.

NLUP chungchangah hian Pu Speaker, tawi tea ka sawi duh chu, NLUP hi opposition kan nihna ang hian kan sawi chhe reng reng lo, a scheme hi a thalo kan ti ngai lo. Amaherawhchu, 2008-a commitment manifesto-a lo langah khan cheng nuai khat kumnga chhung atana pek tih lo inziak leh sawi lo ni bawk si ah khan mipuiin min zawt a, sawi loh theih loh awm ve angah vawinah hian kan hriat avangin, NLUP hi kan sawi chhe reng reng lo. Chutah kan han en a Pu Speaker, nikum December thla hnih thum kal ta leka Mizoram



Approval Annual Plan kha en ta ila, kan kawl vek member zahawmtakten, 2011 leh 2012 kha han en ila kan Annual Plan hi chiang takin a inziak a. Kha kha vaibelchhe sangkhat leh zasarih a ni, chu vaibelchhe sangkhat leh zasarihah chuan vaibelchhe zahnih leh sawmthum leh pali kha sangkhat leh zasarih chhungah hian a awm a ni tih hi a awm reng. Engatinge ni? Pawhpen tih leh tih loh lampang kha ka sawi lo, mahse, kan Annual Plan Budget chhungah hian a awm a ni tih hi pawm ila, chu chuan harsatna Department 22-ah a siam a ni mai lo maw kan ti mai a ni. Chu Department 22-tein nikuma tangka a hma kum aia an indaih lohna hi a lo lang vek a, nuai singthum leh sangli leh sawmsarih pakhat leh point sawmthum pathum a ni. Chu harsatna avang chu a ni vawiinah Vanapa Hall-ah an punkhawm nachhan ni, chu zawk chu vawiinah Pu Speaker, kan sawi chu a ni. Inthlan dawn khan Prime Minister Special Package atangin hei chu kan hmu ang, hetah kan Annual Plan package atangin kan khawih buai lovang, ti tlukin keini chuan kan lo ngaithla a ni, mahse, kan hmu leh thei ta si lo hian kan rama sorkar hnathawk leh mipui hian harsatna kan tawh phah a ni lo maw. Chuvang chuan vawiina kan sorkar kum khat emaw lek kalpui tute hian hun an neih mek lai hian kan inenchian a pawimawhin ka hria a, Thil ropui tak tih hun a ni tawh lo a ni tih pawh kan hriatpui che u. Kumin budget bak hi chu chinfelna hun hi in neilo tih pawh kan hria, kan neilo tih pawh kan hria. Amaherawhchu, thahnemngaihna avangin vawiinah helama thute hian thil tha engemaw mipui tana hun reilo te in neih chhung, kan neih chhung pawh hian kan la ti thei ang tih hi thahnemngaihna avangin vawiinah hian heng hi ka rawn sawi chhuak a ni, tih hi min lo hriat sak ka duh a. Heng kan sawi atang hian a bikin Pu Speaker, kan dinglam amite pawhin nasa leh zualin inbih chiang sela ka duh khawp mai a, duhsaknate pawh kan hlan reng. Amaherawhchu, opposition kan nih avang ringawt hian a sorkar chelhtute sawi chhiat ngawt kan duh lo, kan tum a ni lo; amaherawhchu, mipui tana ding kan nihna zawnah thil tha a rawn inher chhuah theihna atan, mipui tana hnathawk kan nihna zawnah vawiinah hian thahnemngaihna zawnah helam hian tlemin kan tawngkam kan han hmannaah te ngaihlthlak a lo nuam lo deuh anih pawhin min hrethiam ula. Heng zawng zawng hi thahnemngaihna leh mipui tan a ni tih hi ka sawi duh a ni. Ka lawm e.

**S P E A K E R** : Awle, ka sawi ang khan Governor Speech a ni a, kan tui hle a .Inthlan kumte kan lo hnaih zelin kan inthlang zel a ni a, V/C ah te pawh. Kan politician kan kawla na na te hi zawng, zawng chhip khawih tih ang deuh hian kan han vir deuh vat hunte hi a awm thin a. In clarify duh tak tak hovin ban an phar a, kei Speaker hian khati laia chance han pek loh ringawt pawh kha niin ka hre lova. Mahse, ka sawi ang khan in in clarify ang a, a chiang lo chu an chiang lo tho ang, mahse chianga in clarify anga in hriat ang chu sawina chance ka lo pe ang che u. Mahse, hun reilote, minute emaw lek hun inpe ila, Pu Chawngtinthanga ilo ko ang.

**Pu CHAWNGTINTHANGA** : Ka lawm e, Pu Speaker, member zahawmtak Pu Lalduhoma khan Tuivai lei dawh chungchang a rawn sawilanah khan sorkar hmasain a material zawng zawng a hmunah an chhek khawl vek tawh ang khan a sawi a; tun sorkain vawiin thlenga zothei lo angin a sawi a. Chutiang chu a ni lova. Sorkar hmasaah khan Build worth company, Guwahati base an ruai a, khamite khan an thawk hlei thei lova, PWD hotute, kan Chief Minister zahawmtak hnenah pawh ka thlen thin a, PWD hote pawhin an mangan pui a. Anni kha an cancel-in tunah hian Mech Fab company-in an bei chhova. Hemi company-in an lak chinah chuan material kha chak takin an check chho ngar ngar ta a ni. MNF hunlai khan material zawng zawng kha a hmun a thlen vek tih kha hriatsual a ni e, tih kha ka sawi ngei ngei a ngaiin ka hria. Tunah hian chak takin a bei chho mek a, Thal Lei pawh khi keimah ngei a hmunah

riakin ka han dawh pui a, PWD atangin Rs.10000 perek man tur min pe ula ka ti a, ka chiang khawp mai. Khi bridge kal mek khi ka monitor reng a, theih tawkin, tunah khian erection lehlam an zo tawh a, lehlamah erection pathum vel zawh loh an la nei a, a chhuat khi an bei phei ang a, concrete tur a ni a. Vanduaithlaktakin tun kum chhung hian kan zo lo palh thei ang tih a hlauhawm a. Amaherawhchu, Engineer-honen nitin deuhthaw kan inbia a, tunkum chhung hian zawh ngei kan tum a ni an ti a ni.

Tin, supply chungchangah khan reilote chhunga an ei tawk aia tam an neih loh chuan an mangang tlat thin a, chuvangin hei hi sorkarin policy tha tak neiin in ei tawk aia tam kan dah hnur chuan Manipur-ah in thawn chhuak a, back trip a lo awm leh thin a; chuvangin ei tawk te te inpek hi a tha a ni, in nghei dawn reng reng lo, in nghei dawn anih chuan he sorkar chak tak hian Helicopter pawn a rawn pe mai ang che u, tiin ka sawi a ni. Kan chhek khawl lovang kan ti lova, tunah hian Monsoon period chhung atan chhek khawl turin kan bei ngar ngar a. Tunah pawh quintal 180 a thawn chho tawh a ni tih ka sawi duh a ni.

**Pu P.C. ZORAM SANGLIANA, MINISTER** : Pu Speaker, clarify zawng chuan ka phar vak lova, amaherawhchu, Governor zahawmtakin mimal taka harasatna nasa tak a tawh mek laia he sorkarin a hmalakna chungchanga a thusawi, member zahawmtak Pu Selthuama'n lawmthu sawina a rawn neih hi support-in thil thenkhat han sawi ve tum ka ni a. Ka sawi duh em em chu, kan ram kan hnam hian malsawmna vawihnih kan lo bawhpelh ve tawhin ka hria a, he hnam tan hian. British hun laia duh thlang thei kan nih laiin kan thlang fuh lo niin ka hria a.

Pahnihnaah chuan kan pasalthaten ramhnuaiyah he hnam maicham-ah an nunna thisen an hlan a, India sorkar nen inbiain, remna zawngin inbiakna a awm mek lai khan, vawiina House chhung emaw pawn emawa kan inpuhmawhna chi hrang hrang kha, khang hunlai khan zirlai hruaitu kan lo nih vena atangin, "heng ang hi chu khawngaih takin rawn ziaklut hram rawh u aw", kan lo tih te, ziah hmaih a ni leh hlauh mai a. A chhan ni bera lang chu, Chief Minister thutthleng luah mektuin a kian thei dawn a ni tih hriat lutuk avanga, he hnam tana thil kan lo thlir ve, an rawn ziah hmaih nasat lutuk avang hian, he hnam vawiina mi thlir lo thleng turah hian mi pen ruala pen dawn hian harsatna a thlen thin niin ka hria, paw ka ti khawp mai. India ramah a ziaha rawn inziak lut ngat Party-te tan phei chuan heng hi sawi sawi chi pawh a ni ve hlei nem. Keini pawnlama va chhuak ve lo, ramhnuaiya zan khat pawh riak ve lote chuan, an rawn hawn ang ang lawm taka kan lo nghah mek laiin, Bible tluk zeta ngheta inziah luhna India Constitution leh India rorelna sang, Supreme Court-tena India citizen-te leh India mipui tana a thupek ang, vawiina State sorkarin implement an tum mek laia kawng ka zawh e, bal e, kan sorkar hunah kan titawp dawn? A ziaha ziaak lut ho hian an titawp lek lovang. Indiaah hian inziak lut ngat tan phei chuan a theih loh leh zual. Chutiang dinhmuna kan awm hi he hnamina a Golden chance a chan ropui lutuk vang a ni. vawiinah thil chi hrang hrang remna leh muanna, hmana Chief Minister zahawmtakin a duh huam huam te hnena Chief Minister nihna a hlan laia piangte khan, vawiinah hian vote an nei tawh asin. Rambuai thim chhah lai hre pha lo reng reng, chumite fuihpawrh zawng leh engemaw zawnga mipuite hnena ngaihdam dil lo leka, hetiang a mipuite bum tumna a lo awm ta hi Pu Speaker, he sorkar hmalakna a rawn sawi meknaah hian min lo ngaidam la, a sawi bak chu (SPEAKER : ... ni a ka inhriat chu rulh leh turin thi te, hliam tuar te mittui hruk hul an tum tih kha a... interup...) ka rawn

sawi ve mai a ni. Chuvang chuan hemi chungchangah hian heng ang thilah mipuite bum kual ringawt thinte hi kan mipuiten an hrechiang tawh khawpin ka hria.

Pawl hming pawh mipuiten kan hre tan dawn chauh a, pawl hming dang lo vuah leh hman thinte hnenah hian mipuiten thuneihna pek an tum lo reng reng. Inthlan apianga pawl hming hnan nei thar ziah te tan pheichuan Mizoramah hian thuneihna mipuite hian pek an tum lo hrim hrim. Chuvang chuan kan Governor hian he sorkar hi kum reilote chhunga hmalakna chi hrang hrangah lawmthu sawina tur a rawn sawi zingah hian Pu Speaker, Village Council inthlan emaw Local Council inthlan emaw te kan hmuh hian hlimawm em em kan hmuh chu nidanga sawi rik awm thin awm ta lo tawp mai, thlamuang taka kan inthlang leh inveh inveh tawn thin te, an han tang ho a, Aizawl khawpuiah Local council-ah te, veng tinrengah an tangho deuh vek a, chuti chung chuan min hnehna vengte an han nei a, sorkar kan hneh ta a ni, tia in mu lak ar thin te an han tang hote khan Democracy hlutna tilangtu a ni. Kan Governor-in inthlanna felfai lantir zia a sawi hian hengte hi a tilang leh zualin ka hria a.

Hmanni lawkah Pu Speaker, kan hriat theuh angin vanduaina rapthlak tak ka Department enkawl Transport kaltlangin a lo thleng a pawl ka ti hle mai. Ka pawl tih zia min hriat saktu chu kan Chief Minister hi a ni a. Chutah chuan keima (moral responsibility) mawhphurna a ni tih hriain a hnenah pawh ka banna ka thehlut a nih kha. Mahse, amah min ruattu vekin min pawm sak lo in, 'nangmah a mawhphurhna a ni lo' tiin vawinah hian Minister angin ka lo ding leh thei a. Vanduaina chungah ka tan pawh lehlamah chuan zir tur tam tak pawh a awm phah a ni tihte pawh Department kan enkawl naah pawh ka hmuh phah a ni. Chutih rual chuan kha mitthite kha kan tuar em em a, kan sun a, mahse, kan Department dinhmunte uluk takin kan han thlir a, chutah chuan khang vanduaina tuara thite kha tanpui theihna dan hei chen sorkar lo awm tawhah hian a lo awm reng reng lova. A nih leh enge tanpui theihna dan awm thei han zawng teh u, mihring 16 lai nunna chan a ni a, hlaim hei zat an awm bawk si, a tih dan a awm em? kan ti a. Chutiang tih dan kawng a awm nia an hriat an rawn moved a. Tichuan kan House Leader zahawmtak, kan Chief Minister-in min lo approve sakin niminpiyah lawkah khan mitthi te Rs. 50,000 a ralna ti mai ang, a ralna tih chu a mawilo vang e, tanpuina hmahruai atan an han pe thei ta a, kan officer-ten hmanhmawh takin an inah te kalpuiin damlo inhliam mekte a then chu damdawi In atanga chhuak tawh te an ni a. Chutiang chuan dan a awm lo a ni a. Sorkar hi dan anga kal a ngai si a, chumi dan anga awm theihna dan chu kan Department ngei te pawn kan mawhphurhna a ni tih hriain hetiang anga kan Department kal tlanga vanduaina tawh an nih avangin mawh kan phur ngawih ngawih a ni tih inhriain, nakinah chutianga tanpui theihna kan neih ang ang chu a hun a lo thleng ang a, chung hunah chuan heng thuremnaten heng angte hi rulh leh tura a ti che u a nih pawhin chung chu in lo hre dawn nia aw ti a kan officer thenkhatten an lo hrih a ni ang. Thuremtu turte thurem dan tur kan hriat lawk loh thil a ni. Chutiangan an mittui tlak belhna turin pe kan ni reng reng lo, an harsatna, an tawrhate kan tawrhpu zia lantir nana kan Chief Minister-in a awm leh awm lo chung chung a remchan dan anga min han buatsaih sak hram hramna atanga heng ang hi ti kan ni tih hi ka sawi duh a ni. Hengte hi kha ta tana an mittui tlak nan ringawt pek an ni love. (PU R. LALRINAWMA : Mi pakhat thiah singnga final award-ah cut leh tur a ni, chu chu danah a awm vek a ni) Chutiang anga sorkar dan dik tak a nih laia Pu Speaker, kan officer thenkhatten an lo hrih a nih pawhin an tih tur an ti a ni mai. Thil dik tak an ti a ni zawk heng puhi tumna te hi mite mittui tlak nan kan ti a ni reng reng lo, kan tawrh zia lan tir nan kan ti a ni zawk.

Tin, Pu Speaker, pakhat ka'n sawi leh duh awm chu, motor road tax pek chungchangah Life time tax pek chungchangah te pawh India ram pumpuia vawiina tih tura tih a ni, India ram atanga chhuak kan nih siloh chuan India ram dana kal mai tur kan ni tih ka sawi duh. Chutah chuan private motor chauh a ni, public carrier te, bus te, sumo-te a tel ve lo. Private motor chuah hi a ni Life time tax pe tura kan tih ni. Chutiang chuan, taxi te, bus te, sumo te an tel ve reng reng lo, anni chuan quarterly pawn an la pe thei, khatiang kha anih laiin heng ho hi va fuihpawrh tel phet tum te hi a dik lova. Vawiinah hian chanchinbuah te vawi tam tak kan tarlang tawh a, chung chu thil awm dan a ni. Chuvangin Pu Speaker, a tawpna atan ka'n sawi duh chu inhrilhfiah nan chauh ni lovin kan Governor zahawmtakin a rulh leh tur a ni a (PU LALDUHOMA : Kan Governor zahawmtakin a rulh leh tur a ni a kha kha chu kan chiang tawh a, a chiang kha kan duh a ni mai a, kha mi final award tih kha engzah nge beiseiawm ni a sorkarin in tih sak dawn nge an mahnin an ti dawn tih lai kha han hriatchian a va tha ve, engmah an chiang lo a nia kan chhiat tawkte hi) (PU RL. PIANMAWIA : Pu Speaker Kha lai kha chu mitthi chhungteah a kal vek a, damlo chhungteah a kal vek a, ka hrilhfiah vek a tih dan tur chu, a kaihhruaia form pawh ka pe vek, tin income tax certificate leina tur pawh ka lei a, an inah ka pe vek chu chu kan hria ) (PU R. LALRINAWMA : Pu Speaker, Accident.....Vehicle Act-ah hian accident a lo awmin tribunal a awm a, court lampang a ni lova, tribunal-ah tah chuan an claim ang a, chu chuan a mitthi emaw a hliam emaw kha an income te, a kum zat te khang chhut khan hmuh theih a awm a ni. Chumi zat tih helaiah sawi thei lovang a, an kum zat te, an income a zir tein tah chuan an hmuh theih zat turah khan interim release Rs.20000 te Rs.25000 te an lo pek kha cut tur tiin danin a bithliah vek avangin chu chu sorkarin a tih mai thil a ni lo a ni, tih kha ka'n sawifiah ve a ni. (PU R. ROMAWIA, SPEAKER : Awle a tawk a tawk.) Pu Speaker, chuvang chuan heng ang insawifiah ngai min pekte insawifiah pahin vawiina Pu Selthuaman Governor thusawi zahawmtak mai lawmthusawi pahin ka rawn support a ni tih ka rawn sawi ve a ni.

**S P E A K E R** : Mautam hmasak khan Zalen party chuan Buhfai a thlawna ei an ti a, Union Party chuan a thlawh hi mipui rilruah a tha lo kan hnam than zelnaah an ti a, tichuan, eipuk khan Mizoram mipui min ei puktir ta a, mahse, Mizoram Sorkarin khawi atangin nge dawhkanah a zia fel kan hre lova, a takin tam tuarte khan kan eipuk kha kan rul miah lo. Chutiang ang chi chuan Sorkar hian Rs.50,000/- hi in rul leh dawn a nia aw, tih kha thil sawi tullo lutuk a ni, chu zawk chu rilru intihnatna lo thlenna mai mai a ni, aw le, Pu Lalsawta i lo sawm leh lawk ang.

**Pu LALSAWTA, MINISTER** : Pu Speaker, kan Larsap zahawmtak lawmthu sawina kan nei chho va, sawi tur tam tak a awm a, i dinglam amite leh i veilam amite thusawi thil thuhmun rengah hian lo thlirtute tan a inang lovin a inpersan thei hle mai tih a lang chiang khawpin ka hria. Vawiinah hian kan Governor thusawia lawmthu sawina i dinglama thute zing ami ka nihnaa han sawi ve ngaia ka hriat leh tuna kan Member zahawmtakten an sawina atanga, hei hi chu dik zawka han sawi chian a tha mang e tih ka neih ve nual a vangin leh tihfiah ngai tlem ka neih avangin hun tlai tawh deuh mahse din ve ka rawn dil a. Tin, tunah hian 5:10 p.m. a ni a, he kan House, ram rorelna sangber, kan ram chuan hei aia rorelna sang leh pawimawh kan nei miahlo a ni a, nangmahin rem i tih phawt chuan a tul chuan zan dar 12 pawh kan thleng mai a nga, hei hi kan hlawh hmuhna chhan leh Public, mipuiin min rinna, "He pa hi kan ram tana pa rintlak a ni", an tihna tur atana kan thusawi, kan kam chhuakte pawh a pawimawhna hmun a ni a.

**S P E A K E R** : Nangmahni zawk hi in zun a chhuak a, kalbo in hrat em thin zawk a lawm le.

**Pu LALSAWTA, MINISTER** : Pu Speaker, kan chhuahsan tawhlo ang che ang a, kan sawi ngat ngat mai a nga, i phalnain tlem han sawi ve ka duh a.

Pakhatnaah chuan he House hi i rorelna hnuaiiah hian lo thlirtu tan thudik hmuh theih lohin a awm ang tih ka hlau a ni. Chiangkuang manglo han sawi a, nive awm tak si, mahse, finfiah nilo, chutiang sawi tam tak karah chuan tute emaw hi puh chhiatin kan awm thei a ni. Kan dinhmun pangngaia ding zo lo khawpin i rorelna hnuaiiah hian tuten emaw thu an sawi chiam avangin dinhmun thalo tak kan neih theih avangin he rorelna hi a zahawm a. Chuvangin thudik hi kan theih ang chen chen hi chu kan tungding tur niin ka hria a ni. Pakhatnaah chuan, kan Member zahawmtak Dr.R.Lalthangliana rawn sawiah khan RMSA building a chhe lutuk a, keini hunlaia nuai 50 ni thin kha, nuai 30 vel man ni awm lek a sak a ni a, a liangte chu a hniam lutuk a, tih kha a ngaithlatu zawng zawngin a sawi ang kha a niin an ring vekin ka ring a, a nilo pawh ka ti chuang lova. Mahse RMSA building-te hi mumal taka estimate neia tih a ni, building dang zawng zawng leh Leilawn te, Sorkar hnathawh tur ang te tih vek a ni, chutiang ang a nih loh chuan an thawh man hi kan pe thei lovang. Hei hi ka sawi chiang duh a. Tin, helai hi kan sawifiah dawn tak tak a nih chuan kan thu hrilh te, Zoram mipuite ngei pawh hian an hriat dik theih nan chumi khuaah chuan RMSA building chutiang chu a awm a, chumi sak chu a ni a, a liang san zawng hetiang hi a ni tiin sawi law law nise.

Chutichuan Pu Speaker, he House zahawmtak rorelna hian thudik kan laihlan fo hi a tul thin a. Chuvang tak chuan nichina NLUP chungchang leh vauna ang chungchangte pawh kha thil dik a nih chuan citizen kan ni a, kan complaint thei a ni. Intimidation to Voters IPC ah hrem theih a ni a, Representation to People Act-ah pawh hrem theih a ni. Punishable offence a ni a. Chutianga an vote hlu tak mai NLUP hmuh loh hlauh vang emaw an hmuh tawhsa pekkir leh ngai tur khawpa vau avanga an duhna pawh tingam lo khawpa siamtu an awm a nih kha chuan FIR pawh an thehlut thei ang a; Police pawhin an man thei tur a ni, Dan a awm vek. Chuvangin helai House-ah hian thu rin tlak kan sawi dawn a nih chuan, “Chu chu, kha kha”, ti ve tur rual kan niin ka hria, helai mi 40 thu te hi. Tin, sawi a tha, he House hi rorelna hmun a ni. Thu chhia/thu tha kan sawina tur a ni. Kan ram tana kan sawina hmun a ni. Chuvangin thu dik i sawi ang u.

Pahnihnaah chuan a thawithama thil sawi a, chianguang mang lo hi a tam khawp mai, amaherawhchu, thu dik chianguang awm erawh chu Middle School leh High School Hindi Teacher CSS hnuaiia kan lakte hi hlauh kan pe thei lo a ni. 100% Central funded a ni. Central sorkarin a pek a ni. Feb.22 Delhi-a Minister conference-a ka kal khan a tukah Officer-te hruai a ka kal khan ka tih tur ber a nih pawh ka hre lo naa, an tih than dan a nih pawh ka hre lova; amaherawhchu, tula ka hriat avangin Ministry of Human Resource Development Office-ah ka kal a, rei tak inkawmna pawh kan nei a. Hemite pawisa harsatna an neih dan chungchang leh “India ram state dang zawng zawng hian Hindi zirtirtuah nangni chiah hian he pawisa hi in chang a, chuvang chuan kan sanction theih tur che hi chu tunah chuan crore 3 pel awrh chauh kan sanction ang che u ang a, a bak hi chu March thla chhung hian kan rawn sanction ang a. He pawisa hi SSA pawisa te ang lo takin lapse thei a ni a, a lapse theih avang hian March 31 hma ngeia draw turin lo inbuatsaih ula, a lapse vaih chuan kan revalidate thei dawn lo”, a ti a. Chuvang chuan Pu Speaker, a Lapse kan hlauh avang hian

kan Finance Minister zahawmtak hnenah pawh he thil hi chu ven ngun a ngai a, a lapse loh hramna turin, tiin lehkhka ka ziaak a.

Tin, karleh hian ka Private Secretary pawh chumi zuk vil tur chuan Delhi-a kal turin kan intir mek a ni. An hmu tlai hi pawh kan ti, kan duh dan a ni awkawng lo. Mahse Central Sorkar berin a neih remchan miao loh chuan keini, khamia inring tawp tan chuan a tihngaihna kan hre lo a ni. Tin, hlawh lak chungchangah chuan Member zahawmtak takten an rawn sawi tawh a, han sawi nawn leh vak ngaiin ka hre lo va, thil pakhat erawh chu finfiah a ngai, Member zahawmtak Pu Duhoma han sawi, “finfiah lo hian a awm ta zel mai ang e, in in thurual em ni han tih ang tur khawpa mipuiin ngaihthat lohna an lo neih theih tura finfiah ngai lo awm ta hian mipui a tichiai thei, dik tak a ni. Hei hi ka pawm a, kan ember zahawmtak rawn sawi chhuah pawh kha tha ka ti a. Engemaw hun lai khan Education Minister hlui, vawiina kan House member zahawmtak khan SSA pawisa hi a lapse a, cheng nuai 743 hi a lapse a ni, tiin Press Conference a kova. Chutah chuan documents engemawzat a thil tel a, chu documents a thil telte zingah chuan audited paper-te zingah fabricated documents siam chawp, kan zawn hmuh zawh loh, fabricated documents a rawn telh a, vawiinah hian ka rawn keng vek a ni. Pu Speaker, vawiinah hian ka rawn keng vek a, a awm lova, kha lehkhka kha, tu fabricate emaw a ni. Chuvang chuan, lapse tih chiang takin hemi column-ah hian a awm, a awm a kha ...(interruption)...Pu Speaker, i phalnain he lehkhka hi amahin a Press a, a sem vek tawh a ni a...(interruption)...mipui bumna turin hetah hian documents niawm tak Annexure-II-ah hian saptawng kan hman ngai reng reng loh ‘lapse’ tihte hi an ziaak a ni. (Interruption.) document diklo ni chauh lovin hei hi fabricated document a ni....(Interruption)... Pu Speaker, kan sawi zui lawk ang e, a phek dangah hian rinawm tak tak a awm, signature-te pawh a awm, mahse, Annexure-II ami ‘lapse’ tih awmna tawngkamte kha kan hman ngai reng reng loh a ni. Chu chu dawt hulhual a ni. He phek hi ‘fabricated document’ a ni tlat. Engatinge mipuiin an thlan tlin, an rin em em, he House member zahawmtak hian fabricated document hmanga, Press Conference hmanga mipui a hruai kawi.....chuvangin he document hi i nei a, i neih hi fabricated a ni kan ti mai (..Interruption..) Pu Speaker, khawi atangin nge a hmuh kan hre lova, Press Conference a neih atang khan, “Website-ah zawng zawng zawng ula, Ministry of Human Development Resource-ah te zawng ula, kan documents-ah zawng bawh ula, hmanhmawh suh u. Ni 10, ni 15, ni 20 pawh hmang rawh u. He document hi khawvelah hian a awm em? Nge Dr. Thangtea, kan Member zahawmtak hian a phuahchawp mai mai? He thil hi ka ti a, an hmu zo lova, ‘Fabricated document’ hmanga mipui a bum hian nasa takin mipui a tichiai a ni, Pu Speaker. Chuvangin he House kaihhraina hnuaiah hian a zahawm ka ti a. Thudik sawina hmunah hian thudik i sawi tlang ang u, chu chu ka ngen a ni. Chuvangin i phalnain khawngaih takin member zawng zawngten ka nei e, tia rawn phar rawn phar kha hei hi ka neih ve vek tho avangin member zawng zawng daih, kan zavaia indaih a nih bawh avangin, min sem tir thei ula. Heta Annexure-II tih a “Lapse” tih tawngkam lo awmte hi tan chhan berah an hmang bawh si a. Hei hi khawvelah hian official (Interruption)...official circles-ah ....(Interruption)...chuvangin he document hi he House zahawm takah hian ka pe ang a, member zawng zawngte ...(Interruption)...a lapse leh lapse loh chungchang hi.....(Interruption)

**S P E A K E R** : Dr. R. Lalthangliana, MNF Vice-President-in Press Conference a kohna a, a tih copy kha i tia mi kha? (Pu Lalsawta, Minister : Ni e, Pu

Speaker.) Anmahni khan sem zawk tur awm tak an nih chu mawle. Nang Minister-in sem lovin le.

**Pu LALSAWTA, MINISTER** : Fabricated document awm nia kan hriat chiah avangin hei hi kan member-te leh mipuite hian min hriatpui se kan duh avangin kan sem a ni. Sem tlan a tha a, kan hriat avangin kan sem a ni.....(Interruption).....

**Pu LAL THANHAWLA, CHIEF MINISTER** : Pu Speaker, tiang hi a nih hmel. Minister zahawmtakin a rawn lek chhuah hi a ni lawm ni? ... (Interruption).....finfiah theuh ang u, tihna a nih chu. A tul phei chuan Ministry-ah kan ti anga a ni mai a lawm. A intihmingthat .....(Interruption).....zuk kal se a ni mai alawm.

**S P E A K E R** : Awle, kan thu chu a tlang bawk a...(Interruption)...chutiangin kan khaikhawm dawn .....khaikhawm dawn teh ang.....(Interruption)...A document chungchangah kha chuan chair-in thutawp kan siam dawn ang e. Lapse leh lapse loh chu han sawi phawt rawh.

**Pu LALSAWTA, MINISTER** : A ‘lapse’ leh ‘lapse’ loh chungchangah hian SSA tawngkamah hian Lapse a awm lova. A awm loh chhan chu a lapse ngai loh vang a ni. Chu chu lapse tia kan hriat leh lapse tia an hriat a inan loh vang pawh a ni mai thei a. SSA tih tawngkamah hian lapse tih tawngkam a awm lova ni pakhatna.

Tin, pahnihnaah chuan ‘Lapse’ tiha kan hriat tlangpui hi a given year, a given financial year, for a particular purpose atana sanction hi khami financial year chhunga hman zawh hman loh a nih khan a lapse ta thin a. A lapse khan a bo vang vang thei a, mahse pawisa an neih leh chuan an revalidate leh thei bawk a. Central sorkarin emaw State sorkarin emaw pawisa an neih chuan. Pawisa an neih loh chuan ‘revalidate’ theih loh a. SSA hian engvangin nge lapse tawngkam an hman ngai loh a, SSA te lo enkawl thintu Minister zahawmtak lo ni thinin ‘Lapse’ a rawn hman tak mai kan tih chuan .....(Interruption).....chuti taka...ka sawi lai hi chuan min lo tibuai lo se ka duh khawp mai, ka sawi zawhah nangin rem i tih chuan hun ila pe anga , a duhtawk a sawi ang a, kan tibuai lo ang a. Chuti chuan SSA hian engvangin nge ‘lapse’ tawngkam hi an hman ve ngai loh tih hi kan hre ve chiah lova, an hmang ngai lova. ‘A lapse ngailo’ an tih vang niawm tak a ni a. Keini’n financial term kan hriat lapse angah hi chuan revalidate a ngai a, revalidate a ngai miah lova, tihian opening balance-ah a rawn awm leh hmiah avang hian revalidate ngai lova, rawn awm leh nghal hmiah anih vang hian a lapse lo an ti anih dawn hi kan ti a, chu chu kan dinhmun chu a ni.

Chuvang chuan Pu Speaker, wawiinah hian thil chiang tak sawi ka duh chu, SSA term-ah, a language-ah nomenclature-ah a legal term-ah emaw pawh lapse tih hi a awm lova, mahse Mizoten ‘a lapse alawm’ kan ti anih chuan kan ngaihndan nise, Bengali-ten ‘a lapse alawm’ an tih chuan an ngaihndan nise, an thu ni rawh se. SSA term-ah hian lapse a awm kan hre lova, tin, a lapse ngai lo bawk a ni...interruption)...Pu Speaker, tuna Member

zahawmtakin a sawi kha a dik zawnga lak a thain ka hria a, a lapse loh avangin .....kan hmang dawn a, uniform lei nan kan hmang dawn a ni, chu chu a tawk a ni mai.....

**Dr. R. LALTHANGLIANA** : Helaiah hi chuan thil dik tak hi kan hriat a tha, khawngaih takin kan Minister zahawmtak pawh hian min lo ngaithla sela ka duh khawp mai a. Tuna a ‘lapse’ kan tih hi kum 2010 – 2011 nikum financial year pawisa kha a ni. Nuai 743.16 hi 2010–2011 a ni a Pu Speaker, kumin financial year ....(interruption)

**S P E A K E R** : Calender year-in a thenin in sawi a, kei hian pawisa ka nei a, cheng sing ka nei a, financial year ka hre lova, ka pawisa personal pawisa kha a lapse lo a ni, financial year avangin ka lapse ve thei tlat lo a ni. Chutiang deuh chuan Minister-in a sawi ka lo hriat dan deuh chuan SSA pawisa hi lapse a awm ve lova, a lo thlen hun erawh chu March thla hmain a lo thleng thei a, March thla hnuah a lo thleng thei a, hman theih loh a ni ta e, tih emaw revalidate tiha ngaih chi a ni love, tiin a rawn sawi a. Mahse pakhatin financial year chhunga hman loh na na na chu a lapse alawm a ti a. Pakhatin financial year chhunga hman loh pawh nise a lapse love, a tihah khan kan ding mai a ni lo maw tih kha heta tanga ka lo hriat dan a ni a. Chuvangin, kan Hon’ble Deputy Speaker-in a sawi ang khan kha pawisa kha kan hnen a lo thlen a, kan hmang thei tho anih chuan a tawk a ni mai a ni lawm ni, a rawn tih kha a tha mai lawm ni kati deuh a nih chu.

**Pu LALSAWTA, MINISTER** : Chu chu kan dinhmun chu a ni, tunah hian kan hmang dawn a ni.....(interruption).....

**Pu LAL THANHAWLA, CHIEF MINISTER** : Chuvangin Pu Speaker, hetiang hi a ni, vawi za pawh lapse mahse Minister hian kha pawisa kha hman tur a la neih tho chuan a pawilo, vawi za pawh lapse mahse, a hman dawn tho chuan a hmang dawn a, chu chu kan awih mai a tha, a hman leh hman loh chu kan la en ang chu.

**Dr. R. LALTHANGLIANA** : Khawngaih takin tuna ka sawi hi tun financial year kal mek pawisa ....(interruption)...thil kha a ni. Session hmasaah ka sawi tawh a, chhan a ni tawh lo. Thu hlui a ni, pawisa kha a lak kir theih tawh loh, tun financial year ami hi alawm. Ka sawi chu 2010-2011 pawisa a ni.....(interruption).....

**S P E A K E R** : Thu vek rawh u, hemi thu chu Speaker-in ka titawp rih ang a, Minister zahawmtakin member-te he lehkha hi ka pe duh a tih pawh kha vawiinah a pe lo ang. Dawhkanah naktuk lamah an lo dah sain member tinte dawhkanah khan alo indah sa mai ang, chu chu nisela. Tin, chu lovah chuan khati lai kha chhui zui tur thil awm kan nei anih chuan he House-ah hian khatilaia inquiry commission siam tulna thilte a awm a, chutah chuan inquiry commission-in chhui se, he House-in a tih chuan chu chu motion danga lokal tur a ni. Tun tuma kan sawihona maia chuti tur tih chi mai kha a nilo, kha kha a ni a. Chuvangin Minister-in tun tumah min sem lovang, naktukah member tinte dawhkanah khan, kha kha alo awm dawn a ni.



**Pu NIRUPAM CHAKMA** : Pu Speaker, sanction letter-te min sem thei se. A sanction letter kha.

**Pu LALSAWTA, MINISTER** : Pu Speaker, SSA operation hi buaithlak deuh a nia. Vawiin thleng hian khami uniform tur atana sanction order kha kan la hmu lova, vawi tamtak kan sawi tawh a. Mahse PAB-ah te kan sawi avangin an phal anih dawn hi kan ti a, chu chuan kan kal tawp mai a. A sanction order anga a awm loh avang tak hian hemi kum 2011-2012 tun kuma kan hman mek 1662 lakhs lo awm pawh kha uniform atan nge ? hlawh atan nge ? In sakna atan nge ? tih a hriat loh reng reng a. Kan mamawh hmasak ang atan, kan mi chhawrte hlawh atan te kan han pek khan 743 lakhs hi a daih lo hrim hrim a ni.

**S P E A K E R** : Aw le, a tawk tawh e. Kha kha chu duh tawk tawh ila. Enge ni Minister zahawmtak Pu Rina hian sawifiah duh i nei ve em ni ?

**Pu LALRINLIANA SAILO, MINISTER** : Pu Speaker, member zahawmtak, Pu Thangtea han sawi kha han sawi ve lawk ngaiin ka hria a. Thu lawmawm lam a nia. Lunglei 'W' bialtu zahawmtak Dr. Lalthangliana hi zirtirtu kum rei tak lo thawk tawh a ni a. Tin, helaiah hian member senior a ni a, tin, kohhran upa a ni bawk a, thusawi a thiam si a. Lungleia Civil Hospital chungchang a sawi kha a sawi mangang thiam si a, mipui kha. Chuvangin hemi chungchang hi tuna i han sawi ang khan hemi Subject Committee, Assembly committee-V chairman zahawmtak, Pu Lalhimpuia te, tin, kan Financial Secretary zahawmtak, Pu S.Laldingliana te, Pu P.C.Lalthanliana te hian an vei em avangin keinih pawh an sawi thin a, an rawn dil thin a. Lunglei High Power Committee-in a chanve kan tum mai ang an ti a, Transformer pawh kha. E ni love, kan ti a. Kan Chief Minister leh kan Finance-te hnenah kan sawi a, tichuan khati vaka manganga an awm kha, lo awm tawh suh se. Nuai 64 min pe a, Transformer man kha tunah hian Finance pawhin min tifel vek tawh a, tih ka sawi duh mai a.

Tin, wiring pawh 1450000 lakhs niin ka hria a. Chu chu kan Finance Minister-ten min pe leh diam tawh a. A thawktu turte kan siam fel tawh a. Tin, chumai nilovin, saw aia mawi zawk sawn rawng te i han hnawih var teh ang kan ti a, nuai 15 vel niin ka hria a, chutiang chuan engkim tihfel a ni tawh a ni, tih kha ka'n sawi duh a ni.

**S P E A K E R** : Tunah chuan kha kha duh tawk tawh mai ang aw.

**Pu LALRINLIANA SAILO, MINISTER** : Khatih laia kan Member zahawmtak, Pu Zira, tuna kan Home Minister zahawmtak hova han check kha a ni a. Mobile Van kha a hlui a nih chian zia mipui hmaah a sawi a. Tichuan, kan lo thut hnuah a nih chian zia, helaiah hian kan Home Minister hian a rawn sawi leh a. Tin, kan House Leader zahawmtakin a hlui a nih chian zia a rawn sawi tawh bawk a. Chuvang chuan sawi a ni love, tih kha a hlui a nia, tichuan a hlui tawh zia chu tunah hian kal thei pakhatmah a awm lova.

**Pu B. LALTHLENGLIANA** : Pu Speaker, Budget Session-a ka zawh khan, chutiang a hlui a nih chuan engatinge chiang deuha min chhan nghal loh? In kha a chih tlat a, in chhang ngam lova.

**Pu LALRINLIANA SAILO, MINISTER** : Kan chhan zia chu tunah ka'n sawi ang a. A hlui a ni a. House Leader zahawmtak leh kan Home Minister-in an chhan avang khan, an sawi ang kha a ni e, karawn ti a. Ka'n sawi nawn leh ang a. A hlui a ni.

**S P E A K E R** : Awle, a tawk e. Tunah chuan, Governor thusawiah Motion of Thanks kan sawi a. A thenah te chuan awki sang lek lekte pawn Chair atangte pawn ka'n hau deuh che u a, min ngaithiam ula. Thahnem kan ngai tlangah ngai ila, thil tul tak a ni a. Hetianga han tih bap bap changte a awm a. Speaker khan hun i pe thawl lutuk e, thusawi mek awm lai ten an lo ding a, tih te pawh kha Hon'ble Member-te an rawn din miau kha chuan Speaker-in, 'thu rawh' tih bak kha chu a va tih theih loh va. Marshal han koh deuh a, han tih thut kha chu pumpelh hramte pawh hi a tha ve a. Mahse, tihian a hunah chuan kan thu ve leh thei zel tho a ni a. Kan ding tlang reng chuang lo a ni.

Tunah chuan kan Motion neitu Pu R. Selthuama kan lo sawm tawh ang a. A la ni lo deuh, House Leader a ni zawk e. Ka lo hmanhmawh ve deuh tawh a ni.

Tunah chuan kan sawihona kan duhtawh ang a. Kan House Leader zahawmtak, Pu Lal Thanhawla, Chief Minister sawm ila. Sawifiah tulte a awm thei a. Tin, sawi ve duh hrim hrim pawh a nei mai thei a. Hun i lo pe ang.

**Pu LAL THANHAWLA, CHIEF MINISTER** : Pu Speaker, vawiinah kan Governor zahawmtak thusawi kan han sawiho hi a lawmawm hle a. Kan Member tam berte rawn sawi pawh kha thahnemngaihna awka ri duhawm tak te, Sorkar a tha lampanga duhthawhna aw te a ri a, a lawmawm takzet a. Tin, Member zahawmtak, Pu Nirupam Chakma khan, 'a cool em mai, i hot deuh teh ang u, mut a chhuak duh em mai,' kha arawn ti a. A thu kan han awih deuh a, kan han hot chho a. Tichuan kan mut te pawh a chhuak ta lo deuh ni te pawhin a lang a, a lawmawm hle a ni. Kan tlai tawh a, hun rei tak kan la tawh lo mai ang a. Tawi te tein, chhum rem rumin ka'n sawi vek mai ang a. Member zahawmtak, Pu Lalduhoma khan Thiaka Horticulture Centre saw dik lo ni awma sawi leh sum te pawh hman nawn ni awma a sawi kha, thil hi fiah zel a tha a. Parliamentary Secretary hovin a remchan hunah officer-te nen va kalin, a tul tul ang chu va zawt fiah mai sela, a thain ka hria a. Chuvangin an remchan tlan hunah a hmuna infiah zel, a dik lo chu dik lo kan ti ngam tur a ni a. Chuvangin a dik lo te a awm a nih chuan dan an chungah lek tur a ni a. Chuvangin hun remchangah va kal se thain ka ring a. Chu chu ka'n sawi hmasa duh a.

**Pu LALDUHOMA** : Subject Committee-in tun ni 30, Friday hian kan tlawh dawn thova. Mahse, a Chiang Chuang dawn lova, keini a hmuna va kal kha PAC zawk a ni. TM, (Technical Mission) atanga an sen leh a hmanna leh kan state sum atanga an sen leh a hmanna kha a hranin hriat theih nise, tichuan double expenditure a awm leh awm loh kha a Chiang Mai dawn a. Kha lai kha a tawn tawna expenditure ve ve kha i Minister zahawmtak nihnain ka'n ngen che a ni.

**Pu LAL THANHAWLA, CHIEF MINISTER** : Minister zahawmtak a awm a, Parliamentary Secretary zahawmtak a awm a, document tul ang ang kha lo inbuatsaih fel vek sela, PAC-te a hmunah an va kal chuan, an duh ang anga an en turin lo in ready rawh se, chu chu a hminga Chief Minister ka nihna angin ka order ni rawh se.

Tin, lal chhungkuaten surveyor hna an hralh tih kha lawmawm ka ti. Kan ACB ten an man chhuak chu lawmawm ka ti khawp mai a. Khatiang mihring kha chu ka duh lo a, ka ten ber zawng a ni a, kan timualpho tur a ni a, dan a chungah lek tur a ni baw, tih hi ka sawi duh baw. Tin, ACB-ten khatianga an man kha tha ka ti, sorkar duh dan an hria a. ACB nge, Police, a tute chungah pawh lawmthu ka sawi hmasa a ni. Rorelna dik, rorel tha, rorel fel a awm kan duh a, chumi hmanrua atan chuan Pathianin mipuite hmangin he ramah leh he House-ah hian kei leh ka thiante 31 hi min dah a ni. Chu chu kan moral responsibility anih piah lamah kan spiritual responsibility a ni tih hi ka hre chiang a. Chuvangin Pathian lehkhabu thu nungin in inkara ding ang kan inti a ni a, Sam 5:24, chu chu kan dinna hi a ni. He ram mipuite hian rorelna dik, rorel tha, rorelna fel an duh a, khatiang thalo lakah khan an kham tawh a, chuvangin Kohhran angin an dil a, chumi chhanna chu ka ni. Amaherawhchu, mihring kan ni a, kan fel famkim lova, sawisel bo kan awm lova, diklo thei, ti thalo thei, tisial thei kan ni tih erawh chu kan inhrechiang khawp mai. Chungte avang chuan tawngtaipuinan kan dil cham chi fo reng a ni. Tin, hetiang kan dik lohna te, kan fellohna te, a thalo laite an rawn sawichhuak thin hi a lawmawm kan ti a. Keimahni lampang pawh infiah nan kan lo hmang thin a, kan thiam ang taw, taw, leh kan phak ang taw, taw, chutiang chuan kal kan tum ve hram hram a ni. He ramah hian a lo diklo rei tawh khawp a, a lo tha lo rei tawh khawp a, a lo fello rei tawh khawp a, kum 2 kum 3 chhung chuan theihpatawp chhuah a huaisen hle pawh tum ilangin, huaisen hle pawh ni ila; tihthat, tihfel, tihdik hi a har em em mai a ni Pu Speaker. Amaherawhchu, tunah hian a tha tan dawn niin ka hria a, a lawmawm hle a. Chungte avang tak pawh chuan helaia member zahawmtakte piah lamah Zoram mipuite, kohhran leh tlawmngai pawl te tanpuina kan duh a ni, kan mamawh a ni. Tin, he ram mipuite hian roreltu tha, roreltu dik, hruaitu tha kan mamawh a, chutiang baw, chuan kan hruaitute pawh hian mipui dik, mipui tha, mipui Pathian tih mi an mamawh ve tho ang tih ka ring a ni. Chutianga inlawm tawn chu a ngai a.

Tichuan, kan han sawi chho a, kan Governor thusawite a lawmawm khawp mai. V/C inthlan hi State Election Commission-te leh Sorkar hnathawkte, a conduct-tute leh mipuite leh MPF-te thawhrimna avang pawhin a felfai hle a ni tih chu kan pawm tlangin ka ring a. Chuvangin, a thawktute zawng zawng kan Election Commission-te pawh lawmthu kan hrih a. Tin, kan member zahawmtak Pu C. Ramhluna khan kan State Election Commission-te pawh in nekchep deuh a ni lo maw sorkar hian a ti a, keini'n va sawi leh va hrih kan neih awm reng reng kan hre lova. Amaherawhchu, anmahni zawk hian sorkar hi an nekchep lutuk em aw, kan ti zawk a ni. A chhan chu on going programme-te pawh kha min han khap sak zel a, state dangah hian on going programme, a bik takin MIEG ang chite hi mipui nek anih avangin an khap ngai lova, State Assembly inthlanah pawh, keini chu V/C inthlanah pawh on going programme-te kha min khap sak vek mai a. Mahse, min nekchep hle a ni tih hre chungin kan awih a ni. NLUP sem te pawh a laklawh hle nain kan tawp hmak a ni. Chutiang chuan kan State Election Commission thu leh hla kha kan zawm a ni tih ka sawi duh a.

Tin, RMSA building chungchang thua contract that loh hi a rei tawh khawp a, a hralhna te, hun hmasaah phei chuan zan hnih khata Hausa thar thut an tam tih kan hriat kha, khatiang kha ching laklawhte an lo awm a, chuvangin a tha thei lo hle a ni. Member zahawmtak Pu Ramhluna sawi ang chi te, Pu Thangtea pawn a sawiin ka hria a. RMSA building tha lo tih ang te hi, a ram laili-ah pawh tha lo a awm a ni dik tak chuan. Tin, RMSA building lo pawh contractor pangngaiin an thawhte pawh tha lo tak tak hi a tam a ni, hengah hian hnam angin kan rinawm ta lo emaw ni chu aw, tih tur khawpin heng hi a awm a. Tin, hralh mai mai chingte

hi an tam a ni. Hmanniah Sangau-ah ka han kal a, kan thlenna In chu Tourist Lodge a ni a, achhe em em mai a, a chhiat zia chu a zahthlak a ni. Ka'n zawt chiang a, nuai 40 man a ni a, contractor hnenah pek a ni a, contractor khan nuai 15 in a hralh a, tichuan a bang khan a sa a, cheng nuai 10 hlep a la tum si a, chutiang vel anih avangin a sakna tur hnathawhna kha a tlem ta a ni. Chutiang chi chu tunah hian tihtawp kan tum a, mahse he hri kan veina hi a rei tawh khawp a, a harsa khawp mai. Keimahni hunah ngei pawh hian han hralh ta te report kan dawng nual a, mahse tunah hian chutiang khatianga chu kan hrem ta a tih chu kan la neilo na in an bill pek loh te leh chawitir let tur mek te, khatianga kha an awm nual a ni, tih erawh chu he House zahawmtak hi ka'n hriattir duh a. Chutianga chuan kan tan tlan a ngai a, khatianga misual kha he ramah hian, mi diklo, mi hlemhle kha an tawmim theihna turin dikna te, thatna te, felnate kha a chak a ngai a. Chuvangin, keini ho piah lamah mipui mimir pawhin hetiang mi diklo kan ram hmelma, kan ram ro, mahni sum leh paia siam tur pawh ni lo, sorkar sum hmanga hming chher mai turte ram leh hnam rawk zawnga kalte hi malmak nachang, huat nachang hria ila, mipuite pawhin huattir dan kan ngaihtuah a pawimawh a, chutianga chu a ni.

Tin, inpuhmawh hi a tha lova. Inpuhmawh inpuhmawh ai hi chuan kan tih tur hi ti mai ila thain ka hria a. Entirnan, inthlanah invauna chutianga khatianga tihte kha a awm a, 'NLUP-in an vau, chutianga khatianga' tih te a awm a. Hengah hian dan a awm a, IPC dan te, Representation of the People Act-ah te. Offence a ni a, punishable offence a ni a. Chu chu kan hre tak taka kan duh lo a nih chuan, mi va puhchhiat tumna leh mi va sawichhiat mai mai ai chuan kan hre fak a nih chuan FIR file-a man tir mai hi a tha mai a. Tin, hetiang kan intihmualpho zauh zauh hian midang tan pawh a lo hlauhthawnawm ang a, a lo hlauhawm ang a, sual tum vete pawh khan an sim phah ang a, an tih loh phah ang tih ka beisei a. Chutianga zawngte pawh chuan kan ngaihtuah hi a tul khawp mai. Tin, khatianga hnawksak lo tih ang te kha ni e, a intihmualpho tumna lam ai mahin thil tha duhna avangin sorkarah, a concern department hotuah te thlen ila, khatianga tihdik kha kan inpeih reng a ni tih hi ka sawi duh a. Tin, khatianga dik lo tifel tur leh tidik ngam tur khan Pathian khawngaihna in kei leh kan hotute hi kan fihlim a ni, tih hi Zoram mipuite hmaah ka puang duh bawk a ni. Chuvangin, khatianga kha tidik ngam tur kan ni, tidik ngam turin kan awm a ni tih hi ka sawi duh a. Tin, a hremna kawngah an muang, an ti tak tak lo tih te a ri a ri a. A va hrema hi keimahni'n kan tih theih chin a awm a. Kan tih theih chinah chuan sorkar hnathawk an nih chuan han suspend te, thubuai han siamsak te, dismiss te pawh kan nei a. An hlawh han hreksak ang chi, dante ka thiam ve lova, chi hnih chi thum a awm a, chutianga hremte pawh chu kan nei nual chho zel a. Amaherawhchu, hetah, Prosecutional ..... a an kal tawh hi chuan kan Judiciary System hi a lo tha em a, India ram chuan, duh angin a chak thei lova. Chulaiah chuan induhthawhna kha, keimahni tak pawh hi a duhthawhtute kan ni nghe nghe a ni.

Tin, NLUP-ah hian sawi neuh neuh a tam a, ka han sawi duh chu - nichin khan member zahawmtak Dr. Thangtea khan kan sawichhe lo a ti a, mahse an sawichhia a ni. Aman a sawichhe lo anih chuan a lawmawm a, an sawichhe nasa a. A awmdan takah phei chuan a dawng turte hi an itsik ta emaw ni chu aw, tih tur khawp hian an sawichhia a ni. Tin, hetiang khawpa an sawi hi chuan kan hotute hi lo tha hlein an hote pawh kha pe pawh ni ila an hlawhtlinpui lovang tih ka hlau. Entirnan - hun hmasaah khan a In kawkip khan kan pe a ni, tawng mawi lo ni suh selangin party dang ngawl ngawl deuh deuh te, tulum deuh deuh te, kan sawi laia vantlang In chung rawn vawm tulh tulh te khangho pawh kha kan pe vek a ni. Mahse an han dawng ta a, kan hotute an uan khumnaah chuan hei Congress nih

pawh a ngai chuang lo in dawn zat kan dawng ve tho an ti a, an thlar pup pup a, an sum dawn kha engtinng e ka hman ang aw an ti a sorkar bum nan an hmang ta a.

Tin, hotu tam takin, “hei hi Congress policy a ni a in tihlawhtlin chuan Congress in chawimawi tihna a ni dawn a, chuvangin in hlawhtlinpui tur a nilo” lo ti tawk an awm bawk a, chuvangin a hlawhchham a ni an han ti a. A hlawhchham a ni titute hi a hlawhchham an awm anih chuan a tihlawhchhamtute an ni tih ka sawi duh a. Hun hmasaa NLUP kha vawiinah hian rinawmna, dikna, taimakna leh Pathian tihna nena dawngtute chu vawiinah hian nasa takin malsawmin an awm a ni tih hi a taka hmutu ka ni a. Tin, hmu duhtu tan chuan hmaihtelh chi a nilo Zoram dung leh vangah khatiang mi kha an awm a. Tin, kan TV channel-ah te, a bik takin Doordarshan-ah te kuthnathawktu hlawhtling an han interview te hian tam tak hian party danga an awm tawh avangin NLUP avang a ni e, an ti duh lo anih pawhin Pu Speaker, NLUP hmasa lama mite hi a tam berte hi an ni tih chu a hun atang khan a hriat theih a ni, chutiang chu a ni.

Tin, NLUP hi special package a ni, Cabinet Committee on Economic Affairs-in a hranpa liau liaua a sanction a ni tih hi a chiang a, sanction letter-te pawh member zahawmtakte kan pe tawhin ka hria, chutiang chu a ni. Tin, kum 5 chhung atan chhungkaw nuai khat leh singhnih kan target a, chung mite chu cheng vaibelchhe sang khat leh zangain kan khul tawk thei anga tiin kan hotuten an hisap a, mahse khulama min, Central lama Economist-te leh Prime Minister te leh Adviser-ten ngun taka an han thlirin, a dawngtute sum ngau ngau tur nilovin, a monitoring atan te, a evaluation atan te leh social audit te a ngai dawn a, chuvangin sorkar hnathawkte pawhin District-ah te, Line department-te pawhin khatiang atan khan motor an mamawh dawn a, chuvangin kan dil ni miah lovin, motor 40, 50 leina kha an rawn telh ve a ni, tih hi member zahawmtakte kaltlangin Zoram mipuite ka hriattir duh. Motor 40, 50 leina tur kha min rawn pe a ni. Tin, chu mai nilovin, khawi khuaah emaw compact farming-te a lo awm anga, chhungkaw 20,30,40 ten leillette huante an lo nei anga, chu chu an thlai tharte tha taka an hralh theihna turin inkalpawhna kawng tha a ngai a. Chuvangin infrastructural development atan, kan dil pawh nilovin vaibelchhe 10 tel an rawn telh a ni. Chung hmang chuan tunah hian hma kan la mek zel a, tin, chumai ni lovin, nakinah chuan hei computer age a ni tawh a, tunah chuan, technology alo sang tawh a, chuvangin awlai takin Aizawl atang pawhin kan fingertip-ah, kan kutzungtang hmawrah Zoram pum awmdan te kan hriat theihna turin Computer Monitoring System-te pawh an telh a. Tin, chumai nilovin khang kan dahna tur atan te leh a tul te lo facilitate-na turin a hall sakna turte thleng pawhin an rawn telh a ni, chutiang chu a ni a. Tin, chumi piah lamah chuan engemaw a propagation-ah te leh education-ah te leh awareness campaign atante sum kan mamawh dawn a ni tih an hriat avangin, chung atan te pawh chuan an rawn dah a ni. Chuvangin NLUP hian a fun kim khawp a, kan dil miah loh malsawmna motor 10 tel leina te, kawng tha laihna te a rawn keng a ni.

Tin, hei hi kan plan-ah Central lama thil titheituten min dah sak a, kan Plan size hi a nek chep em, chep lo em lampang hi chu ka hre ve thiam lo a, financial expert-te kan nih ve loh avangin. Amaherawhchu, thudik awm erawh chu Department lam atangin pakhatmah, naia sen khat pawh NLUP atangin pawhhek a ni lo tih hi, Zoram mipuite ka hriattir duh a. Tin, rawngbawltu, kohhran mi, kohhran upate tan chuan sawi sawi chi a nilo a ni, tih hi ka sawi chiang duh. Tunah hian NLUP pawisa hi pawhhek kan chak em em zawk a ni. Nichinah member zahawmtakin kan laksa hman bante kha a rawn sawi a, kha kha thudik vek a ni. K. deposit-ah te kan dah a, khatiang khan kan han sem nghal zung zung theih loh te,

infrastructure development atan te leh thil dang dang atan a lo ni a, hman zung zung theih loh kha K deposit-ah khawi khawiah emaw kan dah a, khang kha hman kan chak em em zawk a ni. Plan fund hmun dang atanga pawh chu sawi loh hemi NLUP Fund ami kan hman nghal zel theih loh te hi Department dang kan mamawh ngawih ngawihna atan hian hman kan chak em em a, mahse a thiang si lova, dan lo anga kal mai mai kan ni ve silova. Chuvang chuan a theih loh a ni, tih hi ka sawi chiang duh a. Tin, chhungkaw 120000 kum 5 chhung atana kan target-ah khan thawhkhatnaah first phase-ah chhungkaw 45000 kan thlang tawh a, instalment-in kan pe a ni. Tin, instalment-a pek hi kan experience atangin, kan tawn hriat atangin a tha zawk, an hlawkpui zawk dawn tih hi kan chiang a.

Tin, chumai ni lovin a phase-II naah chhungkaw 45139 vel niin ka hria a, a chiah chiah ka hre lova, Governor Speech-ah khan chhutsual palh a nih ka ring a, emaw kan lo guide sual palh anih ka ring a, keimah tak pawhin ka lo enchiang lova, pawh ka ti khawp mai. Engpawh nisela a dik a awm tho a, chhungkaw 45139 vel an ni a, chu chu tunah hian first instalment pek tura ruahman mek a ni. Tin, 2013 hmain kum 5 chhunga tih anih avangin 120000 family kha, chhungkua kha kan sem hman vek dawn a ni, kan tuam hman vek dawn a ni. Chutiang chu a ni a, mi an phut bawh a, a tul anih chuan a nuai tel pawh khan kan pe hman vek ang instalment-a pe tawh lovin instalment-a pekte pawh hi a thatna, hei Pu Mathana kan Minister zahawmtakin Fapa tlanbo pawh kha a pa rochan ai kha vawikhatah khan la lovin instalment-in dil sela, lo la zawk se, khatiang em em khan a mualpho lo ang a ti a ni. Chu chu tunah hian khami system kha kan kalpui a, an hlim hle a ni. A dawnglotute an chiau an chiau a, Pu Speaker, a dawngtute hi an hlim khawp a, an ngawi hmak mai a ni. Chuvangin khawilai emawa lo chiau lo chiau hi chuan kan beng a verh tehchiam lova, a dawngtute hmeithai te, pachhia te, miharsa, lonei mi te, kuthnathawk miten leirem an rah theih hi kan duh ber a ni.

Pu Speaker, vawiinah hian Mizoramah hian Urbanisation hi a nasa hle a, kan khawpuiah hian Mizoram mipui zaa sawmnga chuang kan cheng a ni. A chhan nia lang chu Zo khaw lamah ei a harsa a, tlangram lo neihin hawp khawp neih a harsa tawh, chuvangin khawpuiah khawsak a awlai zawk mahna, tiin kan pem lut a, mahse khawsak a lo awlai zawk hranpa lem lova; mi inhnuaiyah, hnuai leh chhawngah kan awm a, nitin inhlawh te a ngai a, nitin inhlawhnate a lo van chang a awm a. Tin, mahni ram tia han koh tur inch. 1 pawh nei lo hi tam tak an awm a ni. Chuvangin, vawiinah chuan heng NLUP hi mipuite hnenah awareness campaign tha tawh kan nei a, a body-ah kan kohhran hrang hrang hruaitu pawimawh ber berte an tel bawh a, chungte nen chuan kan inbe hova, tha tak leh uluk taka kal chho zel hi kan ni.

Tichuan, tunah hian awareness campaign kan hotute, kohhran hruaitute tanpuinain kan nei tha a, tichuan, chu awareness campaign atang chuan kan bei ang a, sum kan han sem tan te pawh hi rinawmna, dikna, taimakna leh Pathian tihna nena dawng turin kan hotuten an ngen a. Tichuan, lei rem an rah a, khaw eng an hmuh hi kan beisei a ni. Lal Isuan miretheite chu kumkhua-a awm tur an ni tih min hrilh a, mi hausa te, milian te kan tluk tir ngawt thei mai lo ang; mahse mahni zawn theuhah lei rem an rah a, khaw eng an hmuh hi kan duh ber a, chumi atan chuan kan buatsaih a ni. Chutianga vawiina Zoram dung leh vang hi kan khuh theih chuan khawpuia pem lut tawhsa te pawh hi mahni hrawk zawlah lei rem rap a, khaw eng hmu theia an awm kha an duh zawk kan ring a. Chutiang chuan organization-te pawh hi zawi zawiin a titem turah kan beisei a ni.

**Pu LALDUHOMA** : Pu Speaker, khawngaihin. A dawngtu tur mipui hi kan hmanhmawhpui vang a nia, kan thahnemngaih vang a nia, nikum hmasa hmasa leha kan passed tawh, pawisa awmsa diam a la awm si a, hun hi a tlem tawh si a, hmanhmawh a ngai hlein ka ring a. Khami lo, a infrastructure component kha, building sak te, kawng laih te, tui lak te, kudam-te emaw khang kha anih duh hmel a. Kha kha la hman loh, Department hian atir atang khan cheng khat mah la hmang lo Department pawh hi engemaw zat an la awm a ni a, chu chu kumin leh nakum chhunga han hmang zo hman tur chuan contract han thawk se, bill pawh an la hman dawn emaw ni le, ka ti a ni. Kha lam kha enge ni a harsat viau le, kawng han laih mai te hi engemaw min dal le, a harsat viau le? Tia in dah reng hi le ?

**Pu LAL THANHAWLA, CHIEF MINISTER** : 2013-ah kan hun hi a tawp mai dawn lova, a chhonzawm zel dawn a, chuvangin hun tam tak kan la nei a ni, Pathian khawngaihnaip mipuite zarah. Tin, sum hi hman fimkhur a pawimawh khawp mai a, chuvangin a pawng a puia an hmanlohna turin Office hote hi an fimkhur a. Tin, a tulnaah chuan infrastructure development atan pawh khan tunah hian an hmang reng a ni tho a ni, tunah hian. A tulna apiangah chuan an hmang thei zel a, chutiang chuan a kal rual thei zel a. Tin, NREGS and Convergence kan tih angah te pawh hian tangkai taka hman chhoh a ni a, chuvangin mipui lamah chuan an lawm hle a. Entirnan, vawkte te kha kan beneficiary-te mamawh zat ang kha hmuh mai te kha harsa a ni. Burma lam atanga vawkte lak te kha an han khap deuh na a, mahse a tawh kan hmuh theih loh avangin leh Burma lam atanga lo kal hi an duh tho avangin leh kan Minister-te ngei pawh hian anmahni in lamah an lo vulh tho a, a that em avangin hetiang ang te pawh hi i khap tawh lo mai ang u, kan han ti a. Chuvangin harsatna tehchiam kan nei tawh lo niin a lang.

Tin, bawng hi a har leh bawh a, Mizote hian ti ti hi kan han duh bawh a, mipui tihchiai te hi kohhran mite hian nuam kan ti viau mai emaw ni chu aw, tih turin chanchinbuah te a lo lang a, amaherawhchu, a dawngtute chu hmannah khan a first batch-te kha Harayana bawng te kha kan han sem a, an hlim hle a ni. Hlim lo sela, duh lo sela, a hmunah khan min han hrilh mai selangin an hlawk zawk tur kha a ni a, mahse, an la vek a. Tin, thenawm hnaia bawng te pawh a awm ve thova, tih te hi thu vu vuk a ni ringawt a, kan mamawh zat ang puhruk tur hi an nei lo hrim hrim a. Tin, tuna kan bawng lakluh hi kg 15 atanga kg 20 vel hnute pe thei a ni a, tuna kan thenawm amite hi chu kg 6 kg 7 vel lek lek pechhuak thei, tuna keini pawn helaia kan vulh ang lek lek hi a ni a. Kha kha kan hotuten NLUP atana an zuk mitthla a ni lo a ni, tih hi han hre darh hlawm phawt ila. Tunah hian kan mithiamte zawkin Harayana lam atanga han lak hi an rawt a ni a, vanneithlaktakin kan mithiamten khu lamah agent tur tha takte an zuk hmu a, khati khan an kal chho a ni. Amaherawhchu, kan fimkhurna zawk chu Harayana climate leh kan Mizoram climate-te a lo inan lohah hian a bawng te hian harsatna an tawh thei ang em? tih erawh chu kan Vety Department lampangte fimkhur taka enkawl turin leh ngaihven reng turin kan in hrilh a, chutiang ang chu bawng chungchangah kan kalphung chho a ni a. Tunah hian kan duh khawp kan hmuzo dawn a, amaherawhchu, a kal chhung hi a rei khawp a, han chauh deuh te leh han thih phah te pawh a awm thei; mahse chu chu a beneficiary-te chawi tur a ni lova, sorkarin kan puhruk zel dawn a ni. Tin, chhungkaw nuai khat leh singhnih kan tih kha kan han khuh tak takah chuan chhungkaw engemawzat NLUP khuh ngai, singhnih/singthum te an awm chu kan ring a, chungte pawh chu a la khuh chho zel dawn a, kan hotute pawn an hisap tihte pawh hi he House zahawmtakah hian ka'n sawi lang duh a ni.

Tin, inthlan chungchang kha sawi leh thin ila, sawlai khaw sawm pathum emaw leka inthlan kha kan tih loh avangin law and order a chhe ta anga sawi talh te hi kohhran mi, pulpit-a chuang kai ve fo tan chuan a tih chi loh hle a ni, tih hi ka sawi duh a. A chhan leh vang chu kan hre vek, inpuhmawhna atan a beitham lutuk. HPCD te hi United People Forum (UPF) August ni 15 2006-a Chief Miniser Bunglow-a dinah khan HPCD te hi an tel ve a ni. KMO te leh Kuki National Organisation-te hian Manipur-ah an rights an demand ve a, an hel a, central nen inbiak an duh a, chutah chuan kei hi minrawn bel ve a, kan sawi tlang a, Central sorkar-in a be ta a, tichuan suspension of operation a pe ta a. Chumi chungthuah chuan designated camp-ah hel ho zawng zawng kha an lut ang a, an silai an surrender ang a, anti-social activities-ah an inhnamhnawih tur a ni lo, tih a ni a, inbiakna pawh vawihnih/vawihthum an nei tawh a, tunah an khaih lak deuh, nawr chak leh deuh turin an President pawhin minrawn phone, tiang chuan an kal chho mek a ni. Tin, UPF-te hian chutiang chu an duh ve a, central-ah a ti theitute kan biak pui a, Central pawhin rem a tihpui a. Tichuan, Manipur base an ni a, HPC te hi. Chuvangin Manipur-te nen tribal agreement an nei a, suspension of operation an nei a, designated camp-ah an awm tur a ni a; an arm pawh an surrender tur a ni a, khawtlang tan pawh buaina an siam miah lo tur a ni, tih kha an intiamna a ni. HPCD te hi a then chu an lut a ni mai thei ka hre lova, Mizoram leh Assam-a buaina siamtute hian an lut ve lova, chuvangin Central-te nena an agreement-te hi an bawhchhia a ni, number one-ah chuan. Tin, Mizoramah eng emawrawn tih an tum a, inbe turte pawhin minrawn ti a, inbiak kan hnial lo, amaherawhchu, vawihnah chuan inbiak an ti a nih pawhin Manipur, Central-te nen inbe tlang tura tih an ni a; keini inrawlh vena tur a ni lo a ni. Tin, lo be dawn ta ni ila tunah hian an phir phawk a, pawl hnihin an awm a, a khawi zawk nge biak tur ni ang tih pawh hi a hriat theih loh a ni. Chutiang chu an dinhmun hi a ni a.

Tichuan chung ho chuan Mizoramah V/C inthlan hi an vau a ni. An nupuite an vau a, V/C-ah HPCD lo chu an thlan tlin vaih chuan nasa takin an chungah hlei an len turin an vau a ni. Chutiang karah chuan mipui chuan inthlan loh zawk an duh avangin, sorkarin ngun taka a ngaihtuahin mipui zawkin tianga hlauhna kara inthlang lova, HPCD zahngaihna hnuai varawn ringawt kha a tha love, tiin kan hotuten fing takin tiang hian inthlang lo turin an ti ta zawk a. A mipui tan pawh a thawventhlak zawk a. Tin, bialtu MLA 3 tawpin hei hi mipui tana tha zawka an rin avangin sorkar-te nena inbe rawna ti kan ni. Hei hi Dan leh thupek kenkawhna chak loh vang a ni hranpa lova, amaherawhchu, kawhmawh bawl an awm a, kawhmawh bawlte kutah kan mipuite hi hlauhthawna dinhmunah an din lohna turin kan sorkarin fing takin ngaihtuahna a hmang zawk a ni, tih hi House ka'n hriattir duh a ni.

Tin, Phuldungsei tih pawh kha dik tak chuan tunhma zawngkhan khulaia mite khuan kan ram an ni tih pawh an inhre lova. Keimahni zawkin kan zuk zawng chhuak a, tichuan kan ram nih kha an lo duh zawk bawkw avangin, tiangkhan kan han buatsaih a. Tin, a tirah chuan Tripura sorkar pawhin minrawn chuhpui lo a ni. Amaherawhchu, inthlan kan han buatsaih a, khatia kan han tih velahkhan engemawtia harsatna tawh theih anmahni mipui zawk khan an hlauh avangin kan inthlan tir ta rih lo a ni a. Boruak tha siam turin sorkarin ngaihtuahna a hmang mek a ni, tih pawh hi helaiyah kan hriat a thain ka hria a, chu chu ka'n sawi duh a ni.

Tin, Thermal Plan tih kha Member zahawmtak Pu Lalduhoma'n arawn sawi a, a hriatsual palh emaw ka hre lova, tunah hian 'coal block' tih kaihhruaina hnuaiyah



khan tender an lo float a, mahse an ngaihsak zui miah lova. Kan lo luh hnu kum hnih hnuah khan thil awm dan Coal Minister-in min hrilh a, Central-a kan inhmuh tumin. Bihar-ah emaw, Orrisa-ah emaw, Chhattisgarh-ah emaw coal block kan allot ang che u ang a, chu chu tuten emaw PPP in siam ang a, chuan thermal project Mega-watt za tel, in vanneih phei chuan a sang tel pawh a tih theih a. Chutiang chu a ni a, chuvangin rawn ngaihven thar la min ti a. Chutiang chuan Coal block atanga power hmuh chhuah theihna turin Coal block-te kan dil a, hemi tender awmsa te hmangin Kolkata Company-te hnenah pek a ni a. M.o.A kan sign tawh em ka hre lova, tichuan Orrisa-ah te, Chhattisgarh-ah te, Bihar-ah te dil a ni a. Ka rin dan leh ka beisei danin Chhattisgarh a nih loh chuan Orrisa zawkah min pek ka beisei a, Coal Minister pawh kan inbe tawh a. Tin, Coal Secretary pawh kan hotute nen an inbe tawh a, chutiang chuan beiseina kan nei a ni. Chu zawk chu kan Member zahawmtak khan a lo hriat pawh a nih ka ring a, keimahni expenditure atanga thermal power siam tumna keini sorkarah hi chuan a awm rih lo a ni.

Tin, Tuivai Lei chungchang kha Member zahawmtak Pu Duhoma khan a rawn sawi chhuak a, tin, hei election a zo tep a, third weak emaw April vel hi chuan hna an tan hman a beisei awm a. Tin, ruah a sur loh a, khua-in min bumro loh chuan May thla chhung hi chuan an thawh zawh theih an inbeisei a, chu chu tuna kan dinhmun a ni. Nichina kan ngaihtlak ang khan a ral lehlahmah khua engemawzat a awm a, chungah chuan buhfaita an nghei a hlauhawm avangin, chutiang chuan kan hotuten khilai khi thawk chak turin kan innawr a, bialtu MLA pawhin thahnem a ngai hle a ni. Chutiang chu kan dinhmun a ni, tih hi kan House zahawmtak ka'n hriattir duh a.

Tin, tukinah khan Member zahawmtak Pu Thlenga hnen atang khan Games and Sports lama kan hmalakna leh waviina kan han neihte kha an sorkar lai atanga an lo ruahman tawh kan chhawm chhoh anih thuah lawmthu a rawn sawi a, ka lawm hle mai. Khatianga an lo ti tawh a nih chuan a tha a, engpawh nisela Rajiv Gandhi Sport Stadium an tih kha chu lammualah sawn a ni a; khatih laia an ngaihtuahnain a phak bak piah lama thain tunah sawn kan Sport Minister-in a siamsak mek a, a phahsak tawh a. Tin, Galery changtlung tak a siam dawn mek a, khatih hunah kha chuan vaibelchhe 65 khan Galery block khat kha siam an tum chauh kha a ni a, khami aia changkang zawkin tunah sawn an tum aia thain kan siam sak ta hi a lawm lehzual turah ka ngai.

Tin, khatih laia Mualpuia Rajiv Gandhi Sport Stadium tuna kan siam khu chu an rilru ngaihtuahnah hian a awm miah lo, tih erawh chu ka hriattir duh zawk a ni.

Tin Pu P.P. Thawla, Member zahawmtak khan MDC, hemi Delimitation Committee-ah a tel lo kha a rawn vui deuh a, amaherawhchu, Sorkarin ngun taka an en a, MDF hi recognize party a lo ni lova, recognize party lo chu a tel theih loh a ni, a pawl khawp mai; recognise an nih velleh kan thun nghal ang.

Tin, Zobawk Sports Complex-te pawh hi a rei ta viau a, a tirah khan crore 34 estimates a ni a, amaherawhchu, ni 2.8.2010-ah khan vaibelchhe 17.51 an rawn sanction a, khami chhungah khan estimates siam that leh a ngai a, approved amount mil turin estimates kha siam that leh a ngai a; chu chu siam that a ni a, tunah hian tender koh a ni a; a chhangtu'n a rate a tisang lutuk a, tunah hian an in negotiate mek a, a fel velleh bultan nghal theih tur a ni. Tin, khanglai hun ami kha sorkar leh Planning Department pawhin a hriatpui loh kha an lo awm nual mai a, Hnahthial ang te saw. Chuvang chuan an lo buai thin kha a lo ni a, tun hnuah hian kan hre ta a. Keini hi chuan proper channel-in Planning Department kaltlangin henge hi kan safe priority-te an ni e, tiin kan thehthla thin a, khatianga kha a lo ni ve lova, a

tam ber kha Hnahthial te leh Zobawk te pawh hi an ni. Chuvang chuan harsatna a awm a, tin, tiang khan lo chhuak ta se, sorkar hriatpui loh kha engtin tak hmang ang maw, tih hi ngaihtuahna a awm a ni.

Tin, Member zahawmtak Pu Thlenga'n an sorkar hmalaknate kan sum renchem lawmthu a sawi rual khan kei, vuina ka nei ve a, Tuirial Hydel Project Mega-watt 60 pechhuak thei tura lung kan phum, tha takin lo chhunzawm sela. Kut tling lova sum lak duhna nen khan lo ti lo sela, vawiinah hian Power chhit tur ringawtah chuan kan intodelh tawh tur a ni a, khangte kha a pawh hle a. Amaherawhchu, lehlamah chuan lawmthu sawina tur a awm a. Lengpui Airport-te khu tihchhiat hleih theih tawh lovin a awm a. Kan han zo hman hram te kha, tihchhiat tum tan te pawh a tihchhiat theih tawh lova, a lawmawm hle a ni. Chutiang chuan vawiinah hian lawmthu sawina tur tam tak helaiah hian a awm a, a lawmawm hle a. Bamboo Chief Minister kha kan nei thin a, mahse bamboo lamah hian India hmarchhak lamah hian kan lo hnufum ber a lo ni a, a pawh khawp mai a. Nagaland chuan bamboo Chief Minister nei ve miah lo khan World Bamboo Day an ramah an lo hmang daih tawh mai a lo ni.

Tin, hmannah kan Chief Minister hmasa kha Tripura-ah a zuk zin a, communist ho anni hi hun hnununga Krista tiduhahtute BJP Hindu kulmukte nen pawha inkaihkuaha insi riala thawk ho thei kha an ni a, khutah communist Pathian awm ringlo ho hnenah a zuk kal a, a zuk fak nasa mai a, Mizoram Sorkar chu hek namen lo khan sap chanchinbuahte khan min zuk chhuah a, a pawh hle a. Mahse, kum 10 chhung khan min tlan pel a ni a, Tripura-te pawh khuan rubber plantation a ni emaw thil dang dangah mau singsak danahte pawh a pawh hle a. Tichuan, tunah hian Bamboo Chief Minister khan nichin khan Minister zahawm tak Pu Mathana khan a sawi ziktluak lova, mau hung thum in neih chuan millionaire in ni ang a, in faten Sorkar hnathawh pawh an duh ang a, Sorkar hnathawk tur pawh kan hmu zo lovang titu khan kum 10 chhung khan mau chi tha a lo hmu zo lova. Hmanni khan TV-ah a sawi a, tunah hian Kerela-ah mau chi tha a zuk hmu a, tin, a chang neilo chi a ni, a ti, mau chi tha chang neilo TV-ah khan in duh ka ring a, kha kha min han rawlruk selangin keini hian kan zuk bawhzui ang a, mau chi tha mi, chang neilo kha kan ramah hian neih a chakawm hle a ni. Tin, Mizoram Bamboo Day hmasa ber kha hmanni khan kan hmang a, pawn lam atangin bamboo expert-te an lo kal a, kawng nasa takin minrawn kawhmuh a, a lawmawm hle a. Tin, a hnua hian Bamboo Seminar kan nei a chungte pawh chu mithiamte an lo kal a keimahni tana tha tam tak a awm dawnin kan hria a, chung angte pawh chu kan bawhzui chho mek zel a ni.

Chutiang chuan, Pu Speaker, theihpatawpin hma kan la chho a, kan Governor-in a speech-ah hian a zawng a za rawn thun lo mahse, a rawn thun tlangpuih hian member-te'n zuk sawichhiat leh tha lo zuk tih ai mahin duhthawhna lampang an rawn sawite hi a lawmawm ka ti. Hei kawng chhia te hi kum 10 chhung kawng lo chhe tawh kha kum 3 chhunga siam tha mai thei tura min han ngai reng rengte hi lawmthu ka sawi a, kan la ti thei rih lo anih pawhin khang kha chu awm rih sela. Tin, nimin lamah khan kawng zawhte a awm a, khangte pawh kha a lawmawm khawp mai a, an kawng zawhah khan kut tling lova sum lak, corruption, eiruk, zawmthawtna lampang chi te kha au hla kha a awm lova. An au hlate kha ruling party-te tan pawh han ngaih thlak hrehawm em em a awm lova, an fel hlein ka hria, a lawmawmin ka hria. Tin, Mizoramah buh leh bal a tlem tih hi puhmawh tur kan zawng thin a, keimahni zawk hi inpuhmawh tum ila, in fuih ila thain ka ring

a. Mizo ringtu zaa za inti te hian kum khata thla sawmpahniah hian, thla 2 ei pawh buh leh balah hian kan thar lo a ni. A bak zawng hi Hindu kan tih, ban 10 nei bia kan tih te hi kan zuk pur a ngai a, chung puhmawh tur kan zawng a nih chuan keimahni a thawk chhuak lotute hi kan inpuhmawh tur niin ka ring a.

Tin, gas-te hi mipui hriatrengnate hi a tawi khawp a. Hmanni lawk ala ni a, Aizawl khawlaiah zanlaiah gas bur intlar ber bur, tlaivar ngai, veng thenkhatah phei chuan a veng mite mut theih loh khawpa beng chhen te, tin cylinder a bo hlauhawm vanga chain-a thlun deuh thleh thluah te kha hmanni lawk ala ni a, vawiinah hian chutiang em em chu ala awm lo a. Amaherawhchu, hun hmasa atanga kal chho zel kan chhawm chhoh, engnge ni lo ruk tum phet te hi a awm nual a kan man reng a, kan chawi tir reng a chutiang chu a ni.

Tin, kan Minister-in Kohhran lampang hi a ngaipawimawh a, Christmas lai te leh eng tik lai pawh hian inkhawmpui hi kan Kohhranah te hian kan ngah bawk si a, kan nei deuh reng a, chuvang chuan cylinder hi a za tel a sang tel te pek a ngai a. Tun Christmas dawn te phei kha chuan IOC in kan Minister hi an rawn khak a ni. Heng a kalna lo turah Kohhran leh khatiang angah khan i kal tir tam lutuk tiin an rawn khak a ni. Chutiang khawp chuan mipui mimir zawngin kan lawina theuh Kohhranah khan tam tak a luang lut a. Hmanni lawka KTP General conference Thenzawla neihah khan an duh thal chu trip 7 a ni a, mahse trip 7 kan tlin sak ta chiah lova. Chutiang chuan kan ram chhungah tho Kohhran tante leh khawtlang tana hmanna turah hian a kal peng tam ve khawp mai tih te pawh hi hria ilangin. Kan luh atanga reiloteah khan cylinder hi singkhat zet kan Minister hian a tipung a ni. Mahse chuti chung pawh chuan kan la indaih lo a nih chuan mihring hi kan pung chho ve zel a ni, tih te pawh hi hria ilangin, chutiang chu a ni. Chuvangin heng lovah pawh hian kan thuneihna piah lam ami a nih avangin politics-a inchirh thehna atan hmanraw thaa kan ngai a nih pawhin a nihna dik tak chu chutiang chu a nih avangin, hengte pawh hi harsatna siam chawp a nih loh avangin thahnemngaihna avang zawka harsatna han tawh chang a awm zawk a ni, tih hi kan hotuten min hriatpui se ka duh a ni.

Engpawh nisela, vawiinah hian kan lawmna pakhat chu hmanni lawkah khan kan rama Party lian ber pakhat president chuan Congress sorkar hian tihsual a neih vaih chuan kan dim dawn lo tih kha a han sawi kha a lawmawm ka ti a. Khatiang khan rulling party-te min sawinaah khan min chawimawi duh ang tihngaihna reng reng ka lo hre lova, khamiah pawh khan lawmthu ka sawi a ni. Ka lawm e.

**Pu C.RAMHLUNA** : Pu Speaker, khawngaih takin District Council-in an hlawh tihpunna tur atana an pass kha engtingge ni, kha kha ngaihtuah ngaihna a awm em aw ? tih kha ka'n zawt lawk a ni e.

**S P E A K E R** : Aw, kha kha chu a lawmawm a, kan hre tlang a, hemi budget ti mai ila, vote on account-a pawisa a englo turah khan a lan pawh rawn lang mai turah ngai ila, chungah chuan kan la ngaithla ho mai dawn nia. Aw le, tunah chuan motion neitu Pu R.Selthuama sawm ila. A sawi duhte a sawi ang a, House pawmpuina han dil nghal sela, a tha ang e.

**Pu R. SELTHUAMA** : Pu Speaker, ka lawm e. He roelna in zahawmtakah hian dik takin ro i rel thin a, a lawmawm a, kan fak che a. Amaherawhchu, vawiin kha chu tlem kha chuan i lai lo deuh emaw ni ka'n ti deuh a. A motion neitu kha a sawi rei vak loh lai khan a lehlam pang ami member zahawmtak Pu Thlenga te kha chu an sawi rei deuh pawh khan haider thei deuh tlat mai kha hleih chu i nei ta deuh zawk emaw ni ka han ti a, amaherawhchu, ka vui love.

Tichuan Pu Speaker, hei hun a tlailam tawh avangin ka sawi belh vak tawh lo mai ang a. Kan motion hi mi 20 laiin kan sawi a, kan tuipui em em a, a lawmawm a. Hei Governor Speech-ah hian lawmthu sawina tur vek a niin ka hria a, lawmthu pawh kan sawi vekin ka hria a. I vei lama mite khan lawmna hi a chanveah hi chuan a sawi theih e, tih ang zawng te khanin an han sawi a. Mahse uluk takin ka lo ngaithla a, an lawm lohna an rawn sawi kha chu Governor Speech-a tel loah chiah khan an lawmlo a ni. Chuvang chuan Governor speech-ah khan lawmthu sawi turin kan ti a. A sawi lohah khan lawm lohna an rawn zawng ta tlat mai a. Chuvang chuan a sawi loh lama lawm lohna an zawng dawn anih kha chuan sawi tur tamtak an neiin ka ringa. Chuvang chuan Governor-in a sawi chinah kha chuan an lawm ve vek niin ka hria a. Hei kan hriat tawh angin kan sorkar dinglai chuan theihtawpin hma ala a, kan hotute pawh an fakawm a, hna an thawk nasa a.

A bik takin hei NLUP chungchangah phei chuan kan Chief Minister pawh hi hman lo em em chung hian eng hunah pawh hian Apex Board meeting-te rawt a nih chuan, chutiang chuan ni mai rawh se, tiin hun hi a inpe reng thei a ni. Committee-ah a tul pawhin khatieng khan a ti reng thei mai a. Chuvang chuan a fakawm a, a hmalakna pawh hi a tha em emin ka hria a. Hmanni chu Nursery-ah kan awm a, keini hi. Nursery ami sawn leiletah NLUP an dawng ve a. An pa chu a thi tawh a. Amaherawhchu, 2<sup>nd</sup> Instalment an han dawn a, an pawisa atang khan JCB an ruai a. Tichuan leilet kha an zuk laih tir a, an pawisa dawn zawng zawng khan an laih tir a. An fanute khan an zu hmu ve chu a lo zau ta duai mai si a. 'Kan tah hi a chhuak mai a. Ka pa kha la dam se, min han hmuhpui sela, a lawm dawn em mai a,' an ti a ni. Chutiang chuan NLUP hmanga thawk tak takte hi chuan insiam len pawh hi an tum a, a tha em em a. Amaherawhchu, chutih lai kara 'in pawisa sem hi a tlem alawm' tih ang ringawta vui tum pawl hi kan awm hi chuan a dawngtute pawh hi an inenfiah ve a ngai ang a. Khatieng ang lo vuipuitu thinte kha kan awm a nih pawhin anmahni pawh an lo inenfiah ve a tul awm e.

Tin, kha, i vei lama mite pawh khan vawiin te pawh khan kawng zawh an awm a ni lo'm ni? te pawh kha an han ti thut thut a. Kawng zawh te pawh hi hei kan Member zahawm tak Pu T.T. Zothansanga hian a tia lawm, kawng zawh hetia an han awm laih laih hi chuan Inthlan dawn hnaih a ni tawh thin e, a ti a. Hei, a chhinchhiah thlap mai a. Aizawl Thupuanin a sawi dan chuan ni 14.6.2003 ah pawh khan Zodin Square-ah hian Police-ten zirlaite chawnghei an nawr a, chungte chu mi 112 lai an ni e, a ti a ni. Tichuan ni 20.6.2003 ah khan fixed pay-a zirtirtuten hlawh an hmuh theih loh avangin an nghei baw a. Chungte pawh chu khatih laia sorkar khan CRPC Sec 144 a'n puan hnan leh hmiah mai a, a ti a ni. Chumi thla vek ni 23.6.2003 ah pawh khan Mizoram Audit & Account Service te kha an nuar a, pendown strike an nei a. A ni thum lek hnu ni 26.6.2003 ah khan khatih hun laia Chief Minister zahawmtak khan 'no work, no pay' hman a nih tur thu kha a'n puang zui ve leh nghal baw a. Chuvang chuan kawngzawh deuh leih leih te pawh kha an lo awm ve a nih pawh khan, Inthlan a hnai ve deuh tawh a nih hi tiin ngai ila a tha mai awm e, a ti a. Hei hi kan pawm tlang vek mai awm e. Chuvang chuan eng sorkar pawh hian thil tha tih hi kan tum vek a, amaherawhchu, vawiina ka sawi duh chu kan Governor Speech ngeiah pawh hian tuna kan sorkarte hi an tha famkim e, a ti hauh lo, an tihthat, thil tha an

tumna hi a rawn sawi a, an thawh tawhte a sawi a. Mihring kan ni, mifel famkim kan ni vek lovang, kan hotute pawh hi, mahse chuti chung chuan theihtawpin hma an la a, churang chuan tuna Mizoram sorkarin a hmalaknate hi a lawmawm em em a. A bik takin mirethei, mi harsa, chhumchhiate tan phei chuan a thlamuan thlak em em a ni, tih hi sawi mai ila.

Tichuan, Pu Speaker, nilai zante a ni a, inkhawm te i chak tawh niin ka ring a, ka sawi rei tawh lo mai ang a, he Governor Speech-a lawmthu sawina hi he House-a min adopt-pui turin ka rawn ngen e, ka lawm e.

**S P E A K E R** : Awle, Governor thusawi chungchanga Motion of Thanks kan sawiho a, mi 20 churang laiin kan han sawi a, a lawmawm hle a. Kan ngaimawh laite leh sawi tul kan tihte kan sawiho a, sorkar lam atangin sawifiahna kan ngaithla bawh a. He motion hi a neitu mover-in pawmpui turin House a rawn ngen bawh a, kan buk tawh mai ang a. Chumi hmaa han sawi lawk ka duh chu NLUP chungchanga beneficiary number chungchang pawh kha kan opposition lam leh kan ruling lamte pawhin tumahin in sawilang nasa lova, in chiang tlangah ka ngai a. Heti laia Department 2 lekah pawh khan family 11272 kha a figure-a rawn langah pawh khan a lang tlat a, churangin Department 8 emaw lai kha khang ang Department 6 emaw langlovah kha chuan figure kha 20000 kha chu a ni thei lo tih kha in chiang tlangah ka ngai a, churang chuan a figure kha 45139 tih kha a dikna a ni zawk a ni, tih kha in chiang tlangah ka ngai a, lawmawm ka ti a. Khati laiah khan in inbei vak ang tih kha ka lo hlau deuh a.

Tunah chuan Motion of Thanks adopt remti apiangin ‘remti’ ti rawh ule. Remti lo kan awm chuan ‘remti lo’ ti ula, awm lo maw. ( Pu R.Selthuama : Pu Speaker, ka lawm e) Awle, Motion of thanks chu House-in lungrual takin a adopt ta a ni. Vawiina kan tih tur chu kan lo zo ta a, kan chawl tawh ang a, naktuk ni 22.3.2012 (ningani) zing dar 10:30- ah kan thukhawm leh ang.

Sitting is adjourned at 6:35 P.M.